

明诗别裁集

沈德潜

文硕阁

wenshuoge.com

目录

关于我们 3

卷一 5

卷二 21

卷三 38

卷四 55

卷五 71

卷六 84

卷七 101

卷八 121

卷九 136

卷十 153

卷十一 170

卷十二 185

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

卷一

刘基

基字伯温，青田人。元进士，洪武中以佐命功封诚意伯，后为胡惟庸毒死。正德中追谥文成。

元季诗都尚辞华，文成独标高格，时欲追逐杜韩，故超然独胜，允为一代之冠。乐府高于古诗，古诗高于近体，五言近体又高于七言。

【走马引】

天冥冥，云蒙蒙，当天白日中贯虹。壮士拔剑出门去，手提仇头掷草中。掷草中，血漉漉，追兵夜至深谷伏。精诚感天天心哀，太一乃遣天马从天来，挥霍雷电扬风埃。

壮士呼，天马驰，横行白昼，吏不敢窥。戴天之耻，自古有必报，天地亦与相扶持。夫差徒能不忘而报越，栖于会稽又纵之。始知壮士独无愧，鲁庄何以为人为！

（钱受之云：明宗被弑于晁忽，又庚申帝即位七年，乃以尚书之言，撤文宗主于太庙。而诏书但以私图传子为言，昧于《春秋》复仇之大义矣。此诗盖深讥之也。）

【梁甫吟】

谁谓秋月明？蔽之往往由纤翳。谁谓江水清，淆之往往随沙。人情旦暮有翻覆，平地倏忽成山溪。君不见桓公相仲父，竖刁终乱齐；秦穆信逢孙，遂违百里奚。赤符天子明见万里外，乃以薏苡为文犀。停婚仆碑何震怒？青天白日生虹。明良际会有如此，而况童角不辨粟与稊。外间皇父中艳妻，马角突兀连牝鸡。以聪为聋狂作圣，颠倒衣裳行蒺藜。屈原《怀沙》子胥弃，魑魅叫啸风凄凄。《梁甫吟》，悲以凄。岐山竹实日稀少，凤凰憔悴将安栖？（拉杂成文，极烦冤聒乱之致，此《离骚》遗音也。）

【懊悢歌】

白鸦养雏时，夜夜啼达曙。如何羽翼成，各自东西去。（其法本之“打起黄莺儿”篇。）

【薤露歌】

人生无百岁，百岁复如何？古来英雄士，各已归山阿！（悲咽）

【玉阶怨】

长门灯下泪，滴作玉阶苔。

年年傍春雨，一上苑墙来。（婉而曲。）

【长门怨】

白露下玉除，风清月如练。

坐看池上萤，飞入昭阳殿。（宗子相云：不作怨语，怨已自深。）

【感怀】

驱车出门去，四顾不见人。回风卷落叶，飒飒带风尘。

平原旷千里，莽莽尽荆榛。繁华能几何，憔悴及兹辰。所以芳桂枝，不争桃李春。云林耿幽独，霜雪空相亲。

槁叶寒撼撼，罗帐秋风生。凄凄候虫鸣，历历宾鸿惊。美人抱琴瑟，仰视河汉明。丝桐岂殊音，古调非今声。

沉思空幽寂，岁月已徂征。结发事远游，逍遥观四方。天地一何阔，山川杳茫茫。众鸟各自飞，乔木空苍凉。

登高见万里，怀古使心伤。伫立望浮云，安得凌风翔！

【旅兴】

寒灯耿幽暮，虫鸣清夜阑。

起行望青天，明月在云端。美人隔千里，山河杳漫漫。玄云翳崇冈，白露凋芳兰。愿以绿绮琴，写作《行路难》。

忧来无和声，弦绝空长叹。倦鸟冀安巢，风林无静柯。路长羽翼短，日暮当如何！登高望四方，但见山与河。

宁知天上雨，去为沧海波。慷慨对长风，坐感玄发皤。弱水不可航，层城岌嵯峨。凄凉华表鹤，太息成悲歌。

【晚同方舟上人登师子岩作】

落日下午峰，轻烟生远林。云霞媚余姿，松柏淡清阴。振策纵幽步，披襟陟层岑。

槿花篱上明，莎鸡草间吟。凉风自西来，飏飏吹我襟。荣华能几时？摇落方自今。逝川无停波，急弦有哀音。

顾瞻望四方，怅焉愁思深。

【夏夜台州城中作】

江上火云蒸热风，欲雨不雨天梦梦。良田半作龟兆坼，秔稻日夕成蒿蓬。

去年海贼杀元帅，黎民星散劫火红。耕牛剥皮作战具，锄犁化尽刀剑锋。农夫有田不得种，白日惨淡衡茅空。将军虎毛深玉帐，野哭不入辕门中。

健儿斗死乌自食，何人幕下矜奇功？今年大军荡淮甸，分命上宰麾元戎。舞干再见有苗格，山川鬼神当效忠。何为旱魃还肆虐，坐令毒沴伤和冲。

传闻逆党尚攻剽，所过丘垄皆成童。阉司恐惧破和议，斥堠悉罢云边烽。杀降共说有太禁，无人更敢弯弧弓。山中悲啼海中笑，蜃气绕日生长虹。

古时东海辟孝妇，草木枯瘁连三冬。六月降霜良有以，天公未必长喑聋。只今幅员广无外，东至日出西太蒙。一民一物吾肺腑，仁者自是哀癯痈。

养梟血凤天所厌，谁能抗疏回宸聪？夜长木末挂河汉，海峤月魄升天东。仰视皇天转北斗，呜呼愁叹何时终！

【太公钓渭图】

璇室群酣夜，璜溪独钓时。浮云看富贵，流水淡须眉。偶应非熊兆，尊为帝者师。轩裳如固有，千载起人思。（通首格高，隐然有王佐气象。）

【古戍】

古戍连山火，新城殷地笳。九州犹虎豹，四海未桑麻。天迴云垂草，江空雪覆沙。

野梅烧不尽，时见两三花。

【望孤山作】

返照千山赤，寒烟一岛青。羈心霜下草，生态水中萍。

黄屋迷襄野，苍梧隔洞庭。空将垂老泪，洒恨到沧溟。

【会稽】

会稽南镇夏王封，蔽日腾空紫翠重。

阴壑烟霞辉草木，古祠风雨出蛟龙。玄夷此日归何处，玉简他年岂再逢？安得普天休战伐，不令竹箭困输供。

【和李子庚】

风落余花春事非，愁心烟雨共霏霏。溪云不为从龙起，山石何须学燕飞。篱下旧存彭泽菊，林间新长首阳薇。夜阑忽漫闻啼鸟，肠断天边信使稀。

【追和音上人】

绝顶浮云锁石关，曲途危磴阻跻攀。他年甲楯孤臣泣，此日斋钟老衲闲。夜永星河低半树，天清猿鹤响空山。

干戈未定归无处，拟结茅庐积翠间。

【感兴】

天弧不解射封狼，战骨从横满路旁。古戍有狐鸣夜月，高冈无凤集朝阳。

琯戈画戟空文物，废井颓垣自雪霜。漫说汉庭思李牧，未闻郎署遣冯唐。

汪广洋

广洋字朝宗，高邮人。洪武中封忠勤伯，拜右丞相。寻贬广东，诏数其罪，自缢死。

【忠勤楼诸老夜直，余时守省，作诗寄之】

西掖延秋爽，高楼倚太清。

玉绳当坐转，银汉近人明。上相思经济，诸公任老成。不知前席夜，曾语及苍生？

【送许时用归越】

旧擢庚寅第，新题甲子篇。老来诸事废，归去此身全。烟树藏溪馆，霜禾被石田。

鉴湖求一曲，吾计尚茫然。（当时有归去而身未全者，宋潜溪是也。）

【登南海驿楼】

海气空蒙日夜浮，山城才雨便成秋。冯唐头白偏多感，倚遍天南百尺楼。

宋濂

濂字景濂，浦江人。元末除翰林编修。明初征聘，授皇太子经，修《元史》。仕至翰林学士承旨。正德中追谥文宪。

【送许时用还剡】

尊酒都门外，孤帆水驿飞。青云诸老尽，白发几人归？风雨鱼羹饭，烟霞鹤氅衣。因君动高兴，予亦梦柴扉。

陶凯

凯字中立，天台人。洪武初召修《元史》，升礼部尚书，出为湖广参政，旋致仕。

【长平戈头歌】

长平野人凿地得古戈，上有疑字岁久俱灭磨。惜不能如丰城古剑射牛斗，吁嗟戈乎奈尔何！但见青铜凝寒暮烟紫，月黑山深夜飞雨。恨血千年犹未消，荒郊夜夜啼冤苦。当年赵括轻秦人，降卒秦坑化为土。嗟哉赵亡秦亦亡，落日长城自今古。摩挲尔戈一问之，令人为尔生愁思。何不以尔为钟鐻，何不以尔为鼎彝？吁嗟戈乎徒尔悲！尔今还当太平世，人间销兵铸农器。愿寿吾皇千万年，终古不用戈与铍。（当时诸名家赋此题者，俱作七言长歌，惟作者得颂扬本朝之体。）

张昱

昱字光弼，庐陵人，迁杭。元末行枢密院判官。明祖召至，深见温接，悯其老，曰：“可闲矣。”放归。

光弼尝于酒间为瞿宗吉诵《歌风台诗》云：“世间快意宁有此，亭长归来作天子？”以界尺击案，渊渊作金石声。诗剧可传，惜中间杂失韵语，因割爱删去。

【白翎雀歌】

乌桓城下白翎雀，雄鸣雌随求饮啄。有时决起天上飞，告诉生来毛羽弱。西河伶人火倪赤，能以丝声代禽臆。

象牙指拨十三弦，宛转繁音哀且急。女真处子舞进觞，团衫鞞带分两傍。玉纤罗袖《柘枝》体，要与雀声相颉颃。朝弹暮弹《白翎雀》，贵人听之以为乐。

变化春光指顾间，万蕊千花动弦索。只今萧条河水边，宫庭毁尽沙依然。伤哉不闻《白翎雀》，但见落日生寒烟。

【感事】

雨过湖楼作晚寒，此心时暂酒边宽。杞人唯恐青天坠，精卫难期碧海干。鸿雁信从天上过，山河影在月中看。洛阳桥上闻鹃处，谁识当时独倚阑。

【如此江山清集同王仲玉、陆进之、吕世臣作】

如此江山，亭名。清集，犹云雅集。吴越江山会此亭，暮春风景昼冥冥。长空孤鸟望中没，落日数峰烟外青。

不用登临生感慨，且凭谈笑慰飘零。

古今何限英雄恨，付与江湖醉客听。（悲壮苍凉，不胜举目山河之异，新亭雪涕，前后同情。）

宋讷

讷字仲敏，滑县人。元季官盐山知县。明初征为国子助教，官至文渊阁大学士，迁祭酒，卒于官。

【壬子秋过故宫】

离宫别馆树森森，秋色荒寒上苑深。

北塞君臣方驻足，中华将帅已离心。

兴隆（笙名，元世祖所制）有管鸾笙歇，劈正（斧名，以玉为之，自殷时流传至元代者。朝会时，一人执之立于陛下，取正人不正之意。）无官玉斧沉。

落日凭高望燕蓟，黄金台上棘如林。万国朝宗拜紫宸，于今谁望属车尘？名闻少室征奇士，驿断高丽进美人。朝会宝灯沉转漏，授时玉历罢班春。

街头野服儒冠老，曾是花砖视草臣。万年海岳作金汤，一望凄然恨自长。禾黍秋风周洛邑，山河残照汉咸阳。上林春去宫花落，金水霜来御柳黄。

虎卫龙墀人不见，戍兵骑马出萧墙。清宁宫殿闭残花，尘世回头换物华。宝鼎百年归汉室，锦帆终古似隋家。后宫銮镜投江渚，北狩龙旗没塞沙。

想见扶苏城上月，照人清泪落悲笳。

张以宁

以宁字志道，古田人。元末官翰林学士承旨。明初例徙南京，召为侍读学士，使安南，道卒。

【峨眉亭】

碧酒双玉瓶，独酌峨眉亭。

不见李太白，唯见三山青。秋色淮上来，苍然满云汀。

安得十五弦，弹与蛟龙听？（“秋色淮上来”二十字，何减太白！）

【送重峰阮子敬南还】

君家重峰下，我家大溪头。君家门前水，我家门前流。

我行久别家，思忆故乡水。况乃故乡人，相见六千里。十年在扬州，五年在京城。不见故乡人，见君难为情。

见君情尚尔，别君奈何许。送君遽不堪，忆君良独苦。君归过江上，为问水中鱼：

别时鱼尾赤，别后今何如？（情致缠绵，神似《饮马长城窟》诗。）

【送同年江学庭弟学文归建昌】

白发江夫子，青云信独稀。故人长北望，令弟又南归。庭树乌先喜，江帆雁共飞。东湖春柳色，到日上君衣。

【过辛稼轩神道】

长啸秋云白石阴，太行天党气萧森。

英雄已尽中原泪，臣主元无北伐心。岁晚《阴符》仙蠹化，夜寒雄剑老龙吟。青山万折东流去，春暮鹃啼宰树林。

【严陵钓台】

故人已乘赤龙去，君独羊裘钓月明。鲁国高名悬宇宙，汉家小吏待公卿。天回御榻星辰动，人去空台山水清。

我欲长竿数千尺，坐来东海看潮生。（明人咏严陵者，以此章为最，如“羞见先生面，黄昏过钓台。”“不有云台诸将力，钓台亦在战争中。”皆风雅之魔道也。方正学古体一章，议论极正，但语近于腐，且废郭后事在征严光以后，于事不合，故舍旃。）

【有感】

马首桓州又懿州，朔风秋冷黑貂裘。可怜吹得头如雪，更上安南万里舟。

魏观

观字杞山，蒲圻人。洪武初就征，历仕至国子祭酒。两知苏州府事。改修府治，为指挥某告讐，寻受御史张度所劾，坐法死。

【都昌怀旧隐】

江雾仍为雨，山花故作容。秋风余鼠雀，寒水落鱼龙。慷慨心虽壮，羁栖力已慵。白云莼浦上，怅望最高峰。

詹同

同字同文，婺源人。元末为郴州路学正。遇乱，家黄州，仕陈友谅，为翰林学士承旨。归附后，授国子博士，累官吏部尚书，改翰林学士承旨。卒谥文宪。

【出猎图】

朔风凛凛吹龙沙，年年马上长为家。阴山大漠百草死，猎遍青海濒天涯。旌旗裂尽霜华湿，万骑貔貅似云集。

苍鹰起若飞电，四尺神獒作人立。什围五攻兵法存，发踪指示知何人？岂无诡遇获禽者，谁能为尔梟鸾分！直将勇气饱所欲，寝虎之皮食虎肉。

生擒山下九青兕，射杀岩前双白鹿。日暮归来雪洗箭，血洒腥风满河曲。穹庐散野如繁星，凉月萧萧照平陆。酪浆跪进玛瑙碗，黄面奚奴眼睛绿。

明朝满马驮斓斑，蕃王喜生红玉颜。焉知祝网三驱意，但醉氍毹紫塞间。君不见暴殄天物焚咸丘，画师之笔学《春秋》。还君此图三太息，使我忽忆比蒲蒐。

高启

启字季迪，长洲人。洪武初召修《元史》，授翰林院国史编修，擢户部侍郎，放还。为魏观作《上梁文》，连坐死。

侍郎诗，上自汉魏盛唐，下至宋元诸家，靡不出入其间，一时推大作手。特才调有余，蹊径未化，故一变元风，未能直追大雅。集中所存，皆最上者。

【塞下曲】

日落五原塞，萧条亭堠空。汉家讨狂虏，籍役满山东。去年出飞狐，今年出云中。

得地不足耕，杀人以为功。登高望衰草，感叹意何穷。（为千古开边者垂戒。）

【悲歌】

征途险巇，人乏马饥。富老不如贫少，美游不如恶归。浮云随风，零乱四野。仰天悲歌，泣数行下。

【顾荣庙】

（晋侍中顾荣先，有墓并祠在长洲之东，久而废为淫祀。县令周君复之，为赋是诗

。)

军司吴国秀，神机夙超朗。弱冠游洛师，已蒙南金赏。崎岖诸王幕，沉湎务遵养。中罹广陵艰，计服匪诚枉。风云一挥扇，义旅臻同响。事成耻言勋，飘然理归鞅。晋社始东迁，群贤悉收奖。道谒真感会，矫翼丹青上。德闻一代称，迹泯千龄往。时屯乏良佐，英谟益堪想。坟祠托荒郊，萧条并榛莽。茆童侵雨隧，淫巫闯尘幌。大夫过停轸，式瞻为含怆。衣冠复故貌，筵几陈新享。寡劣忝乡人，因歌表遐仰。（李舒章云：似谢康乐。）

【支遁庵】

闲登待月岭，远叩栖云关。石室闭千载，高僧犹未还。残灯黄叶下，古座青苔间。不见跏趺影，鹤鸣空此山。

【忆昨行寄吴中故人】

忆昨结交游侠客，意气相倾无促戚。

十年离乱如不知，日费黄金出游剧。狐裘蒙茸欺北风，霹雳应手鸣雕弓。桓王墓下衰草白，仿佛地是辽城东。马行雪中四蹄热，流影欲追飞隼灭。

归来笑学曹景宗，生击黄獐饮其血。皋桥泰娘双翠蛾，唤来尊前为我歌。白日欲没奈愁何！回潭水绿春始波，此中夜游乐更多。月出东山白云里，

照见船中笛声起。惊鸥飞过片片轻，有似梅花落江水。夫差城南天下稀，狂游累日忘却归。座中争起劝我酒，但道饮此毋相违。自从飘零各江海，

故旧如今几人在？荒烟落日野鸟啼，寂寞青山颜亦改。须知少年乐事偏，当饮岂得言无钱？我今齿发虽未老，豪健已觉难如前。去日已去不可止，

来日方来犹可喜。古来达士有名言，

只说人生行乐耳！（跌踢淋漓，神来之候。结处颇近率易，故陈卧子选节去后六句。然终似神气未舒，故仍从原本。）

【明皇秉烛夜游图】

华萼楼头日初堕，紫衣催上宫门锁。大家今夕宴西园，高爇银盘百枝火。海棠欲睡不得成，红妆照见殊分明。满庭紫焰作春雾，不知有月空中行。

新谱《霓裳》试初按，内使频呼烧烛换。知更宫女报铜签，歌舞休催夜方半。共言醉饮终此宵，明日且免群臣朝。只愁风露渐欲冷，妃子衣薄愁成娇。

琵琶羯鼓相追逐，白日君心欢不足。此时何暇化光明，去照逃亡小家屋。姑苏台上长夜歌，江都宫里飞萤多。一般行乐未知极，烽火忽至将如何？

可怜蜀道归来客，南内凄凉头尽白。

孤灯不照返魂人，梧桐夜雨秋萧瑟。（“光明烛”二语，活用聂夷中《田家诗》意，与题中“秉烛”相应，巧而不纤。）

【赠金华隐者】

我闻名山洞府三十六，一一灵踪纪真篆。金华秀出向东南，远胜阳明与句曲。楼台缥缈开烟霞，天地赐与神仙家。灵源有路不可入，但见几片流出云中花。

子房之师赤松子，三千年前亦居此。飞行恍惚谁解寻，漫说至今犹不死。松花酒熟何处游，瑶草自绿春岩幽。群羊卧地散如石，老鹿耕田驯似牛。

闻有隐君子，乃是学仙者。自从入山中，不曾到山下。世人莫知其姓名，以山呼之不敢轻。樵夫忽见苦未识，只疑便是黄初平。

嗟我何为在尘网，远望高峰若天壤。

茯苓夜煮悦许餐，铁杖来敲石门响。（松花、瑶草一联，太白佳境。）

【听教坊旧妓郭芳卿弟子陈氏歌（时至正己亥岁作）】

文皇（元文宗）在御升平日，上苑宸游驾频出。

仗中乐部五千人，能唱新声谁第一？燕国佳人号顺时（郭芳卿字），姿容歌舞总能奇。中官奉旨时宣唤，立马门前催画眉。建章宫里长生殿，芍药初开敕张宴。

龙笙罢奏凤弦停，共听娇喉似莺啭。遏云妙响发朱唇，不数开元许永新。绣陛花惊飘艳雪，文梁风动委芳尘。翰林才子山东李（洞），每进新词蒙上喜。

当筵按罢谢天恩，捧赐缠头蜀都绮。晚出银台酒未销，侯家主第强相邀。宝钗珠袖尊前赏，占断春风夜复朝。回头乐事浮云改，瘞玉埋香今几载？

世间遗谱竟谁传，弟子犹怜一人在。曾记《霓裳》学得成，朝元阁里艺初呈。九天声落千人听，丹凤楼前月正明。狭邪贵客丛车马，不信芳名在师下。

风尘一旦禁城荒，谁是花前听歌者！从此飘零出教坊，远辞京国客殊方。闭门春尽无人问，缟袂青裙不理妆。相逢为把双蛾蹙，《水调》《梁州》歌续续。

江南年少未曾闻，原是当时供奉曲。朝使今年海上归，繁华休说乱来非。梨园散尽宫槐落，天子愁多内宴稀。始知欢乐生忧患，韩休老去无人谏。

伤心不见昔人歌，汾水秋风有飞雁。此日西园把一卮，感时怀旧尽成悲。

含情欲为秋娘赋，愧我才非杜牧之。（与少陵《观公孙大娘弟子舞剑器歌》同一用意，盖惓惓故国之思，意不在教坊弟子也。而诗格则在元和、长庆之间。）

【登金陵雨花台望大江】

大江来从万山中，山势尽与江流东。钟山如龙独西上，欲破巨浪乘长风。江山相雄不相让，形胜争夸天下壮。

秦皇空此瘞黄金，佳气葱葱至今王。我怀郁塞何由开，酒酣走上城南台。坐觉苍茫万古意，远自荒烟落日之中来。石头城下涛声怒，武骑千群谁敢渡！

黄旗入洛竟何祥？铁锁横江未为固。前三国，后六朝，草生宫阙何萧萧？英雄来时务割据，几度战血流寒潮。我今幸逢圣人起南国，祸乱初平事休息。

从今四海永为家，不用长江限南北。

【张中丞庙】

延秋门上乌啼霜，羯儿晓登天子床。江头老臣泪暗滴，万乘西去关山长。

公卿相率作降虏，草间拜泣如群羊。当时不识颜平原，岂复知有张睢阳？孤城落日百战后，瘦马食尾人裹疮。男儿竟为忠义死，碧血满地嗟谁藏。

贺兰不斩上方剑，英雄有恨何时忘。千年海上见祠庙，古苔丛木秋风荒。摩挲画壁尘网里，勇气晬晬虬髯张。巫歌《大招》客酹酒，忠魂或能来故乡。

【唐昭宗赐钱武肃王铁券歌】

妖儿初下含元殿，天子仍居少阳院。诸藩从此拥连城，朝贡皆停事攻战。岐王一去梁王来，长安宫阙生蒿莱。

天目山前异人出，金戈双举风烟开。罗平恶鸟啼初起，犀弩三千射潮水。归来父老拜旌旗，酾酒撻牛宴乡里。击裘骏马骄春风，锦袍玉带真英雄。

诏书特赐誓终始，黄金缕字旌殊功。虎符龙节彤弓矢，后嗣犹令赦三死。尽言恩宠冠当时，天府丹书未逾此。摩娑旧物四百年，古色满面凝苍烟。

天祐宰相署名在，寻文再读心茫然。古来保族须忠节，受此几人还覆灭。王家勋业至今传，不在区区一方铁。人生富贵知几时，泰山作砺徒相期。

行人曾过表忠观，风雨断藓蕞残碑。

【送谢恭】

凉风起江海，万树尽秋声。摇落岂堪别，踟躇空复情。

帆过京口渡，砧响石头城。为客归宜早，高堂白发生。

【与刘将军杜文学晚登西城】

木落悲南国，城高见北辰。

飘零犹有客，经济岂无人？鸟过风生翼，龙归雨在鳞。相期俱努力，天地正烽尘。（悲壮。）

【晚次西陵馆】

匹马倦嘶风，萧萧逐转蓬。地经兵乱后，岁尽客愁中。晚渡回潮急，寒山旧驿空。可怜今夜月，相照宿江东。

【送沈左司从汪参政分省陕西汪由御史中丞出】

重臣分陕去台端，宾从威仪尽汉官。四塞河山归版籍，百年父老见衣冠。函关月落听鸡度，华岳云开立马看。

知尔西行定回首，如今江左是长安。（音节气味，格律词华，无不入妙。《青邱集》中为金和玉节。）

【送叶判官赴高唐时使安南还】

桐柱崖前使节过，贡随归骑入京多。

一官暂遣陪成晋，片语曾烦下赵佗。晓拜赐衣辞绛阙，秋催征棹渡黄河。

政余好赋登临咏，闻说州人最善歌。（南阳太守成晋任功曹岑至，时谣曰：“南阳太守岑公孝，弘农成晋但坐啸。”三语切判官，四语切使安南还也。如此运古，乃见典切。一结切高唐。）

【送李使君镇海昌（州有双庙）】

海风千里卷双旌，按辔初闻属部清。人杂岛夷争午市，潮随山雨入秋城。鸣狐不近睢阳庙，突骑犹屯广利营。

肯扫帐中容我醉，夜深燃烛卧谈兵。

【清明呈馆中诸公】

新烟著柳禁垣斜，杏酪分香俗共夸。白下有山皆绕郭，清明无客不思家。

卞侯墓上迷芳草，卢女门前映落花。喜得故人同待诏，拟沽春酒醉京华。

【吊岳王墓】

大树无枝向北风，十年遗恨泣英雄。

班师诏已来三殿，射虏书犹说两宫。每忆上方谁请剑，空嗟高庙自藏弓。栖霞岭上今回首，不见诸陵白露中。

（凤洲作英气勃发，读此和平温厚之篇，又爽然失矣。通体责备高宗，居然史笔。诸本作“千年遗恨”。应以“十年”为典。）

【凉州曲】

关外垂杨早换秋，行人落日旆悠悠。陇山高处愁西望，只有黄河入汉流。（高浑。）

【秋柳】

欲挽长条已不堪，都门无复旧毵毵。

此时愁杀桓司马，暮雨秋风满汉南。

杨基

基字孟载，其先蜀人，居于吴。用荐入官，仕至山西按察使。被谗，夺职供役，卒于工所。

孟载《春草》诗云：“六朝旧恨斜阳里，南浦新愁细雨中。”诚为佳句，然大概近纤。他如“春风颠似唐张旭，天气和如鲁展禽”、“白鹭下田千点雪，黄莺上树一枝花”，殊乖大雅矣。集中收七言律二章，风格颇上。

【感怀】

鞬鹰敛六翮，栖息如鷕鷕。秋风飒然至，耸目思凌霄。英雄在承平，白首为渔樵。

匪无搏击能，不与狐兔遭。长星亘东南，壮士拭宝刀。落落丈夫志，悠悠儿女曹。邓禹南阳来，仗策归光武。

孔明卧隆中，不即事先主。英雄各有见，何必问出处？孙曹与更始，未可同日语。向非昭烈贤，三顾犹未许。

君子当识时，守身如处女。

【闻邻船吹笛】

江空月寒露华白，何人船头夜吹笛？参差楚调转吴音，定是江南远行客。

江南万里不归家，笛里分明说鬓华。已分折残堤上柳，莫叫吹落陇头花。

【登岳阳楼望君山】

洞庭无烟晚风定，春水平铺如练净。

君山一点望中青，湘女梳头对明镜。镜里芙蓉夜不收，水光山色两悠悠。直教流下春江去，消得巴陵万古愁。

【长江万里图】

我家岷山更西住，正见岷江发源处。三巴春霁雪初消，百折千回向东去。江水东流万里长，人今漂泊尚他乡。

烟波草色时牵恨，风雨猿声欲断肠。（七言短古，原本李颀、常建诸公。）

【岳阳楼】

春色醉巴陵，阑干落洞庭。

水吞三楚白，山接九疑青。空阔鱼龙气，婵娟帝子灵。

何人夜吹笛，风急雨冥冥。（应推五言射雕手，起结犹入神境。）

【送魏万之安西】

梁苑微霜木叶红，行人此日发关东。酒边怨别看长剑，马上惊心见断蓬。云散岳莲开泰华，月寒郊树隐新丰。穷秋亦有临边使，待尔题诗寄塞鸿。

【感秋】

裊裊西风吹逝波，冥冥灏气逼星河。宣王石鼓青苔涩，武帝金盘白露多。八阵云开屯虎豹，三江潮落见鼉鼉。

沅湘一带皆秋草，欲采芙蓉奈晚何！

卷二

张羽

羽字来仪，浔阳人，因兵阻居吴兴。明初征起，擢太常司丞兼翰林院，同掌文渊阁事。以事窜岭外，未半道召还，知不免，投龙江死。

【金川门】

两山夹沧江，拍浮若无根。利石侔剑戟，风涛相吐吞。维天设巨险，为今国东门。试将一卒守，坚若万马屯。吾来犯清晓，天空霜露繁。列宿森在列，北斗峭可援。江光合海气，溟滓神攸存。俯视不敢唾，中有蛟龙蟠。浮屠者谁子？高居凌风幡。下见渡口人，扰扰蜂蚁喧。愧彼超世士，去去将何言！（李辰山云：“诗作于洪武甲寅，未三十载而燕师从此入矣。读之可胜浩叹。”）

【秋日苕溪道中】

深秋群物肃，灏气明朝阳。方舟荡清溪，良游阅景光。疏林缀余绿，菰蒲摇晚芳。鸣鸿去杳杳，遥岭翳苍苍。闲行无物役，洄沿自徜徉。寂寞欣有得，留连岂为荒？一理《沧浪》调，知音非所望。

【清口】

豁达两河口，前与黄河通。高岸忽斗折，清淮汇其中。甘罗城在南，韩信城在东。一为秦人英，一为汉家雄。人生有不死？所贵在立功。方其未遇时，鹿鹿常人同。时命苟未会，丈夫有固穷。舍舟登高防，岁暮百草空。陂陀陇亩间，一二羸老翁。遗迹不可问，但见荒榛丛。行行重回首，目断双飞鸿。

【赠僧还日本】

杖锡总随缘，乡山在日边。遍参东土法，顿悟上乘禅。咒水龙归钵，翻经浪避船。本来无去住，相别莫潸然。

【题陶处士像】

五儿长大翟卿贤，彭泽归来只醉眠。篱下黄花门外柳，风光不似义熙前。

徐贲

賁字幼文，其先蜀人，徙居吴。洪武初以荐授官，历仕至河南布政使。寻下狱死。

【过荷叶浦】

粼粼水溶春，淡淡烟销午。

不见唱歌人，空来荷叶浦。无处寄相思，停舟采芳杜。

【柳短短送陈舜道】

柳短短，春江满。兰渚雪融香，东风酿春暖。山长水更遥，浩荡木兰桡。兰桡向何处？送君南昌去，离愁落日烟中树。

【送曾伯滋赴西河将幕】

上将初分阃，儒官解习兵。风旗春猎野，雪帐夜归营。洮水从岷下，祁山入隍平。知公能载笔，草檄报边声。

林弼

弼字元凯，龙溪人。仕元为漳州府知事。明初与修礼、乐书，除礼部主事。历登州知府。

【秦皇庙】

蚕食雄风逐逝波，荒祠寂寂寄岩阿。

三神山下仙舟远，万里城边战骨多。东鲁尚存周礼乐，西秦空壮汉山河。

早知二世无多祚，崖石书功不用磨。（结意与李义山“地下若逢陈后主，岂宜重问《后庭花》”同是一种讽刺。）

王蒙

蒙字叔明，吴兴人。元末官理问。洪武初为泰安知州，坐胡党狱死。

【暮宿田家作】

木落天正寒，山空日将暮。荒林倦鸟归，乱水行人渡。

穷年滞草莽，短褐被霜露。晚宿依田家，主人情亦故。汲水泉满涧，烧竹烟在户。钟残溪上村，月照阶前树。

浊酒初泼醅，嘉蔬亦时具。且慰饥渴怀，况谙村野趣。老翁八十余，有子没征戍。杭稻岁莫收，官司日加赋。

我愿息兵戈，海宇重农务。愧乏经济才，徒然守章句。

张简

简字仲简，吴人。初为道士，元季兵乱，以母老归养。洪武初召修《元史》。

饶介之分守吴中，自号醉樵。延诸文士作歌，仲简诗擅场，居首坐。高季迪次之，杨孟载又次之。

【醉樵歌】

东吴市中逢醉樵，铁冠欹侧发飘萧。

两肩砭砭何所负？青松一枝悬酒瓢。自言华盖峰头住，足迹踏遍人间路。学剑学书总不成，惟有饮酒得真趣。管乐本是王霸才，松乔自有烟霞具。

手持昆岗白玉斧，曾向月里斫桂树。月里仙人不我嗔，特令下饮洞庭春。兴来一吸海水尽，却把珊瑚樵作薪。醒时邂逅逢王质，石上看棋黄鹄立。

斧柯烂尽不成仙，不如一醉三千日。于今老去名空在，处处题诗偿酒债。淋漓醉墨落人间，夜夜风雷起光怪。

王彝

彝字常宗，嘉定人。以布衣召修《元史》入翰林。后坐太守魏观事，坐法死。

【秋林高士图】

岚峰半残阳，彩翠明林杪。僧坞远钟微，归人下山少。风杉落叶响，惊起栖烟鸟。携手愿言还，前村月初皎。

刘炳炳字彦昂，以字行，鄱阳人。明初献书，任中书典签。

【春夕值左掖怀周侍御】

晚雨池上晴，逶迤淡将夕。金茎华月生，绮树流云湿。窗虚漏声永，幔卷炉烟袭。
忆我同袍人，何繇共瑶席！（杨廉夫云：“仿韦。”）

【寄许永明公冕昆季得夫先生】

与君往岁从戎日，正值中原战血腥。诸葛有心扶汉室，包胥无泪哭秦庭。
九鳌夜徙龙沙黑，八骏秋迷鸟道青。一别关河俱白首，断肠烟树满长汀。

【同周伯宁连榻剧谈悲歌有感】

醉来拔剑斫珊瑚，回首侯门是畏途。

夜半闻鸡眠不著，草堂秋雨读《阴符》。

郭翼翼字羲仲，自号东郭生，昆山人。明初征授学官。

【城南草堂与顾仲瑛夜话】

花发草堂风雨春，青灯剪韭话情亲。乱离隔世今何夕，生死论交竟几人？城郭是非
华表鹤，蓬莱清浅海中尘。三千宾客冯在，莫怪悲歌抚剑频。

袁凯字景文，华亭人。洪武中征拜御史，以病免归。

李献吉谓：“海叟师法子美。”何仲默谓：“歌行得杜之体。”鄙意伤于平直，未
极变化。若七言断句，在李庶子、刘宾客间，青邱、孟载俱未及也。

【杨白花】

杨白花，飞入深宫里。宛转房栊间，谁能复禁尔？胡为高飞渡江水？江水在天涯，
杨花去不归。安得杨花作杨树，种向深宫飞不去！

【客中除夕】

今夕为何夕？他乡说故乡。看人儿女大，为客岁年长。戎马无休歇，关山正渺茫。
一杯柏叶酒，未敌泪千行。

【京师得家书】

江水三千里，家书十五行。行行无别语，只道早还乡。（天籁。）

【客中夜坐】

落叶萧萧江水长，故园归路更茫茫。一声新燕三更雨，何处行人不断肠！

【淮东逢张十二信】

少年追逐共西东，吴迈文章马亮弓。

一自干戈零落后，白头淮海独相逢。（不减“白首何戡”之作。）

【扬州逢李十二衍】

与子相逢俱少年，东吴城郭酒如川。如今白发知多少？风雨扬州共被眠。

【题李陵泣别图】

上林木落雁南飞，万里萧条使节归。

犹有交情两行泪，西风吹上汉臣衣。（王元美云：“颇见风雅”。词婉意严，李陵之罪自见。“汉臣”二字，《春秋》之笔。）

【淮西夜坐】

萧萧风雨满关河，酒尽西楼听雁过。

莫怪行人头尽白，异乡秋色不胜多！（吴明卿云：“悲惋欲涕”。）

周致尧致尧字焕文，崇德人。平江书院山长。

【西津夜泊】

孤帆夜落石桥西，桥外青山入会稽。卧听海潮吹地转，起看江月向人低。一春衰谢怜皮骨，万国艰难厌鼓鼙。何处商船歌《水调》？令人归思益凄迷。

刘崧崧字子高，泰和人。明初以人材举，历仕至国子司业。子高诗辞采鲜媚，骨格

未高，应是学温飞卿一派。

【姑苏曲】

姑苏城头乌夜啼，姑苏台上风凄凄。芙蓉露冷秋香死，美人夜泣双蛾低。铜龙咽寒更漏促，手拨繁弦转红玉。鸳鸯飞去屣廊空，犹唱吴宫旧时曲。

【题余仲扬画山水图为余自安赋】

金华山人余仲扬，笔墨萧疏开老苍。昨看新图湖上宅，烟雾白日升高堂。层峰上蟠石皓皓，绝岛下瞰江茫茫。长松并立各千丈，间以灌木相低昂。松下上人坐碧草，秋影忽落衣巾凉。囊琴未发弦未奏，已觉流水声洋洋。赤城霞气通雁荡，巫峡雨色来潇湘。谁能千里坐致此？欲往久叹河无梁。风尘涨天满吴楚，六年怅望神惨伤。玄猿苦啼岩北树，白雁不到江南乡。赭山焚林绝人迹，如此山水非寻常。此图本为自安写，亦感同姓悲殊方。幽轩素壁泉声动，对此令我心为狂。何由扪萝逐麋鹿，振衣直上云中冈。登临一写漂泊恨，长啸清风生八荒。

【玉华山】

翠巘千峰合，丹崖一径通。楼台上云气，草木动天风。野旷行人外，江平落雁中。

伤心俯城郭，烟雨正冥蒙。

周浚字伯宁，江宁人。明初任饶州长史，历仕至刑部尚书。

【舟中望九华山】

贞履无素期，劳生意恒窘。谁云戒戎路，曾是返初隐。水宿淹长晷，山行阻修畛。缥缈对雄标，巘岼发奇蕴。

岩回气如焚，峰去势犹引。刻削冠青莲，雕镂矗丹笋。甚霞上斑剥，石乳下礧礧。山鬼从文狸，渊灵玄蜃。

眷言志藜藿，未遂采芝菌。即事情已悲，怀贤迹俱泯。潜吴愧梅福，去汶羞闵损。人德险未夷，天道明可准。

皋兰岂徒歇？岩桂芳未陨。岁暮山中人，寤歌候归轸。（善学谢公，“岩回”十字犹佳。）

王旬字子宣，里居未详。

【宫词】

南风吹断《采菱歌》，夜雨新添太液波。水殿云房三十六，不知何处月明多。（高廷礼云：“婉丽似王龙标。”）

周立立字公礼，长洲人。

【行经华阴】

西游莫叹劳行役，风物繁华记往年。十里关河临渭水，万家烟树入秦川。露盘台迥金为掌，华岳峰高石作莲。闻道盛时多宴乐，更传车马幸温泉。

林鸿

鸿字子羽，福清人。明初以荐授将乐训导，后拜礼部员外郎。

闽中诗派以子羽为首，宗法唐人，绳趋尺步，众论以唐临晋帖少之。然终是正派。

【感秋】

抚剑中夜起，气候何凄清！天高白露下，北斗当前楹。嗷嗷双飞鸿，随阳亦宵征。微禽尔何知？寒暑婴其情。始知玩物化，中复念吾生。三十志有立，一经尚无成。缅怀古哲人，信与大运并。道在无始终，时来暂衰荣。感叹不能寐，延首东方明。

【饮酒】

儒生好奇古，出口谈唐虞。倘生羲皇前，所谈竟何如？古人既已死，古道存遗书。

一语不能践，万卷徒空虚。我愿但饮酒，不复知其余。君看醉乡人，乃在天地初。

【金鸡岩僧室】

远公青莲宇，百尺构云阙。一径入松萝，山泉濯苔发。石房弹玉琴，清响在林樾。夜来沧海寒，梦绕波上月。

微吟《白云篇》，高兴了未辍。

无能悟声闻，安得离言说！（“夜来沧海寒”十字，得常建神理。）

【无诸钓龙台怀古】

无诸昔建国，赤土疏王封。筑台青冥上，垂钓沧江龙。

乘龙去不返，千载如飞蓬。只今荒台上，寂历多遗踪。我有太古怀，来吟江上峰。天青海气灭，地古寒烟浓。

潭水绿万丈，秋岑碧千重。登临未能已，落日催霜钟。

【同郑二宣江上泛舟】

载酒入江色，酒多江复长。

酣来散予缨，濯向春流香。东壁过疏雨，西崦残夕阳。猿禽相叫啸，云水共清苍。夕景更泛览，客程殊未央。

鱼风苇上起，蚌月波中光。尝以事泮涣，永期名迹忘。乘槎予岂必？聊复咏《沧浪》。

【巫峡啼猿歌送邱少府归四明】

巫山巫峡连三巴，猿啼三声客思家。停舟听之声未了，却过青枝犹袅袅。野人乍来锦官城，清秋满峡啼猿声。黄牛滩上怨枫落，白帝祠前哀月明。

商声清冽羽声乱，倏忽东崖复西涧。久客闻之泪欲干，壮夫听此魂亦断。故人归卧越山云，忆得啼猿歌送君。扁舟独宿剡溪夜，叫月三声谁共闻？

【出塞曲】

十五蓟门行，能探黠虏情。潜兵秋度碛，牧马夜归营。苦雾沈旗影，飞霜湿鼓声。

昨来承密诏，东筑受降城。

【送高郎中使北】

汉使临边日，天骄已请和。看花辞紫陌，犯雪渡交河。水草留行帐，云沙想玉珂。从来清漠北，娄敬策居多。（讽刺得唐人体。）

【寄逸人高漫士】

独倚城南百尺阑，粤乡秋思浩漫漫。平台树色催残照，近郭砧声报早寒。云物正当摇落后，关河终念别离难。龙门别墅今宵月，谁与相同把酒看？

贝琼字廷琚，崇德人。洪武初征修《元史》，除国子助教。

【穆陵行】

（至元中，西僧杨琏真伽，利宋诸陵宝玉，因倡妖言惑主，尽发攒宫之在会稽者，断理宗顶骨为饮器，琏败，归内府，九十年矣。洪武二年正月，诏宣国公求之，得于僧汝讷所，乃命葬金陵聚宝山，石以表之。余感而赋诗。）

六陵草没迷东西，冬青花落陵上泥。黑龙断首作饮器，风雨空山魂夜啼。当时直恐金棺腐，凿石通泉下深锢。一声白雁度江来，宝气竟逐妖僧去。

金屋犹思宫女侍，玉衣无复祠官护。可怜持比月氏王，宁饲乌鸢及狐兔！真人见起江东，铁马九月逾崆峒。百年枯骨却南返，雨花台下开幽宫。

流萤夜飞石虎殿，江头白塔今可见。

人间万事安可知？杜宇声中泪如霰。（“白雁”字音似“伯颜”，见当时童谣。）

【经故内】

山中玉殿尽苍苔，天子蒙尘岂复回？

地脉不从沧海断，潮声犹上浙东来。百年禁树知谁惜？三月宫花尚自开。此日登临解题赋，白头庾信不胜哀。

【送杨九思赴广西都尉经历】

邛笮康居路尽通，西南开镇两江雄。汉家大将推杨仆，蛮府参军见郝隆。象迹满山云气白，鸡声千户日车红。

明珠薏苡无人辨，行李归来莫厌穷。（即“此乡多宝玉，慎勿厌清贫”。工于脱化。）

【送王克让员外赴陕西】

貂裘万里独冲寒，旧是含香汉署官。

白雪作花人面落，青山如凤马头看。关中相国资王猛，海内苍生望谢安。应念东南有遗佚，采芝深谷尚盘桓。

【爰山隐居夏日】

病客从教懒出村，两山一月雨昏昏。野花作雪都辞树，溪水如云欲到门。无复元戎喧鼓吹，试从田父牧鸡豚。来青处士时相过，犹是平原旧子孙。

凌雲翰（雲翰字彦翀，钱塘人。洪武初以荐授四川成都教授。）

【关山雪霁图】

前峰后峰雪模糊，东村西村春有无。快雪时晴入佳想，况复见此关山图。关山迢递相联属，玉洁珠光眩人目。扶桑飞上金毕逋，暗水流澌渡空谷。野桥行过路三叉，青旗插檐沽酒家。驱驴倦客得少憩，怅望远道还咨嗟。诗翁好事常起早，天寒只恐梅花老。柴门时有故人来，阶下白云须用扫。此图一日落法寰，笔法依稀荆与关。人生远游固云乐，何似在家长看山。我本识字耕夫耳，占祥便作丰年喜。田园归隐会有时，麦饭饱餐茅屋底。

邱民民字克庄，扬州人。洪武初为松江学官，仕至礼部侍郎。

【送友人至杭】

又随南雁度钱塘，不道他乡是故乡。江上秋风莼菜美，山中春雨石田荒。杜陵老去宁忘蜀，江总归来不是梁。欲采芙蓉赠君去，锦衣零落倍凄凉。

练高

高字伯上，新淦人。洪武中知起居注，以直言忤旨，外谪广德州同知。

【送赵将军】

崆峒一剑倚秋阴，谁识将军百战心？老去功名余白发，闲来歌舞散黄金。

呼鹰大泽风竿劲，射虎南山雪羽深。敲缺唾壶银烛短，时人不解《陇头吟》。

管讷字时敏，华亭人。洪武中征拜楚府纪善，升左长史。

【和陆伴读闯过梅根】

江行惬素怀，遐览匪游冶。开蓬望九华，隐隐白云下。素波明远川，青天入平野。烟树淡欲无，风泉断还泻。因知渚陂舟，差胜习池马。斯游乐未央，我辈胡为者？

张宣

宣字藻仲，江阴人。洪武初召修《元史》，擢翰林编修，既而谪濠，道卒。

【感邻妇】

日月光八表，焉能照覆盆？可怜东家妇，哀声时一吞。将军岂不仁？养士亦有恩。失计缘数奇，车徒散云屯。宁知边头骨，尽是忠义魂？妾今止一身，又无子与孙。妇人不下堂，宁上他人门？死者已如此，何以慰生存？（贞节语好在斩绝，与“波澜誓不起，妾收井中水”一例。）

鲁渊

渊字道原，淳安人。元进士。明初征修礼、乐书，授江西接察司佥事，以病辞。

【重九】

白雁南飞天欲霜，萧萧风雨又重阳。已知建德非吾土，还忆并州是故乡。蓬鬓转添今日白，菊花犹似去年黄。登高莫上龙山路，极目中原草木荒。

李延兴

延兴字继本，东安人。元进士。洪武初属典邑校。

【丙申岁咏怀】

白首殊方客，奔驰戎马间。时危忧母老，岁晚寄书还。

冻雪连荒野，寒云出乱山。苍茫西日外，痛哭倚柴关。辛苦怜吾弟，荒山久避兵。素书连月断，白发满头生。

雪翳窗灯影，风沉戍鼓声。寸心忧百结，寂寞度残更。妻子何时见？凄凉病转侵。虚传千里信，已负百年心。

茅屋飞霜满，空阶落叶深。

白头吟正苦，回首泪沾襟。（得杜诗气体，但浑厚沉郁处未到。）

【读贾谊、王粲传】

白发悲王粲，青春美贾生。万言词慷慨，一赋气峥嵘。

吊屈心犹壮，依刘恨未平。怀贤坐长夜，耿耿若为情。

孙蕡蕡字仲衍，南海人。洪武中授苏州府经历，坐党祸死。

【送翰林典籍张敏行之官西上】

敦煌城下沙如雪，敦煌城头无六月。关西劲卒筑防秋，捷书夜半飞龙楼。九重下诏征貔虎，推毂上将开都府。黄旗卷日大军行，旄头化石夜有声。敦煌迢迢五千里，十月即渡黄河水。上将翩翩才且雄，平戎不数贰师功。叱宅犹在轮台北，匹马已入渠黎国。左校偏裨晚射雕，倚鞍醉索单于朝。西山黑风吹堕瓦，霜角吹秋塞垣下。太平今见远宣威，君往从戎几日归？幕下文儒能耀武，词林从此有光辉。（善学嘉州。）

【次归州】

归州城门半天里，白云晚向城下起。市廛架屋依岩峦，妇女提甕汲江水。巴山雪消江水长，城中夜闻滩濑响。

客船树杪钩石棱，渔父云端晒罾网。家家荒田山下犁，倒枯大树烧作泥。居人养犬获山鹿，稚子缚柴圈野鸡。楚王台高对赤甲，四时猛气长飒飒。

柁工鸣板避漩涡，橹声摇上黄牛峡。

【下瞿塘】

我从前月来西州，锦官城下十日留。回船正值重九节，巫山巫峡风飏飏。

人言滟滪大于马，瞿塘此时不可下。公家王事有程期，敢惮微躯作人鲊？人鲊瓮头翻白波，怒流触石为漩涡。长年敲板助船客，破浪一掷如飞梭。

滩声橹声历乱聒，紧摇手滑橹易脱。沿洄划转如旋风，半侧船头水花没。船头半没

船尾高，水花作雨飞鬓毛。争牵百丈上崖谷，两帝捷走如猿猱。

停船把酒酌苍昊，因笑吾生真草草。吟诗未解追谪仙，万里经行蜀中道。巴东东下想安流，便指归州向峡州。船到岳阳应渐稳，洞庭霜降水如油。

【湖州乐】

湖州溪水穿城郭，傍水人家起楼阁。春风垂柳绿轩窗，细雨飞花湿帘幕。四月五月南风来，当门处处芰荷开。

吴姬画舫小于斛，荡桨出城沿月回。菰蒲浪深迷白纻，有时隔花闻笑语。鲤鱼风起燕飞斜，菱歌声入鸳鸯渚。

黄哲

哲字庸之，番禺人。明初用荐拜翰林待制，出授东平府通判。坐法死。

【过梁昭明太子墓】

帝子降南浦，飘摇苍桂阴。神飙回震阙，玄迹坤岑。凤陵辉璞蕴，龙沼媚珠沉。文藻绚华猷，芳芬扬素襟。遗编轶正雅，旷代殊徽音。玉马风云变，金帛岁月深。霜兰秋被坂，烟萝夕翳林。采蘋思永荐，捐玦遂幽寻。灵修忽尔逝，岁晏劳予心。辽东鹤驭远，缙岭鸾笙吟。眇眇因怀昔，营营徒慨今。瑶华竟衰歇，惆怅雍门琴。（过昭明墓诗，应作选体。）

【秋夜杂兴呈涂典签颖】

璇杓运西宇，华月丽中楹。坐知流序易，遥夜秋风生。银汉呈霄景，金堂含夕清。柔条栖湛露，嘉蕙茁幽茎。抚迹遂成感，如何君远征。相思云阳浦，峩峩限玉京。寸心渺何极，摇荡如悬旌。

沈梦麟

梦麟字元昭，归安人。元末为武康尹。入明，以贤良征起，校文闽、浙者三，同考会试者再。

【和邵山人】

乱后还家如旅泊，愁中貰酒喜人过。

每吟栗里《停云》句，不作南山种豆歌。故宅东风归燕静，孤村夜雨落花多。白头却忆观光日，曾赋神明与馥娑。（晚唐风韵。）

滕毅

毅字仲弘，镇江人。以儒士征，授起居注，擢吏部尚书，出参政江西。

【感事】

虎战龙争二十秋，江波日夜自东流。道傍无语王孙泣，天际含颦帝子愁。

苜蓿风烟空壁垒，蒹葭霜露满汀洲。

多情惟有西山月，永夜依依照白头。（故国之思，如闻《黍离》、《麦秀》，比宋文恪《过故宫》作风神较胜。）

蓝仁

仁字静之，崇安人。明初内附，例徙临濠，寻放还。

【暮归山中】

暮归山已昏，濯足月在涧。衡门栖鹊定，暗树流萤乱。

妻孥候我至，明灯共蔬饭。伫立松桂凉，疏星隔河汉。

【宿橘山田家怀蒋先生】

苍峰落日微，白鹤秋风远。

客路入疏钟，田家背山坂。孤烟桑柘寒，归鸟茅茨晚。欲觅紫芝翁，山深白云满。

【西山暮归】

凉叶坠微风，秋山正萧爽。天寒独鸟归，日夕百虫响。偶从桂树招，遂有桃源想。石磴阒无人，山猿自来往。

蓝智智字明之，崇安人。明初应荐，授广西按察僉事。

【雨中同孟原金宪登嘉鱼亭】

高阁流莺外，荒城驻马前。江寒三月雨，春老百蛮天。折柳悲横笛，飞花落钓船。
乾坤总羁旅，把酒意茫然。

【过云洞岭】

路出千林迴，山连五岭遥。石崖悬度栈，野树卧通桥。
涧饮犹防蛊，畚耕尽属獠。夕阳驱瘦马，鬓影漫萧萧。
甘瑾瑾字彦初，临川人。明初严州府同知。

【何梅阁山居】

迹不到城市，逢人无厚颜。一瓢风外树，双屐雨中山。流水春喧碓，归云暮掩关。
无心经世务，为益鬓毛斑。

【寄马彦会】

百战孤城血未干，故人书札报平安。秋风代马思燕草，夜月湘歌怨澧兰。
万里江湖仍旅食，百年天地自儒冠。山阴更有诛茅地，仗剑休辞行路难。

王偁

偁字孟扬，闽中人。洪武庚午举人，永乐初荐授国史院检讨，参英国公张辅军事。
后坐解缙党，下狱死。

【宿巴陵闻笛】

玉笛凌秋韵远汀，空江皓月思冥冥。

怪来杨柳移关塞，可是梅花落洞庭？半夜旅魂随调切，谁家少妇倚楼听？晓来更觅
龙吟处，一点君山水面青。

浦源

源字长源，无锡人。洪武中晋王府引礼舍人。

舍人名句如“细雨疏灯闻落叶，断云高树见明河”，“衣上暮寒吴苑雨，马头秋色晋陵山”，“雨中黄叶孤村路，湖上青山远寺钟”，“杏花寒食春江店，榕叶熏风瘴海船”，均是诗中有画。

【送人之荆门】

长江风飏布帆轻，西入荆门感客情。三国已亡遗旧垒，几家犹在住荒城。云边路绕巴山色，树里河流汉水声。

此去郢中应有赋，千秋白雪待君赓。

吴文泰字文泰字文度，吴县人。洪武中涿州同知。

【送人之巴蜀】

烟波迢递古荆州，君去应为万里游。倚棹遥看湘浦月，听猿初泊渚宫秋。云开巫峡千峰出，路转巴江一字流。若见东风杨柳色，便乘春水泛归舟。（中叠用四地名，亦是一病，然唐人每有之。）

乌斯道字继善，慈溪人。明初以荐起知石龙县。

【泽畔】

上征天无风，远游橐无金。

种兰兰不芳，行吟向江浔。渔父旷达者，庶几知我心。鹤鸣子不和，徒然有哀音。踟蹰当奈何？湘水清且深。（陈卧子云：“古拙。”）

许继继字士修，宁海人。洪武中台州训导。

【夜坐】

雨歇宵影澄，天清月华素。

空山秋欲来，凉意先在户。萧萧林樾风，泫泫幽篁露。草虫亦何知？含凄感迟暮。

深思无与言，美人隔云路。（“空山”十字，前人写秋俱未到此。）

胡奎字虚白，海宁人。宁府教授。

【秋夕】

月出万井秋，商声在高树。风条络纬鸣，露叶流萤度。天河一杯水，流向西南去。坐念素心人，佳期渺何处？

【梦游庐山】

我有紫霞想，梦游匡庐峰。

仙人凌绝顶，手弄金芙蓉。芙蓉亭亭九天上，叠嶂崩腾涌波浪。五色云中白鹿鸣，三更海底金鸡唱。悬崖瀑布从天来，匹练倒界青天开。

高人自是陆修静，邀我石磴行莓苔。九江秀色可揽结，欲跨长鲸捉明月。望断蓬莱青鸟书，琪花落尽无人折。飞身上挹香炉烟，坐卧九叠屏风前。

翻然拜手招五老，一笑仿佛三千年。松风泠泠吹梦觉，鹤背高寒露华落。早知此境隔尘凡，只合栖神向丘壑。何人写此江上山，云山与我心俱闲。

明当会碾飏轮去，长谢时人竟不还。

顾文昱字光远，嘉定人。明初官吴王副相。

【白雁】

万里西风吹羽仪，独传霜翰向南飞。芦花映月迷清影，江水含秋点素辉。锦瑟夜调冰作柱，玉关晨度雪沾衣。

天涯兄弟离群久，皓首江湖犹未归。（风格高于海叟《白燕诗》，一结犹见作手，王安中《咏白雁》：“夜月芦花看不定，夕阳枫叶见初飞。”极不即不离之妙，惜通体不称。）

卷三

高棅

棅字彦恢，长乐人。永乐初以布衣召入翰林为待诏，升典籍，卒。

林尚默云：“诗始汉魏，至唐极盛，宋失之理趣，元滞于学识，而不由悟以入。自襄城杨士弘始编《唐音》，然知者尚鲜。先生选《唐诗品汇》，议者服其精博。”典籍诗以五言古为胜，俞汝成盛推歌行，非笃论也。至拟唐诸作，初无君形者存。

【九月八日郭南山亭宴集分得下字】

海国霜气凉，秋声落遥野。乾坤肃以清，收纳属多暇。出郭寻幽期，同人命轩驾。

载酒入翠微，凭高憩层榭。苍山横黄云，大江天同泻。飞雨霞际晴，夕阳雁边下。江山满陈迹，今古成代谢。

高兴殊未平，临风独悲咤。（“飞雨”十字，写晚景入画。）

【赋得罗浮霜月怀二逸人】

海国梅始白，飞霜动鸣钟。寒空一片月，挂在罗浮峰。

夜色不映水，清光与之同。百里皆瑶华，千林幽风。萧条岩际叶，嘹唳云边鸿。远客起遥念，沧波思千重。

梦回明镜没，寂历闻幽蛩。

【水竹居】

清溪入云木，隐处林塘深。微月到流水，泠泠竹间琴。

虚声起遥听，天影澄远心。余亦鸾鹤侣，将期此投簪。

【题台江别意饯顾存信归番禺】

置酒台江上，怅然伤解携。

番禺天万里，矫首南云低。停舟对君日将暮，目送南云指归路。乡梦多随蜃母楼，

家林近入扶桑树。沧浪浩荡杳难期，此别重逢又几时。

沧浪浩荡杳难期，此别重逢又几时？东去台江应到海，唯因流水寄相思。

王恭

恭字安中，闽县人。永乐初以儒士荐，起授翰林典籍，寻投牒归。

【闻笛歌送人之塞上】

横笛对离亭，扁舟越江口。月下何人最断肠？天涯怨别惊《杨柳》。

此夜愁心独对君，明朝怅别又离群。单于城上吹羌管，知尔相思不忍闻。

【春雁】

春风一夜别衡阳，楚水燕山万里长。

莫怪春来便归去，江南虽好是他乡。

卞同同字孟符，吴人。

【倪雲林画】

云开见山高，木落知风劲。亭下不逢人，斜阳淡秋影。

郑真真字千之，鄞县人。洪武壬子乡试第一，官广信教授。

【寄乌继善先生】

红心驿外望家山，飒飒西风两鬓斑。系雁书成霜满地，饭牛歌罢月临关。误传海外苏公死，终许羌村杜老还。客舍不知身健否，何时访我白云间？

郑灞

灞字仲养，浦江人。

【海棠仕女图】

东风荡漾百花潭，翠袖迎风酒半酣。好鸟隔窗催晓色，美人残梦到江南。

练子宁

子宁字名安，新淦人。洪武乙丑榜眼，累官工部侍郎。建文时迁御使大夫。靖难兵入，不屈死。

【二月望日与饶隐君游玉笥山】

我怀谢康乐，独往游名山。身同雪舟系，心与池云闲。清风淡荡洒六合，令我兴在云松间。玉山高与南斗齐，云锦照耀庐山低。三十六峰凌虹霓，飞湍喷雪临回溪，长松挂月青猿啼。上有梅仙采药之幽栖，下有萧云读书之故基。洞天石扇杳莫测，瑶草漫长三春萸。我欲因之览八荒，手拂青萝眠石床。回飙吹散碧天雾，清冥倒泻澄湖光。作为《玉山谣》，寄之双峰客。兴来携妓秋复春，笑杀东山谢安石。

方孝孺

孝孺字希直，临海人。建文中文学博士。靖难兵至，令草诏，不屈，族诛。

【闲居感怀】

我非今世人，空怀今世忧。

所忧谅无他，慨想禹九州。商君以为秦，周公以为周。哀哉万年后，谁为斯民谋？凤随天风下，暮息梧桐枝。

群鸱得腐鼠，笑汝长苦饥。举头望八荒，默与千秋期。一饱亮易得，所存终不移。池鱼不知海，越鸟不知燕。

蚯蚓霸一穴，神龙行九天。小大万相殊，岂惟物性然？君子勿叹息，彼诚可哀怜。

【上巳约友登南楼】

生意忽满眼，不知春浅深。良朋旷嘉会，浊酒难孤斟。迢迢城上楼，高朗宜远临。曷不一举趾，纵望渊与岑？逍遥群动表，舒豁万古心。古人已寂寞，继者应在今。蕴真有至乐，外慕非所钦。愿言领众妙，无为郁冲襟。

【懿文皇太子挽词】

盛德闻中夏，黎民望彼苍。少留临宇宙，未必愧成康。宗社千年恨，山陵后世光。
神游思下土，经国意难忘。

程本立

本立字原道，崇德人。洪武中以明经荐，建文初征入翰林，升佾都御史。靖难兵至，自经于应天府学。

【题李典仪云东卷】

母老今犹健，儿行久不归。

一官淹白首，万里梦斑衣。越郡东溟阔，秦关西日微。只将双泪眼，日日看云飞。

【晚至安宁】

连然驿路马曾谙，落日行人思不堪。地极九州铜柱北，山蟠六诏铁桥南。汤池水底皆阴火，盐井烟中半夕岚。回首蓬莱天万里，忍教尘鬓白毵毵。

袁敬所

敬所不知其名，靖难后流寓常山之松岭。酒酣书《五柳图诗》，掷笔悲吟，继以溅泪。有江右布商见之，曰：“此吾乡某编修，何为在此？”敬所趋掩其口，不顾而去。

【题渊明五柳图】

藜杖芒鞋白布裘，山中甲子自春秋。呼儿点检门前柳，莫遣飞花过石头。

赵翀

翀字云翰，祥符人。洪武丁卯举人，授兵部主事。后历官礼、兵、刑三部尚书。

【成南书事】

三年为客寄龙沙，望断南天不见家。

惟有受降城上月，照人清泪落胡笳。（陈卧子云：“有嘉州之风”。略同宋文恪句

法。)

解缙

缙字大绅，吉水人。洪武戊辰进士。永乐中官翰林学士，出为广西参政，改交趾。入奏事，会太宗北征，见东宫辞去。为高煦所谮，征下狱死。

永乐以还，尚台阁体，诸大老倡之，众人靡然和之，相习成风，而真诗渐亡矣。故解大绅以下，李宾之以前，所收独略。

【送刘绣衣按交趾】

虬髯白晰绣衣郎，骢马南巡古越裳。城郭新开秦郡县，山河原是汉金汤。天连铜柱蛮烟黑，地接珠崖海气黄。莫说炎荒冰雪少，须令六月见飞霜。

杨士奇

士奇名寓，以字行，泰和人。建文时以辟召入翰林，永乐初改编修，入值文渊阁。累官少师，赠太师，谥文贞。

【汉江夜泛】

泛舟入玄夜，奄忽越江干。员景颓西林，列宿灿以繁。凝霜飞水裔，回飙荡微澜。孤鸿从北来，哀鸣出云间。时迁物屡变，游子殊未还。短褐不掩胫，岁暮多苦寒。悠悠念行迈，慊慊怀所欢。岂不固时命？苦辛诚独难。感彼式微诗，喟然兴长叹。

【同蔡尚远、尤文度、朱仲礼、杨仲举、蔡用严游东山】

步出城东门，逍遥望云巘，累月怀佳游，兹晨遂登践。梵宇绕层阿，飞楼凌绝岬。方塘涵湛碧，乔林茂敷衍。繁翳幽莫通，丰茸纷不剪。攀磴穷高跻，缘径屡回转。是时微雨收，轻霞淡舒卷。睇遥素横川，俯夷绿盈畎。陟降体自便，顾睇心已缅。况接旷士言，复偕释子辩。析空理弗昧，违喧抱逾展。何因此闲栖？永令浮虑遣。（胚胎晋、宋，端厚不佻。）

谷宏宏，福州人。洪武中官中书舍人。

【行经华阴】

崔嵬太华出云中，积翠遥连渭水东。秋色万家连远塞，暮烟一带绕离宫。秦关日落

行人少，汉时天阴古殿空。寂寞武皇巡幸处，祠郊木叶起秋风。（宋辕文云：“调既不卑，景色亦合。”）

赵文文字宗文，长洲人。永乐中以荐举官鄱阳知县。

【过金山寺】

水天楼阁影重重，化国何年此寄踪？

淮海西来三百里，大江中涌一孤峰。涛声夜恐巢枝鸟，云气朝随出洞龙。几欲登临帆去疾，苍茫遥听隔烟钟。

赵友同

友同字彦如，金华人，徙长洲。官太医院御医。

【宋徽宗画半开梅】

上皇朝罢酒初酣，写出梅花蕊半含。惆怅汴宫春去后，一枝流落到江南。

曾棨

棨字子启，永丰人。永乐甲申赐进士第一。历官詹事府少詹事，赠礼部侍郎，谥襄敏。子启五言如“断云京口树，残月广陵钟”，有中唐风致。

【车驾渡江】

朱旗画戟拥晴沙，锦缆牙樯向水涯。佳气迴浮江北树，日光初照海东霞。云中鸾凤扶丹毂，水底鱼龙识翠华。不用临流羡天堑，只今四海尽为家。

【送陈郎中重使西域】

雕轮历碌拥鸣驺，几欲停鞭记旧游。赤岭晚云连雪积，黄河春水带冰流。旌麾每过罗诸部，金帛频颁拜众酋。却笑虎头班定远，身亲百战觅封侯。

【维扬怀古】

广陵城里昔繁华，炀帝行宫接紫霞。《玉树》歌残犹有曲，锦帆归去已无家。楼台处处迷芳草，风雨年年怨落花。最是多情汴堤柳，春来依旧带栖鸦。

李昌祺名祯，以字行，庐陵人。永乐甲申进士，官至广西布政使。

【过吴门】

七泽三江通甫里，杨柳芙蓉照湖水。

阊门过去是盘门，半掩珠帘画楼里。靡芜生遍鸳鸯沙，东风落尽棠梨花。馆娃香径走麋鹿，清夜鬼灯明绛纱。三高祠下东流续，真娘墓上风吹竹。

西施去后屨廊倾，岁岁春深烧痕绿。

【送周秀才游长沙】

迢递长沙道，逍遥岁晏游。乱山黄叶寺，孤棹白蘋洲。

夕鸟冲船过，寒波背郭流。毋论卑湿地，贾傅昔淹留。

尹凤岐凤岐字邦祥，吉水人。永乐丙戌进士，官翰林侍讲。

【送兄广东参政应奎】

价人藩阃寄旬宣，五岭南行远著鞭。晓日红亭留别酒，秋风黄叶下泷船。青连橄榄千家雨，黄触桄榔万井烟。珍重平生清节在，不妨引满酌贪泉。

金诚

诚字成之，番禺人。永乐戊戌进士，官刑部主事。

【江行】

江水悠悠江路长，雁声啼月有微霜。十年踪迹浑无定，莫更逢人问故乡。

黄闰黄闰字期馀，信丰人。永乐戊戌进士。

【拟唐人长安春望】

南山晴望郁嵯峨，上苑春游玉辇过。

天抱帝城双阙迥，日临仙仗五云多。莺声尽入新丰树，柳色遥分太液波。汉主离宫

三十六，楼台处处起笙歌。

沈贞

贞字元吉，长兴人，卜居横玉山下。

【乐神曲七首（有序）】

（《乐神曲》者，拟《楚辞·九歌》而作也。吴人尚鬼，祀必以巫觋迎送，舞歌登献，其辞褻嫚，禳灾徼福，不知其分，滋黷甚矣。故为此辞，以明鬼神之理、祷祀之意，祛其荒淫之志焉。）

保我之民兮邑此方，崇其壖兮浚其隍。民不惊兮志定，眷灵修兮作民命。堤杨兮结阴，青青兮蔽林。女墙坚兮有郭有郭，绕洄湾兮濠归于壑。灵之来兮玄都，飏旗旌兮若荼。陈一豕兮两俞，载斟之兮百壶。城兮隍兮吾永无虞。

（右城隍）

嗟灵伯兮御清泠，洗袪敲兮涤炎蒸。骀荡兮春初，<风白><风卓>兮夏徂。飏飏下兮木叶枯，号空桑兮吹雪载途。灵之来兮凭女巫。女巫兮屡舞，{ 吾}箫兮伐鼓。灵醉饱兮无怒，萧萧来兮飒飒去。（右风伯）

佩芳兰兮揽芬椒，洁新服兮缀珠召。驾灵螭兮翔重霄，要灵輅兮下迢迢。我禾兮成役，我田兮龟坼。烈日兮骄阳，利行水兮热汤。灵之来兮天外，下土干兮沾一溉。维灵布泽兮惠我无私，嗟我民兮其敢绎思。灵皇皇兮萃只，舞僛僛兮醉只，福穰穰兮岁复岁只。（右雨师）

月维仲兮日维刚，肃斋宫兮神所藏。灵辉辉兮垂佩，俨飞馭兮高盖。降灵雨兮来斯，左有翁兮右有妃。怅嘉期兮难又，羌永叹兮陈辞。灵修修兮不语，逝翩翩兮归去。（右社公）

波震荡兮具区，既底定兮奠神之居。芙蓉盖兮菱车，导翠鼉兮文鱼。神之来兮孰俱？后子皮兮前灵胥。与神游兮湖之浒，冲风息兮极浦。有倡兮妙舞，有冽兮清醑。神保聿归兮或返而顾。灌我田兮受神之祜。（右太湖神）

雄何为兮厉于乡？祀有时兮享有尝。赭白马兮青盖，明而没兮晦而在。屏方相兮去雉，神巫进兮舞且歌。雄欣欣兮远逝，不水旱兮不疵厉，乐吾民兮世世。（右乡厉）

两旗兮分张，舞轻风兮悠扬。神之司兮我疆，原田每每兮立我青秧。不稂不莠兮无
好无妨。时雨兮时暘，俾百谷兮登场。维神兮降康，报之兮肴蒸腍羊。（七章未能
独造，然终是雅音。右青苗神。）

薛瑄

瑄字德温，河津人。永乐辛丑进士，历官礼部左侍郎兼文渊阁大学士。谥文清，从
祀孔庙。

【梅花落】

檐外双梅树，庭前昨夜风。

不知何处笛，并起一声中。

于谦

谦字廷益，钱塘人。永乐辛丑进士，官至大理寺少卿。景陵即位，拜兵部尚书，加
少保。英宗复辟，弃市。成化中赠太傅，谥肃愍，后改忠肃。

【暑月将自太行巡汴】

三晋冲寒到，中州冒暑回。山川原不改，节候自相催。绿树连天暗，丹葵向日开。
太行云缥缈，搔首意徘徊。

【上太行】

西风落日草斑斑，云薄秋容鸟独还。两鬓霜华千里客，马蹄又上太行山。

刘球

球字求乐，更字廷振，安福人。永乐辛丑进士，官翰林侍讲。以忤王振，矫旨下狱
死。景泰初赠翰林学士，谥忠愍。

【山居】

水抱孤村远，山通一径斜。不知深树里，还住几人家？

施敬敬字孟庄，钱塘人，谪居滇。

【巴阳夜泊】

独棹三巴夜，秋高片月孤。滩声将客梦，万里下东吴。

【南行途中寄钱塘亲友】

万里移家入瘴烟，故乡音耗若为传。衡阳自古无来雁，况去衡阳又八千！

黄褰褰字仲褰，文江人。

【客夜】

西风萧萧木叶稀，秋深作客何时归？城头月出照击柝，江上露白催捣衣。雁鸿附书远莫致，乌鹊绕树还惊飞。

三更不眠欲起舞，跃马卧龙谁是非？

刘绩字孟熙，山阴人。隐居不仕，人称西江先生。

【题西陵送别图送姚进士】

悠悠复悠悠，风吹江上舟。今朝天色好，送客西陵头。西陵在何许？{ 冪 }ゃ春郊树。搔首望行人，迢迢上京路。

京路一千程，官梅照眼明。春风浓似酒，难浣别离情。别离余几日，伫得君消息。折取杏园花，慰我长相忆。

相忆梦相仍，高楼只自登。春潮知我意，日夜向西陵。

【早春寄白虚室】

帝城佳气接烟霞，草色芊芊紫陌斜。

残雪未消双凤阙，春风先入五侯家。歌钟暗度新丰树，游骑晴骄上苑花。独有子云才思逸，应传丽句满京华。

【征夫词】

征夫语征妇：死生不可知。欲慰泉下魂，但视襖中儿。

【征妇词】

征妇语征夫：有身当殉国。君为塞下土，妾作山头石。

钱晔

晔字允辉，常熟人。浙江都司经历。

【过江】

江渚风高酒乍醒，川途渺渺正扬舲。浪花作雨汀烟湿，沙鸟迎人水气腥。

三国旧愁春草碧，六朝遗恨晚山青。不须倚棹吹长笛，恐有蛟龙欲出听。

【赠周岐凤】

（李宾之云：“江阴周岐凤坐事亡命，扁舟夜泊，晔投以诗，歧凤得知大恸。江南人至今传之。”）琴剑飘零西复东，旧游清兴几时同？

一身作客如张俭，四海何人是孔融！野寺莺花春对酒，河桥风雨夜推篷。机心已共沙鸥静，惟有家山在梦中。

萧鎡

鎡字孟勤，泰和人。宣德丁未进士，累官太子少师、户部尚书。

【送李佑之赴陕西参议】

十载含香侍上台，旬宣分陕用奇才。黄河九曲天边落，华岳三峰马上来。

长乐月明钟响静，樊川春涨水波回。当年召伯留遗泽，会看甘棠到处开。

王清清字一宁，合肥人。世袭济宁卫指挥，升广东都指挥，死寇难。

【塞上感怀】

西风关外雪初晴，怀古思乡百感生。玉帐枕戈人万里，铁衣传箭夜三更。梦回绝域乌桓地，战罢空山敕勒营。

烽火微茫天去远，月中鸿雁送秋声。

郭登

登字元登，武定侯诸孙。景泰初官都督僉事，守大同，以功封定襄伯。英庙复辟，谪戍甘肃。成化初复爵，赠侯，谥忠武。

定襄《山王》、《楸树》、《咏泉》诸篇，盛推众口，然才力恣肆，或非正声。兹择其尤雅者。

【题蒋廷晖小景】

我家南山下，柴门别经久。

不知今春来，新添几株柳？清江闲钓竹，鸥鹭还来否？对此忽相思，长歌独搔首。

【送岳季方还京】

登高楼，望明月，明月秋来几圆缺？多情只照绮罗筵，莫照天涯远行客。天涯行客离家久，见月思乡搔白首。年年长自送行人，折尽边城路傍柳。

东望秦川一雁飞，可怜同住不同归。身留塞北空弹铗，梦绕江南未拂衣。君归复喜登台阁，风裁棱棱尚如昨。但令四海歌升平，我在甘州贫亦乐。

甘州城西黑水流，甘州城北黄雲愁。

玉关人老貂裘敝，苦忆平生马少游。（《皇明诗选》裁末四语作断句，《明诗综》因之。然通体缠绵有情，不迂不促，故仍用原本。）

【甘州即事】

黑河如带向西来，河上边城自汉开。山近四时常见雪，地寒终岁不闻雷。牦牛互市番氓出，宛马临关汉使回。东望玉京将万里，雲霄何处是蓬莱？

【保定途中偶成】

白璧何从摘旧瑕？才开罗网向天涯。寒窗儿女灯前泪，客路风霜梦里家。岂有鸛人羊叔子？可怜忧国贾长沙。

独醒空和骚人咏，满耳斜阳噪晚鸦。

张和字节之，昆山人。正统己未进士，官至浙江提学副使。

【与朱千户夜话】

客里相逢感慨深，剑歌时复动悲吟。清尊坐对三更月，紫塞遥驰万里心。瀚海地荒龙驭远，交河风急雁书沉。微生愧乏安边策，北望长天泪满襟。

陈宪章

宪章字公甫，新会人，正统丁卯举人，用荐授翰林检讨。谥文恭，从祀孔庙。

【冬夜】

长夜气已凄，木绵被重裘。

端坐思古人，寒灯耿悠悠。是时病已间，背汗仍未收。学业坐妨夺，田芜废锄耰。高堂有老亲，遍身无完绸。

丈夫庇四海，而以俯仰忧。口腹非所营，菽水吾当求。明旦理黄犊，进我南冈舟。

范澄

澄字国清，宝应人。景泰庚午举人。

【送别】

酒尽津鼓喧，风生浦帆乱。山回不见君，夕阳在沙岸。

沈愚

愚字通理，昆山人。

【陈宫怀古】

景阳宫井积浮埃，三阁遗基半绿苔。惆怅后庭花落尽，黑头江令独归来。

陆德蕴德蕴字润玉，华亭人。

【重过沙河道中】

白鹤沙头水自波，扁舟曾载夕阳过。东风一路靡芜绿，添得春愁别后多。

陈宽字孟贤，吴人。检讨继之子。

【题燕穆之楚江秋晓图】

五更人语觉潮生，估客帆樯候晓行。树色未分云梦泽，鸡声已动汉阳城。天空画角吹霜尽，月落银河入斗横。欲问楚南千古事，至今江水为谁清？

王越

越字世昌，浚县人。景泰辛未进士，天顺中官右副都御使，巡抚大同，进兵部尚书，论出塞功封威宁伯。寻加少保，赠太傅。谥襄敏。

威宁诗性情流露，不须雕饰，如“发为胡笳吹作雪，心因烽火炼成丹”，极悲歌感慨之致，然云雅音则未也。至刘原博云：“孤臣自恨无容地，逆虏犹存不共天”，但取其忠义可矣。

【与李布政彦硕、冯佥宪景阳对饮】

相逢无奈还伤别，尊酒休辞饮几巡。自笑年来常送客，不知身是未归人。马嘶落日青山暮，雁度西风白草新。

离恨十分留一半，三分黄叶二分尘。（裁上半首为绝句，更佳。）

苏平平字秉衡，海宁人。举贤良方正，不就。

秉衡《咏绣鞋》诗“南陌踏青春有迹，西厢立月夜无声”，一时以此得名。然此种有累诗品不小。

【湘南怀古】

江山摇落独登临，草色湖南入望深。

万古空留湘女恨，《九歌》谁识屈原心？霜清楚畹兰香歇，云暗巴陵雁影沉。正是客怀消不得，竹枝声里断猿吟。

王佐

佐字廷用，天顺己卯举人，福州卫籍，官训导。

【宫怨】

芙蓉帐冷减容光，愁倚熏笼懒着床，寒气逼人眠不得，钟声催月下斜廊（似少言外意，而定情逼真。《列朝诗选》采《梦蕉诗话》，谓宫女媚兰仙子诗，恐近于傅会也。诗见《王廷用集》中。）

秦夔夔字廷韶，无锡人。天顺庚辰进士，历官江西右布政。

【同金广信宗器游番湖】

番湖水落秋容冷，碧色澄鲜三万顷。楼船嗷嘈何处来？十幅蒲帆弄秋影，霜晴九月葭苇枯，芙蓉著花秋满湖。吴兴已远郭熙老，谁为写此秋江图？汀州远近迷云树，东去沧波急如注。康山一发天际横，传是先皇洗兵处。当年血战湖水黄，日月照耀旌旗光。鼎湖龙去不复返，只有雁鹜飞茫茫。天开大泽雄今古，气撼东吴及南楚。巴陵洞庭何处边？目断浔阳送楼櫓。北风猎猎握双旌，此行奇绝如登瀛。风波平地不须起，向来魂梦今犹惊。浩歌篷底还搔首，却忆同行信州守。萍水飘零尽白头，相逢且醉余干酒。

李东阳

东阳字宾之，茶陵人。天顺甲申进士，历官少师兼吏部尚书。赠太师，谥文正。

永乐以后诗，茶陵起而振之，如老鹤一鸣，喧啾俱废。后李、何继起，廓而大之，駸駸乎称一代之盛矣。王元美谓长沙之于何、李，犹陈涉之启汉高。此习气未除，不免抑扬太过，宜招后人之掊击也。

【夜过邵伯湖】

苍苍雾连空，冉冉月堕水。飘飘双鬓风，恍惚无定止。轻帆不用楫，惊浪长在耳。

江湖日浩荡，行役方未已。羁栖正愁绝，况乃中夜起。

【风雨叹】

壬辰七月壬子日，大风东来吹海溢。峥嵘巨浪高比山，水底长鲸作人立。愁云压地

湿不翻，六合惨澹迷乾坤。阴阳九道错黑白，乌兔不敢东西奔。里人苍黄神屡变，三十年前未曾见。东村西舍喧呼遍，牒书走报州与县。山豕谷汹豺虎嗥，万木尽拔乘波涛。州沈岛没无所逃，顷刻性命轻鸿毛。我方停舟在江皋，披衣踞床夜复昼，忽掩青袍涕沾袖。举头观天恐天漏，此时忧国况思家，不觉红颜坐凋瘦。潼关以西兵气多，芦笳吹尘尘满河，安得一洗空干戈？不然独破杜陵屋，犹能不废啸与歌。世间万事不得意，天寒岁暮空蹉跎。呜呼奈尔苍生何！

【夜过仲家浅闸】

日维乙未月丙戌，青天无云月东出。舟人喧豕夜涛发，翻沙转石纷出没。是时水浅舟在地，闸门崔嵬昼方闭。

闸官醉睡夫走藏，仓卒招呼百无计。民船弃死争赴闸，楫倒橈催动交碎。舟人号咷乞性命，十里呼声震天地。我时兀坐惊舂撞，揽衣而起心徬徨。

同行无人仆隶散，独与船底相低昂。攀崖陟磴不得上，咫尺如在天一方。流行坎止信有数，向来蔑视淮与江。霜风欺人衣袂薄，呼童酌酒累数觞。

灯残酒醒闸亦过，北斗堕地天茫茫。

【灵寿杖歌】

吾闻武当之山四万二千丈，半在云根半天上。不知三十六宫何处称绝奇，产出灵株非一状。蛟螭盘拿露头角，熊经树颠虎山脚。根盘节错相纠缠，含风饱雪经炎寒。九年洪水之水浸不杀，十日之日暴烈何时干？梯悬磴接跬步不可上，谁采青壁红琅玕。见之羡者不容口，锡以嘉名曰灵寿。爪之不入行有声，金可同坚石同久。吾家此物旧所有，神与相扶鬼为守。自从病足跛曳不得前，已觉山林落吾手。一病经旬不出门，手中此杖嗟犹存。下床欹足立不定，此时托子以为命。不顾四体无微疴，但愿谢病归山阿。左扶右策夹以二童子，下可涉园径，上可凌陂陀。愿栽万本截万杖，穷崖阴谷生森罗。灵兮寿兮此物倘可致，直遣四海赤子头俱皤。（纵横跌宕，能盘硬语。牧斋诋斥空同，缘其常用杜句法也。而茶陵此诗，亦极规模少陵，牧斋偏盛推之，渠胸中岂有真是非存耶？）

【题画鹰送罗缉熙】

大鹰狰狞爪抉石，侧目空岩睨秋碧。小鹰偃首俯且窥，威而不扬岂其雌？雌雄起伏各异态，意气相看出尘埃。

独立羞将众羽群，高飞怕有浮云碍。山寒木落天始风，日色惨淡川原空。人间狐兔

自有地，慎勿反击伤鹓鸿。画图仿佛是谁作，宛似悬鞬臂间落。

高堂匹练阴风生，万里炎荒尽幽朔。我生奇气空峻峒，挥毫对此不无神。送渠羽翼朝天去，亦是云霄得意人。

【立春日车驾诣南郊】

暖香和露绕蓬莱，彩仗迎春晓殿开。北斗旧杓依岁转，南郊佳气隔城来。云行复道龙随辇，雾散仙坛日满台。不似汉家还五畹，甘泉谁羨校书才？

【南圉秋风】

别院临城辇路开，大风昨夜起宫槐。秋随万马嘶空至，晓送千旂拂地来，落雁远惊云外浦，飞鹰欲下水边台。宸游睿藻年年事，况有长杨侍从才。

【与顾天锡夜话，时天锡谪永州府同知】

路转三湘去更深，潞河西岸浙东寻。潜鳞自足波涛地，别马长怀秣饲心。湘女庙前山似黛，柳公亭下石如林。征科亦是公家事，民力天南恐未禁。

【与赵梦麟诸人游甘露寺】

礧砦岩杉处处通，野寒吹雨堕空蒙。垂藤路绕千年石，老鹤巢倾半夜风。淮浦树来江口断，金陵潮落海门空。

关书未报三边捷，万里中原一望中。

【九日渡江】

秋风江口听鸣榔，远客归心正渺茫。万古乾坤此江水，百年风日几重阳。烟中树色浮瓜步，城上山形绕建康。直过真州更东下，夜深灯火宿维扬。

【游岳麓寺】

危峰高瞰楚江干，路在羊肠第几盘？万树松杉双径合，四山风雨一僧寒。平沙浅草连天远，落日孤城隔水看。

蓊北湘南俱入眼，鹧鸪声里独凭栏。

卷四

庄咏

咏字孔旻，江浦人。成化丙戌进士。官翰林，授检讨。以谏谪官，后迁南京吏部郎中。天启初追谥文节。

【端午食赐粽有感】

蓬莱宫中悬艾虎，舟满龙池竞箫鼓。

千官晓缀紫宸班，拜向彤墀贺重午。大官角黍菰蒲香，彩绳万缕云霞光。天恩敕赐下丹陛，琼筵侑以黄金觴。东南米价高如玉，江淮饿殍千家哭。

官河戍卒十万艘，总向天厨挽飞粟。君门大嚼心岂安？谁能持此回凋残？

小臣自愧悠悠者，无术救时真素餐。（杜老心事，理学人何必专作头巾语！）

【忆舍弟】

天边闻一雁，杳杳向南徂。今夜西风冷，他乡小弟孤。五人千里去，九月一书无。欲寄千行泪，凭谁达客途？（一气挥洒，绝去对偶之迹。）

戴缙

缙，南海人。成化丙戌进士，累官工部尚书。

【楚江旅怀】

薄暮过潇湘，秋空楚水长。黄芦千里月，红叶万山霜。客梦悬双阙，乡心逐五羊。羁情谁与晤，劳者若为伤！

周瑛瑛字梁石，蒲田人。成化己丑进士，官至四川右布政。

【履霜操】

父兮儿憎，母兮儿怒。天踏地，惨不知其故。父在高堂，儿在郊圻，晨兴履霜，踵血淋漓。荷衣不暖，枵食不饱，不即捐沟壑，念我父母，父本儿爱，母本儿怜，一朝放逐，实儿之愆。维鸟有鷖，维虫有羸，父兮母兮，其或归我！（昌称作过于怨

矣，此方是怨而不怒。与昌黎《拘幽操》一忠一孝。并有千古。）

吴宽

宽字原博，长洲人。成化壬辰赐进士第一，授翰林修撰。累官礼部尚书，赠太子太保。谥文定。

【赋黄鹤楼送李贞伯】

维河有源星宿同，导河积石思神功。浊流汗漫失故道，积石却与澶渊通。平郊脱轡万马逸，一夜径度徐州洪。徐州太守苏长公，夜呼卒伍登城墉。一身未足捍大患，岂无木栅兼竹笼！戏马台傍二十里，筑堤横亘长如虹。高城不浸三版耳，挽回鱼鳖仍耆童。防河录成天有工，黄楼高起城之东。五行有土可制水，底用四壁涂青红？太守登楼宾客从，举杯酌水临长风。河伯俯首受约束，不敢更与城争雄。水流滔滔向东去，纾徐演漾殊从容。负薪投壁竟何用？汉家浪筑宣房宫。自公去后五百载，水流无尽恩无穷。我生慕公公不逢，安得置我兹楼中？颖滨淮海独何幸，留得两赋摩苍穹。凤池舍人今李邕，南行别我何匆匆？此邦万灵日凋瘵，赖尔继续前贤踪。暇日登高倘能赋，封题须附冥飞鸿。

杨一清

一清字应宁，云南安宁州人。成化壬辰进士，历官户部尚书，进少师，赠太保。谥文襄。

【甘凉道中书事感怀】

弧矢威天下，雷霆震域中。大兵方出塞，小丑自相攻。继绝君王义，宣威将帅功。从今宵旰虑，不复在西戎。（“不复在西戎”，言所忧者正多也。大臣心事，昭然如揭。）

【山丹题壁】

关山逼仄人踪少，风雨苍茫野色昏。万里一身难独任，百年多事共谁论？东风四月初生草，落日孤城早闭门，记取汉兵追寇地，沙场犹有未招魂。

【将至宁夏】

奉诏西征驻节时，元戎奏凯已先期。苗民自逆三旬命，獯豸何劳六月师？灯火家家开夜户，弓刀处处卷风旗。益兵加赋休重论，财赋于今两不支。

文林林字宗儒，长洲人。成化壬辰进士，官至温州知府。

【舟中有怀林待用】

渺渺长波映远空，依依新柳飏春风。

相思人在青山外，尽日舟行细雨中。汲黯身为汉廷重，杜陵诗到锦城工。天王明圣江湖远，赢得驰驱两鬓蓬。

王鏊

鏊字济之，吴县人。成化乙未赐进士第三，累官吏部侍郎，进少傅，赠太傅。谥文恪。

【赠梁都宪巡抚四川】

赤甲白盐雄作镇，铁冠绣斧凛先声。

雪山已为来时重，黑水应闻去后清。殿上位虚中执法，边头人散小团营。

凭谁说与苏明允，画像无烦记姓名。（“人散小团营”，谓乱萌不作，犹张方平之镇蜀也。）

马中锡中锡字天禄，故城人。成化乙未进士，官至左都御史。

【晚渡咸阳】

野色苍茫接渭川，白鸥飞尽水连天。僧归红叶林间寺，人唤斜阳渡口船。表里山河犹往日，变迁朝市已多年。

渔翁看破兴亡事，独坐秋风钓石边。

【元世祖庙】

世祖祠堂带夕曛，碧苔年久暗碑文。蓟门此日瞻遗像，起辇何人识故坟？棹楔半存蒙古字，阴廊尚绘伯颜军。可怜老树无花发，白昼鸱鸣到夜分。（起辇，谷名，元诸陵在焉。曹洁躬云：“用事典实，铸词凄惋，可称绝唱。”）

邵宝

宝字国贤，无锡人。成化甲辰进士，历官至南京礼部尚书。谥文庄。

【孙翊妻】

夫死矣，妾何敢生？夫仇为重身为轻。贼尚生，妾何敢死？军中幸有报恩子，号召如风赴如水。断贼头，祭夫墓。白日下高天，何处黄泉路？

【乞终养未许】

乞归未许奈亲何，帝里风光梦里过。三月春寒青草短，五湖天远白云多。客囊衣在缝犹密，驿骑书来字欲磨。圣主恩深臣分浅，百年心事两蹉跎。

乔宇

宇字希大，山西乐平人。成化甲辰进士，累官吏部尚书，加少保。谥庄简。

【秋风亭下泛舟】

荒亭寥落野烟空，汉武雄才想象中。

箫鼓应声开画鹢，帆樯飞影动晴虹。山分秦晋群峰断，水入河汾两派通。少壮几时还老大，不须回首叹秋风。

王云凤

云凤字应韶，辽州和顺人。成化甲辰进士，官至右佥都御史。

【送客】

云气溟蒙雨欲丝，飘飘游子别离时。愁看陌上青青草，送尽行人总不知。

文森

森字宗严，长洲人。成化丁未进士，历官右佥都御史，江西巡抚。

【九日】

三载重阳菊，开时不在家。何期今日酒，忽对故园花。野旷云连树，天寒雁聚沙。登临无限意，何处望京华！（沈子山云：“语不必深，自然蕴藉。”此诗亦见《何

大复集》。）

沈周字启南，长洲人。景泰中，郡守以贤良应诏，辞不赴。

句如“山雨乍来茅溜湿，溪云欲堕竹梢低”，倘遇郭熙，应采入“林泉高致”中，以当画本。

【从军行】

马上黄沙拂面行，汉家何日不劳兵。

匈奴久自忘甥舅，仆射今谁托父兄。云暗旌旗婆勒渡，月中刁斗受降城。

左贤早待长绳缚，莫遣论功白发生。（忘世人有此悲壮之作，诸选本往往遗之。）

【写怀寄僧】

虚壁疏灯一穗红，闲阶随处乱鸣虫。

明河有影微云外，清露无声万木中。泽国苍茫秋水满，居民流落野烟空。不知谁解抛忧患，独对青山忆赞公。

史鉴

鉴字明古，吴江布衣。

【子昂兰】

国香零落佩纒空，芳草青青合故宫。谁道有人和泪写，托根无地怨东风。

戴冠

冠字章甫，长洲人。以贡授绍兴府训导。后又有两戴冠：一字仲鹞，信阳人；一字南枝，山阴人。

【题姚少师画竹】

北地风高卷塞云，惊沙吹起雁成群。客边偶写龙孙谱，忘却江南有此君。（王湛求云：“风人善谑之遗。”）

莫止

止字如山，无锡人。（句如“天阔一声何处雁，江平千里独归舟”，风致悠然自远。）

【昭君曲】

但使边城静，蛾眉敢爱身？千年青冢在，犹是汉宫春。

李梦阳

梦阳字天赐，更字献吉，庆阳人，徙扶沟。弘治癸丑进士，官户部员外。弹寿宁侯，系狱，旋释之，进郎中。代尚书韩文草奏劾刘瑾，坐奸党致仕，起江西提学副使。宁庶人既诛，狱词连及，尚书林俊力持之，得免。卒后弟子私谥文毅。天启中追谥景文。

空同五言古宗法陈思、康乐，然过于雕刻，未极自然；七言古雄浑悲壮，纵横变化；七言近体开合动荡，不拘故方，准之杜陵，几于具体。故当雄视一代，邈焉寡俦。而钱受之诋其模拟剽贼，等于婴儿之学语。至谓读书种子从此断绝，吾不知其为何心也！追逐少陵，实有面目太肖处。集中扫而空之，不欲使掊击前贤者得以借口。

【内教场歌】

（《内教场》者，李子纪时事而作也。帝自将练兵于内庭。）

雕弓豹骑白马，大明门前马不下。径入内伐鼓，大同耶？宣府耶？将军者许耶？（一解）

武臣不习威，奈彼四夷？西内树旗，皇介夜驰。鸣炮烈火，嗟嗟辛苦！（二解）

【湘妃怨】

采兰湘北沚，搯木澧南浔。渌水含瑶彩，微风托玉音。云起苍梧夕，日落洞庭阴。不知篁竹苦，惟见泪斑深。

【杂诗】

桷榱蚀以倾，梁栋诚独难。流言播四国，周公有疑患。凉飙激颓景，奄忽不可攀。

众羽日缤纷，朱鸟戢其翰。杀身苟无益，去去从所安。伤哉式微诗，千载起予叹。

茅以刳为席，柏以劲为薪。君子忧治世，愚者幸不辰。张置以待兔，雉也菑其身。物理虽云殊，罹脱各有因。浮沙卷奔藿，朔吹扬惊尘。日暮临大道，怅望曷能陈？

登山望四海，日夕忽至沉。俯身眺城郭，瘁然沾我襟。交路夹芳兰，逝驷何骎骎！朱树蔼闲榭，奇巧媚荒淫。北里进异舞，高堂呈妙音。纤罗振芬芳，朝云递嘉吟。不见秋日草，零落愁春心。

【卫上别王子】

晨风应候至，鸡鸣各严车。我今游宋中，子当旋旧间。仆夫理前綏，辕马悲鸣趋。一别阻秦周，相望万里余。首春霜露重，厚汝征衣襦。昔为同袍士，今在天一隅。故者日以远，畴能察区区？

【士兵行】

（赣州贼作乱，都御使陈金奏调广西狼兵征之，《士兵行》所由作也。）豫章城楼饥啄乌，黄狐跳踉追赤狐。北风北来江怒涌，士兵攫人人叫呼。城外之民徙城内，尘埃不见章江途。

花裙蛮奴逐妇女，白夺钗钏换酒沽。父老向前语蛮奴，慎勿横行王法诛。华林桃源诸贼徒，金帛子女山不如。汝能破之惟汝欲，犒赏有酒牛羊猪，大者升官佩綬趋。

蛮奴怒言万里入尔都，尔生我生屠我屠。劲弓毒矢莫敢何，意气似欲无彭湖。彭湖翩翩飘白，轻舸蔽水陆走车。黄云卷地春草死，烈火谁分瓦与珠！

寒崖日月岂尽照，大邦魑魅难久居。天下有道四夷守，此辈可使亦可虞。

何况土官妻妾俱，美酒大肉吹笙竽。（杨用修云：“只以谣谚近语入诗史，而古不可及。”归结正论，少陵亦云“此辈少为贵也”。）

【豆莖行】

昨当大风吹雪过，湖船无数冰打破。冰骧壘崧山岳立，行人骇观泪交堕。景泰年间一丈雪，父老见之无此祸。鄱阳十日路断截，庐山百姓啼寒饿。

旌竿冻折鼙鼓哑，浙军楚军袖手坐。将军部兵蔽江下，飞报沿江催豆莖。邑官号呼手足皴，马骡鸡犬遗眠卧。前时边达三千军，五个病热死两个。

弯弓值冻不敢发，昔何猛毅今何懦！李郭邳城围不下，裴度淮西手可唾。从来强弱不限域，任人岂论小与大？当衢寡妇携儿哭，秋禾枯槁春难播。

纵健征科何自出，大儿牵缠陆挽馱。（似古谣谚俚质生硬处正不易到。）

【明星篇】

（一有小序：正德间，早起闻内教场炮喊之声，作此篇也。）

明星出地一丈高，天门沉沉鱼钥动。沙堤露下玉珂寒，直庐鸡唱金莲重。千门万户晓钟发，明星渐高河渐没。灿烂疑侵翔凤楼，依稀故抱飞龙阙。凤楼龙阙带层城，翠辇朱衣夜夜行。黄昏竞奏催花宴，天明犹听打球声。兰烟桂火辉如日，明星迢迢照不入。百子池头青草生，长信宫中紫苔集。草色苔香秋复春，此日乘槎若问津。明星晓落宵还见，白发黄金愁杀人。

【汉京篇】

汉京临帝极，复道众星罗。烟花开甸服，锦绣列山河。山河自古称佳丽，城中半是王侯第。峻阁重楼夹道悬，云房雾殿森亏蔽。牧豚卖珠登要津，樊侯亦是鼓刀人。时来叱咤生风雨，奄见吹嘘走鬼神。平津结兄盖侯弟，杯酒相看何意气。执鞭尽是虎贲郎，守门不数长安尉。长安烽火入边城，挺剑辞君万里行。去日千官遮马饯，归来天子降阶迎。朱弓尚抱流沙月，宝钺常飞瀚海星。不分燕然先勒石，直教麟阁后标名。岂知盛满多仇忌，可惜繁华如梦寐。地宅田园夺与人，丹书铁券成何事？霍氏门前狐夜号，魏其池馆长蓬蒿。三千食客今谁在？十二珠楼空复高。后车不戒前车覆，又破黄金买金谷。洛阳亭榭与山齐，北邙车马如云逐。阴郭豪华真可怜，云台将相耳貂连。当时却怪桐江叟，犹着羊裘伴帝眠。（功高自满，千古同病，汉博陆侯其炯戒也。末以不受爵禄者点破昏庸，与李颀“汉朝功臣杨德祖”篇归到鲁连蹈海，同一作法。）

【去妇词】

（正德元年，户部尚书韩文暨内阁师保等咸相继去位，李子作此词也。）

孔雀南飞雁北翔，含颦揽涕下君堂。绣幕空留并菡萏，罗袂尚带双鸳鸯。菡萏鸳鸯谁不羡，人生一别何由见？只解黄金顷刻成，哪知碧海须臾变！贱妾甘为覆地水，郎君忍作离弦箭。忆昔嫁来花满天，贱妾郎君俱少年。瑶台筑就犹嫌恶，金屋装成不论钱。重楼复道天中起，结绮临春照春水。宛转流苏夜月前，萋迷宝瑟烟花里。夜月烟花不相待，安得朱颜常不改？若使相逢无别离，肯放驰波到东海。薄命难教娣姒知，衰年恨少姑嫜在。长安大道接燕川，邻里携壶旧路边，妾悲妾怨凭谁省？

君舞君歌空自怜。郎乎岂是会稽守，贱妾宁同会稽妇？郎乎幸爱千金躯，但愿新人故不如。（深婉，可以怨矣。）

【朝饮马送陈子出塞】

朝饮马，夕饮马，水咸草枯马不食，行人痛哭长城下。城中白骨借谁问？云是今年筑城者。

但道辞家别六亲，宁知九死无还身？不惜身为城下土，所恨功成赏别人。去年贼掠开城县，黑山血迸单于箭。万里黄尘哭震天，城门昼闭无人战。

今年下令修筑边，丁夫半死长城前。城南城北秋草白，愁云日暮鸣胡鞭。

【胡马来再赠陈子】

冬十二月胡马来，白草飒飒黄云开。

沿边十城九城闭，贺兰之山安在哉！传闻清水不复守，游兵早扼黄河口。即看烽火入甘泉，已诏将军屯细柳。去年穿堑长城里，万人齐出千人死。

陆海无毛杀气蒸，五月凌冰冻河水。当时掘此云备胡，胡人履之犹坦途。闻道南侵更西下，韦州固原今有无？从来贵德不贵险，英雄岂可轻为谟。

尚书号令速雷电，抱玉谁敢前号呼。遂令宵旰议西讨，兹咎只合归吾徒。我师如貔将如虎，九重按剑赫斯怒。惜哉尚书谢归早，不睹将军报平虏。（轩然而来，神勇无敌。）

【赠何舍人赍诏南纪诸镇】

先皇乘龙去不返，悲风惨淡吹宸极。四海哭若丧慈母，百官狂走天为黑。忆昨临危坐御床，手挈神器归今皇。密语叮咛肺腑裂，三老亲闻眼流血。金匱立剖石室秘，此事难人外人说。吾君谦让不可得，割哀践阼弘祖烈。日月重悬万国朝，雷雨赦过群方悦。越南海北霹雳动，蛮夷尽奉王正月。此时九道使臣出，舍人亦辍螭头笔。白马朝腾蓟北云，锦帆暮闪江沱日。江沱秋交多烈风，洞庭云梦俱眼空。巴陵县令舍人兄，接诏会弟西楼中。童年题诗在高壁，六载不到纱为笼。南岳以南惟峻山，苦蒸毒雾何盘盘。天王新令雷电掣，妖蛇不敢啼林端。五溪官长喘喙拜，黔州父老垂泪看。却瞻苍梧云气黑，斑竹临江怨幽色。翠华缥缈空冥间，此时此恨谁知得。君不见马援柱、孔明碑，剥落黄蒿里，千年莓苔待君洗。万里之行自此始，归来何以献天子？

【奉送大司马刘公归东山草堂歌】

东山有草堂，缥缈云峤孤。前对祝融峰，下瞰巴陵湖。明公昔时此堂居，麋鹿熊豕当窗趋。

洞庭日落风浪涌，倒影射堂堂欲动。惨淡谁闻紫芝曲，独善不救苍生哭。先帝亲裁五色诏，老臣曾受三朝禄。此时边徼多战声，曳履谒帝登承明。

谢安笑却淮淝敌，魏相坐测单于兵。九重移榻数召见，夹城日高未下殿。英谋密语人不知，左右微闻至尊美。自从龙去不可攀，公亦卧病思东山。

湘娥含笑倚竹立，山鬼窈窕堂之侧。上书苦死只欲归，圣旨优容意凄恻。内府盘螭缕金织，赐出倾朝皆动色。白金之铤红票记，宝钞生硬鸦翎黑。

崇文城门水云白，是日观者途路塞。城中冠盖尽相送，尘埃遮断长安陌。人生富贵岂有极，男儿要在能死国，不尔抽身早亦得。

君不见汉二疏，千载想慕传画图。即如草堂何处无，禄食腴窃胡为乎？

乃知我公真丈夫！呜呼，乃知我公真丈夫！（从横排宕，不求合法，自然中节，子由所云“千金战马，注波蓦涧，如履平地”者也。“英谋密语”十四字，是孝宗实录。）

【送李帅之云中】

黄风北来云气恶，云洲健儿夜吹角。将军按剑坐待曙，纥干山摇月半落。槽头马鸣士饭饱，昔无完衣今绣袄。沙场缓辔行射雕，秋草满地单于逃。

【送李中丞赴镇】

黄云横天海气恶，前飞鹞鸽后叫鹤。阴风夜撼医巫闾，晓来雪片如手落。中丞按辔东视师，躬历险隘挥熊貔。已严号令偃鼓角，更扫日月开旌旗。椎牛李牧将士跃，射虎李广匈奴知。屯田金城古不谬，卖剑渤海今其时。塞门萧萧风马鸣，长城雪残春草生。低飞鸿雁胡沙静，远遁鲸鲵瀚海清。不观小范擒戎日，谁信胸中十万兵！（北地最工起手，苍凉沉郁，神乎老杜。）

【上元访杜炼师】

宣王昔时乘八风，御龙游戏行烟空。马前两两侍玉女，别馆多在蓬莱宫。朝天宫中

旧时殿，楼台昼锁无人见。琉璃井塌青苔满，松柏森森月如练。呜呼往事难具陈，灯火如山又一春。北斗坛西访隐沦，我师黄衫白氍毹。坐我更致西楼宾，玉杯潋滟赤玛瑙，织罽四角银麒麟。酒肉山堆满堂醉，仙厨往往来八珍。孝宗之朝五真人，师也磊落当其伦。自言召见亲赐食，曾把丹书献紫宸。如今寂寞看春色，银鱼玉带无消息。岂惟鱼带无消息，欲语吞声泪沾臆。劝师对此莫酸辛，世间万事如转轮。且将芝草供生计，聊与烟霞作主人。月偏彩云当牖生，旋呼两童吹玉笙。闻师妙得逡巡术，百壶倒尽还须倾。古来仙子向谁在？饮者翻垂千载名。名垂千载亦区区，酒阑灯昏夜复徂。不见泰陵草已宿，春生树啼双老乌。此时亦应群帝趋，金灯翠旗光有无？（故君之思，写得神灵恍惚。）

【石将军战场歌】

清风店南逢父老，告我已巳年间事。店北犹存古战场，遗镞尚带勤王字。忆昔蒙尘实惨怛，反覆势如风雨至。

紫荆关头昼吹角，杀气军声满幽朔。胡儿饮马彰义门，烽火夜照燕山云。内有于尚书，外有石将军。石家官军若雷电，天清野旷来酣战。

朝廷既失紫荆关，吾民岂保清风店？牵爷负子无处逃，哭声震天风怒号。儿女床头伏鼓角，野人屋上看旌旄。将军此时挺戈出，杀敌不异草与蒿。

追北归来血洗刀，白日不动苍天高。万里烟尘一剑扫，父子英雄古来少。单于痛哭倒马关，羯奴半死飞狐道。处处欢声噪鼓旗，家家牛酒犒王师。

应追汉室嫖姚将，还忆唐家郭子仪。沉吟此事六十春，此地经过泪满巾。黄云落日古骨白，沙砾惨淡愁行人。行人来折战场柳，下马坐望居庸口。

却忆千官迎驾初，千乘万骑下皇都。乾坤得见中兴主，杀伐重开载造图。姓名应勒云台上，如此战功天下无。

呜呼战功今已无，安得再生此辈西备胡？（“追北归来”二语，扞之字字俱起洼棱。石亨跋扈伏法，臣节有亏。要之战功不可埋没，此特表其战功也。上皇返国，实由尚书之守，将军之战，作者特为表出。中云：“还忆唐家郭子仪”，以不失臣节愧之也。此作者微意。）

【玄明宫行】

今冬有人自京至，向我道说玄明宫。土木侈丽谁办此，乃令遗臭京城东。割夺面势创截堦，出入日月开帡幪。矫托敢与天子竞，立观忍将双阙同。前屹石柱双蟠龙，

飞梁透迤三彩虹。宝构合沓殿其后，俨如山岳翔天中。金银为堂玉布地，千门万户森相通。光景闪烁倏忽异，云烟鬼怪茺杳蒙。以东金榜祠更侈，树之松栢双梧桐。溟池岛屿鳣鲤跃，孔雀翡翠兼黑熊。那知势极有消歇，前日虎豹今沙虫。窗扉自开卫不守。人来游玩摇玲珑。陛隅龙兽折其角，近有盗换香炉铜。青苔生泥獬面锁，野鸽哺子雕花栊。忆昔此阍握乾柄，帝推赤心阍罔忠。威刑霹雳縉绅毒，自尊奴仆侯与公。变更累朝意叵测，掊克四海真困穷。长安夺地塞巷陌，心腹艳此阍何蒙。构结拟绝天下巧，搜剔遂尽输傭工。神厂择木内苑竭，官坑选石西山空。夷坟伐屋白日黑，挥汗如雨斤成风。转身唾骂阍得知，退朝督劳何匆匆。人心嗟怨入骨髓，鬼也孰敢安高崇？峨碑照耀颂何事，或有送男充道童。闻言怆恻黯无答，私痛圣祖开疆功。渠干威福开者谁？法典虽严奈怙终。锦衣玉食已叨窃，琳宫宝宇将安雄？何宫无碑镌护敕，来者但看玄明宫。（此为宦官刘瑾作也。铺陈盛衰，皆托他人之言；“闻言怆恻”以下，方入自己议论。痛惜祖训，垂戒后人，是大章法、大文字。明祖于宫门竖铁牌，使宦官不许干政。后成祖以建文内竖输君臣密谋，心甚德之，遂渐予事权。“渠干威福开者谁”，盖指此也。）

【林良画两角鹰歌】

百馀年来画禽鸟，后有吕纪前边昭。二子工似不工意，吮笔决眦分毫毛。林良写鸟只用墨，开缣半扫风云黑。水禽陆禽各臻妙，挂出满堂皆动色。空山古林江怒涛，两鹰突出霜崖高。整骨刷羽气势动，四壁六月生秋<风寿>。一鹰下视睛不转，已知两眼无秋毫。一鹰掉头复欲下，渐觉振翮风萧萧。匹绡虽惨谈，杀气不可灭。戴角森森爪拳铁，迥如愁胡眦欲裂。朔风吹沙秋草黄，安得臂尔骑驺馵？草间妖鸟尽击死，万里晴空洒毛血。我闻宋徽宗，亦善貌此鹰。后来失天子，饿死五国城。乃知图画小人艺，工意工似皆虚名。校猎驰骋亦末事，外作禽荒古有经。今王恭默罢游宴，讲经日御文华殿。南海西湖驰道荒，猎师虞长皆分贱。吕纪白首金炉边，日暮还家无酒钱。从来上智不贵物，淫巧岂敢陈王前？良乎良乎，宁使尔画不值钱，无令后世好画兼好畋。（从画说到猎，从猎开出议论，后画猎双收，何等章法！笔力亦如神龙蜿蜒，捕捉不住。）

【郑生至自泰山】

昨汝登东岳，何峰是绝峰？有无丈人石，几许大夫松？海日低波鸟，岩雷起窟龙。谁言天下小？化外亦王封。（陈语须此翻用法。）

【泰山】

俯首无齐鲁，东瞻海似杯。斗然一峰上，不信万山开。日抱扶桑跃，天横碣石来。君看秦始后，仍有汉皇台。（四十字有包络乾坤之概，可以作泰山诗矣。）

【浮江】

浮江晴放舸，挂席晓须风。日倒明波底，天平落镜中。开窗问赤壁，振柁失吴宫。万古滔滔意，浔阳更向东。

【明远楼春望】

贡院初开阁，春阴独倚栏。柳边千舰聚，花里万家残。风雨江声壮，兵戈地色寒。断肠沙雁北，群起向长安。（蒋仲舒云：“含愁无限。”）

【朱仙镇庙】

宋墓莽岑寂，岳宫今在兹。风霜留桧柏，阴雨见旌旗。百战回戈地，中原左衽时。土人严伏腊，偏护向南枝。

【得何子过湖南消息】

及遇荆门信，洞庭秋已凄。湘江绕苦竹，几听鹧鸪啼！马援留铜柱，王褒祀碧鸡。湖南冲瘴疠，药物去曾携。

【读直道陈公祚遗事】

上主能容直，当言敢顾身？累朝传谏疏，万死作归人。古庙秣花晚，孤坟劲草春。从来淹没士，特笔在词臣。

【野风】

山鸣野风至，汉水亦萧萧。月滉鱼龙醒，云蒸豺虎骄。有家惊节物，不寐想前朝。万古英雄迹，江城夜寂寥。

【出塞】

黄沙白草莽萧萧，青海银州杀气遥。关塞岂无秦日月？将军独数汉骠姚。往来饮马时寻窟，弓箭行人各在腰。晨发灵州更西望，贺兰千嶂果云霄。

【秋望】

黄河水绕汉边墙，河上秋风雁几行？客子过壕追野马，将军韬箭射天狼。黄尘古渡迷飞挽，白月横空冷战场。

闻道朔方多勇略，只今谁是郭汾阳？（王元美云：“雄浑流丽。”）

【潼关】

咸东天险设重关，闪日旌旗虎豹闲。隘地黄河吞渭水，炎天白雪压秦山。旧京想象千官入，余恨逡巡六国还。满眼非无弃繻者，寄言军吏莫嗔颜。

【灵武台】

环县城边灵武台，肃宗曾此辟蒿莱。二仪高下皇舆建，三极西南玉玺来。衣白山人经国计，朔方孤将出群才。可怜一带风云际，不劝君王驾鹤回。（咎肃宗之阙于子职也，语微而显。）

【艮岳篇】

宋家行殿此山头，千载来人水一丘。到眼黄蒿元玉砌，伤心锦缆有渔舟。金缯社稷和戎日，花石君臣弃国秋。漫倚南云望南土，古今龙战是中州。（人知南渡之庸懦，而不知覆亡之祸原于徽宗君臣之归乐也。五六语藏得议论。）

【台寺夏日】

古台高并郁嵒峣，断塔棱层锁寂寥。积雪洞门常惨惨，炎天松柏转萧萧。云雷画壁丹青壮，神鬼虚堂世代遥。惆怅宋宫偏泯灭，二灵哀怨不堪招。

【楚望望襄中形势】

楚望峰头望楚云，遥怜紫盖紫阳君。庐荒不断盘龙气，碑灭犹存堕泪文。地转江淮浮远戍，水通巴峡堑雄军。里名冠盖非吾事，愿访鹿门麋鹿群。

【送毛监察还朝，是时皇帝狩于杨河】

楚生临水送将归，黎子当筵赋《式微》。天下汝为真御史，百年吾是旧渔矶。沙寒白日蓬科转，风起黄河木叶稀。此去有书应力上，太平天子本垂衣。

【别徐子祯卿得江字】

我爱南州徐孺子，明瑶美璧世无双。新从北极看南极，便自吴江下楚江。日落鹧鸪啼庙口，水清斑竹映船窗。祢衡王粲俱黄土，千载何人复此邦？

【限韵赠黄子】

禁垣春日紫烟重，子昔为云我作龙。有酒每邀东省月，退朝曾对掖门松。十年放逐同梁苑，中夜悲歌泣孝宗。老体幸强黄犢健，柳吟花醉莫辞从。

【秋怀】

庆阳亦是先王地，城对东山不窞坟。白豹寨头惟皎月，野狐川北尽黄云。天清障塞收禾黍，日落溪山散马群。

回首可怜鼙鼓急，几时重起郭将军？

苑西辽后洗妆楼，槛外芳湖静不流。乱世君臣那在眼，异时松柏自深愁。雕阑玉柱留天女，锦石秋花隐御舟。万古中华还此地，我皇帝为扫神州。

【鄱阳湖十六韵】

太祖平陈日，楼船下此湖。波涛留壮色，天地见雄图。水上开黄屋，云中下赤乌。士犹询后载，戈已倒前徒。

力屈鲸鲵仆，声回雁鹜呼。横江收玉笋，跨海定金符。文轨遥通楚，梯航讫至吴。虎贲虽莫敌，龙战岂全辜？

血染犹丹草，骨沉空白芜。汀洲夜寂寂，霜月鬼呜呜。杀气鼉鼉徙，腥风岛屿孤。罾人拾古镞，艇客慨秋菰。

伟彼高光烈，还将萧邓须。英谋协睿算，勇奋想长驱。剑瘡神仍王，舟焚势与徂。康山巍庙在，忠武激顽夫。

【晓莺】

见睨梦中迷，流莺碧树西。起来红日照，已度别枝啼。

【塞上】

天设居庸百二关，祁连更隔万重山。

不知谁放呼延入，昨夜杨河大战还。

【夏口夜泊别友人】

黄鹤楼前日欲低，汉阳城树乱乌啼。孤舟夜泊东游客，恨杀长江不向西。

【汴京元夕】

中山孺子倚新妆，郑女燕姬独擅场。齐唱宪王《春乐府》，金梁桥外月如霜。

【圣节闻驾出塞】

千官北首望龙旗，万国车书集凤闱。八骏穆王秋色远，几时亲拥白狼归？

卷五

边贡字廷实，历城人。弘治丙辰进士，历官至南京户部尚书。

华泉边幅较狭，而风人遗韵，故自不乏。李、何、边、徐并名，有以也。

【再送王文熙】

夜久河汉横，春堂别灯黯。风凄鸟初动，露重花犹敛。明发不在兹，重关为谁掩？

【赠尚子】

意气凭陵一当百，关西儒生五陵客。

少年学书复学剑，老大蹉跎双鬓白。门下诸生半赐麻，闺中小妇犹炊麦。布衣东来谒天子，春日醉卧长安陌。陌头花絮夕纷纷，琼阁如天隔紫云。

浩歌翩然却归去，眼底谁是平原君？

【送马敬湖赴河南提学】

征马带落日，出门君已遥。层城不隔梦，夜夜芦沟桥。芦沟桥边车簇簇，故人都在城南宿。谁令相见转多情，翻恨迟行不如速。江汉风烟迟早春，关山雨雪暗边尘。临歧莫动殊方感，余亦东西南北人。

【运夫谣送方文玉督运】

运船户，来何暮？江上旱风多，春涛不可渡。里河有闸外有滩，断篙折缆腰环环。夜防鼠，日防漏，粮册分明算升斗。官家但恨仓廩贫，不知淮南人食人！官家但知征戍苦，力尽谁怜运船户？（原本无运船户三字，疑脱）运船户，尔勿哀，司农使者天边来！

【出郭将访希准郡伯，薄暮而返却寄】

驾言江口出，却至水西还。远道空回首，重门欲上关。断云低白雁，斜日近青山。欲采瑶华赠，仙舟不可攀。

【留别张西盘大参】

满酌岂辞醉？未行先忆君。

山城稀见菊，关树不开云。地入河源渺，天连塞日曛。

那堪北来雁，偏向别时闻。（“关树不开云”更胜“楚云高不落”句。）

【送都玄敬】

驱马别君处，秋阴当暮生。林柯无静叶，江雁有归声。

绿水阊门道，青山建业城。未能同理楫，延伫独含情。

【幽寂】

幽寂耽蓬户，凄凉怀旧吟。莺啼非故国，草色乱春心。落日黄云暮，阴风碧海深。嗷嗷北来雁，二月有归音。

【人日有怀乔白岩侍郎】

去年人日题诗处，郑氏茅堂春可怜。出谷早莺啼恰恰，映风寒竹倚娟娟。随銮并入青云上，解珮同归素雪前。此日寂寥惊旅食，坐看庭月怗流年。（以“去年”领起，以“此日”作收，章法本唐人韦端己《忆昔》诗。）

【谒文山祠】

丞相英灵迥未消，绛帷灯火飒寒飙。黄冠日月胡云断，碧血山河龙驭遥。花外子规燕市月，水边精卫浙江潮。

祠堂亦有西湖树，不遣南枝向北朝。（后半神到，吊信国诗此为第一。起句及三四卧子改本。）

【重赠吴国宾】

汉江明月照归人，万里秋风一叶身。休把客衣轻浣濯，此中犹有帝京尘。（婉而挚，视“素衣化为缁”，用意各别。）

【嫦娥】

（自注：时外舅胡观察谢政家居，寄此通慰。）

月宫秋冷桂团团，岁岁花开只自攀。共在人间说天上，不知天上忆人间。

【迎銮曲】

弓如满月向江开，箭插寒潮卷浪回。水上鼉鼉莫深避，吾皇原为射蛟来。

顾璘

璘字华玉，先世吴县人，徙南京。弘治丙辰进士，历官至南京刑部尚书。

【度枫木岭】

初指山拂天，飞鸟不可度。艰苦蹶危磴，即是我行路。

百折频攀援，十步九回顾。峻嶒忽在下，衣襟带云雾。倒景犹照人，平地黯将暮。东北望故乡，江流莽倾注。

长风万里来，独立难久伫。

【庚辰元旦】

诸侯玉帛会长安，天子南巡历壮观。共想正元趋紫殿，翻劳边将从金鞍。

沧江饮马波先静，《黄竹》回銮雪未干。

北极巍巍天咫尺，五云长护凤楼寒。（应是宁庶人已擒，而武宗犹巡游不返，故有此作。）

【归自灌阳望湘山口号】

十日别湘山，见如故人面。

何况石头城，是依旧乡县！

王守仁

守仁字伯安，余姚人。弘治己未进士，授兵部主事。忤刘瑾，廷杖，谪贵州龙场驿丞，旋复官。历仕至左佥都御史，巡抚南赣。平宸濠，擢南京兵部尚书，封新建伯。赠侯，谥文成，从祀孔庙。

【登泰山】

晓登泰山道，行行入烟霏。阳光散岩壑，秋容淡相辉。长风吹海色，飘飘送天衣。峰顶动笙乐，青童两相依。振衣将往从，凌云忽高飞。挥手若相待，怅望未能归。（太白）

【登阅江楼】

绝顶楼荒旧有名，高皇曾此驻龙旌。险存道德虚天堑，守在蛮夷岂石城？山色古今余王气，江流天地变秋声。

登临授简谁能赋？千古新亭一怆情！

【龙潭夜坐】

何处花香入夜清？石林茅屋隔溪声。幽人月出每孤往，栖鸟山空时一鸣。

草露不辞芒屦湿，松风偏与葛衣轻。临流欲写《猗兰》意，江北江南无限情。

何景明景明字仲默，信阳人。弘治壬戌进士，官至陕西提学副使。

北地诗以雄浑胜，信阳诗以秀朗胜。同是宪章少陵，而所造各异。薛君采云：“俊逸终怜何大复，粗豪不解李空同。”任意抑扬，诂为定论？洪宣以后，诗教日衰，虽李西涯起而振之，终未能力挽流俗。向微李、何二家，蛙声紫色，窃据坛坫，流极何所底耶！凡信口揶揄者，其论吾不敢取。

【塘上行】

蒲生寒塘流，日与浮萍俦。风波摇其根，飘转似客游。客游在万里，日夕望故州。鸕鶒鸣岁暮，蟋蟀知凛秋。暑退厌絺绤，寒至思重裘。佳人不与处，圆魄忽已周。房栊凄鸣玉，纨素谁为收？白云如车盖，冉冉东北浮。安得云中雁，尺泉寄离愁！

【种麻篇】

种麻冀满丘，种葵冀满园，孤生易憔悴，独立多忧患。当行思故旅，当食思故欢。先机失所豫，临事徒嗟叹。升萧艾乃至，锄桂致伤兰。物理有相附，畴能识其端？断金俟同志，抱玉难自宣。交结良匪易，君当图未然。（陈卧子云：陈思君子之遗。）

【捣衣】

凉飙吹闺闼，夕露凄锦衾。言念无衣客，岁暮方寒侵。皓腕约长袖，雅步饰鸣金。寒机裂霜素，繁杵叩清砧。哀音缘云发，断响随风沉。顾影惜流月，仰盼愁横参。路长魂屡徂，夜久力不任。君子万里身，贱妾万里心。灯前挥妙匹，运思一何深！裁以金剪刀，缝以素丝针。愿为合欢带，得傍君衣襟。（陈卧子云：“蕙心兰质，绮罗如在，元美所谓‘却扇一顾’时也。”）

【咏怀】

寂寂沅湘流，长江上有枫。青蕙缘广隰，绿衡被洲中。扬舲泛烟沚，遥瞻二妃宫。二妃何婉孌，攀馨振微风。解珮遗下女，将以明我衷。光彩不易合，精诚渺难通。浮云蔽江皋，白日忽已晚。还顾苍梧原，何时翠华返？

【立春日作】

蔼蔼春候至，天气和且清。端居抚流化，允惬静者情。浮阳起丛壑，流烟散孤城。岸条发潜颖，园卉含初荣。写襟旷明霁，览物纾游行。目悦双飞雉，耳感孤鸣莺。形运自相代，神理谁为名？往规与时逝，来虑随年并。心存汉阴灌，躬学南阳耕。疏还念知止，庄论持达生。自非秉昭旷，能不婴世营！

【送崔氏】

飘飘山上葛，累累田中瓠。苟非同根蒂，缠绵安得固？人情易反复，结交有新故。嗟哉夙昔好，乖弃在中路。明珠倘无因，按剑不我顾。深言匪由衷，白首为所误。亮君勛恒德，永副平生慕。

【泊云阳江头玩月】

扁舟泊沙岸，皓月出翠岭。开窗鉴清辉，照我孤烛冷。高林散疏光，远渚接余景。纵横银汉回，三五玉绳耿。弦望几更易，客行尚殊境。佳期邈山岳，端坐令人省。

【姜子岭至三垒】

出岭上云霓，入溪下烟岚。高高不可极，杳杳讵能探？朱崖秀夏木，石壁映寒潭。千林览葱蒨，百丈窥澄涵。崩奔谷响赴，隐曜川光含。登陟力不辞，险阻情已谙。潜渊羨垂纶，越巘思停骖。振策岷峨西，扬帆江汉南。临深匪忘惧，履坦但怀惭。

【青石崖栈】

侧行青石栈，谁能久延伫？断板连曳云，喷泉洒飞雨。迅流西回激，峻坂东折屡。

隤岸互倾欹，危梁裊撑拄。饮猿骇游鳞，立马接翔羽。

慎尔千金躯，永念垂堂语。（信阳五言古有三谢体，有少陵体。此连上章，乃少陵体也。）

【侠客行】

朝入主人门，暮入主人门，思杀主仇谢主恩。主人张灯夜开宴，千金为寿百金钱。秋堂露下月出高，起视厩中有骏马，匣中有宝刀，拔刀跃马门前路，投主黄金去不顾。（生气全涌，音节亦健劲。）

【秋江词】

烟渺渺，碧波远。白露晞，翠莎晚。泛绿漪，蒹葭浅。

涌风吹帽寒发短。美人立，江中流。暮雨帆樯江上舟，夕阳帘栊江上楼。舟中采莲红藕香，楼前踏翠芳草愁。

芳草愁，西风起。芙蓉花，落秋水。

江白如练月如洗，醉下烟波千万里。（“美人娟娟隔秋水”，风度似之，温飞卿乐府过于旖旎，诗格转不逮也。一本节去末二语，更有馀韵。）

【明月篇】

仆始读杜子七言诗，爱其陈事切实，布词沉著。鄙心窃效之，以为长篇圣于子美矣。既而读汉魏以来歌诗及唐初四子者之所为而反复之，则知汉魏固承《三百篇》之后，流风犹可征焉。而四子者，虽工富丽，去古远甚。至其音节，往往可歌。乃知子美词固沉著，而调失流转。虽成一家语，实则歌诗之变体也。夫诗本性情而发者也，其切而易见者，莫如夫妇之间。是以《三百篇》首乎《关雎》，六义始乎《风》。而汉魏作者，义关君臣朋友，辞必托诸夫妇，以宣郁而达情焉，其旨远矣。由是言之，子美之诗，博涉世故，而出于夫妇者常少；致兼《雅》、《颂》，而风人之意或缺。此其调或反在四子下与！暇日为此篇，意调若仿佛四子，而才质猥弱，思致庸陋，故摘词芜紊，无复统饬。姑录之以俟审音者裁割焉。不可不知此论。新城王阮亭论诗云：“接迹风人《明月篇》，何郎妙悟本从天。王杨卢骆当时体，莫

逐刀圭误后贤。”真不被前人瞒过。

长安月，离离出海峤。遥见层城隐半轮，渐看阿阁衔初照。潋潋黄金波，团栾白玉盘。青天流影披红蕊，白露含辉泛紫兰。紫兰红蕊西风起，九衢夹道秋如水。锦幌高褰香雾浓，琐闼斜映轻霞举。雾沉霞落天宇开，万户千门月明里。月明皎皎陌东西，柏寝岩峤望不迷。侯家台榭光先满，戚里笙歌影乍低。濯濯芙蓉生玉沼，娟娟杨柳覆金堤。凤凰楼上吹箫女，蟋蟀堂前织锦妻。别有深宫闭深院，年年岁岁愁相见。金屋萤流长信阶，绮枕燕入昭阳殿。赵女通宵侍御床，班姬此夕悲团扇。秋来明月照金微，榆黄沙白路逶迤。征夫塞上行怜影，少妇窗前想画眉。上林鸿雁书中恨，北地关山笛里悲。书中笛里空相忆，几见盈亏泪沾臆。红闺貌减落春华，玉门肠断逢秋色。春华秋色递如流，东家怨女上妆楼。流苏帐卷初安镜，翡翠帘开自上钩。河边织女期七夕，天上嫦娥奈九秋。七夕风涛还可渡，九秋霜露迥生愁。九秋七夕须臾易，盛年一去真堪惜。可怜扬彩入罗帏，可怜流素凝瑶席。未作当垆卖酒人，难邀入座援琴客。客心对此叹蹉跎，乌鹊南飞可奈何！江头商妇移船待，湖上佳人挟瑟歌。此时凭阑垂玉箸，此时灭烛敛青蛾。玉箸青蛾苦絀怨，絀怨含情不能吐。丽色春妍桃李蹊，迟辉晚媚菖蒲浦。与君相思在二八，与君相期在三五。空持夜被贴鸳鸯，空持暖玉擎鹦鹉。青衫泣掩琵琶弦，银屏忍对箜篌语。箜篌再弹月已微，穿廊入闼霭斜辉。归心日远大刀折，极目天涯破镜飞。

【易水行】

寒风夕吹易水波，渐离击筑荆卿歌。白衣洒泪当祖路，日落登车去不顾。秦王殿上开地图，舞阳色沮那敢呼？手持匕首摘铜柱，事已不成空骂倨。吁嗟呼！燕丹寡谋当灭身，田光自刎何足云？惜哉枉杀樊将军！（三语千古断案。）

【大梁行】

朝登古城口，夕藉古城草。日落独见长河流，尘起遥观大梁道。大梁自古号名区，富贵繁华代不殊。高楼歌舞三千户，夹道烟花十二衢。合沓轮蹄交紫陌，鸣钟暮入王侯宅。红妆不让掌中人，珠履皆为门下客。片言立赐万黄金，一笑还酬双白璧。带甲连营杀气寒，君王推毂将登坛。弯弓自信成功易，拔剑那知报怨难？已见分符连楚越，更闻飞檄救邯郸。一朝运去同衰贱，意气雄豪似惊电。杨花飞入侯嬴馆，草色凄迷魏王殿。万骑千乘空云屯，绮构朱甍不复存。夜雨人归朱亥里，秋风客散信陵门。川原百代重回首，宋寝隋宫亦何有？游鹿时衔内苑花，行人尚折繁台柳。繁台下接古城西，春深桃李自成蹊。朝来忽见东风起，薄暮飞花满故堤。

【岁晏行】

旧岁已晏新岁逼，山城雪飞北风烈。徭夫河边行且哭，沙寒水冰冻伤骨。长官叫号

吏驰突，府帖连催筑河卒。

一年征求不少蠲，贫家卖男富卖田。白金纵有非地产，一两已值千铜钱。往时人家有储粟，今岁人家饭不足。饥鹤翻飞不畏人，老鸦鸣噪日近屋。

生男长成聚比邻，生女落地思嫁人。官家私家各有务，百岁岂止疗一身？近闻狐兔亦征及，列网持罾遍山域。野人知田不知猎，蓬矢桑弓射不得。

嗟吁今昔岂异情？昔时新年歌满城。明朝亦是新年到，北舍东邻闻哭声。

【陇右行送徐少参】

陇右地，长安西行一千里。秦日长城号塞垣，汉时故郡称天水。圣朝扫荡无烽烟，射猎之地为桑田。熟羌卖马尝入塞，将军游骑不出边。知君风采古遗爱，扬策传符度关内。父老三秦望节来，犬戎诸夷遮马拜。开藩分道镇边尘，居守巡行历几春。熊轼朱幡今岳伯，豸冠白笔旧台臣。瓦亭之西半山谷，土室阴阴连板屋。落月孤表渭源，寒云古磧黄河曲。十年此地曾游歌，别来风物今如何？竹花秋临鸟鼠穴，杨叶夕渡鱼龙波。回看万里风云色，少小趋庭泪沾臆。相送悲吟不尽情，关山陇坂高无极。

【津市打鱼歌】

大船峨峨系江岸，鲇魴鱖收百万。小船取速不取多，往来抛网如掷梭。野人无船住水浒，织竹为梁数如罟。夜来水长没沙背，津市家家有鱼卖。江边酒楼燕估客，割髻斫鲙不论百。楚姬玉手挥霜刀，雪花错落金盘高。邻家思妇清晨起，买得兰江一双鲤。篴篴红尾三尺长，操刀具案不忍伤。呼童放鲤激波去，寄我素书向郎处。

【吴伟飞泉画图歌】

长安独过田子舍，留我一玩飞泉画。绝壁如闻风雨来，晴天安得蛟龙挂？吴生跌宕得画理，潦草落笔皆可喜。飞泉却出沓嶂间，山即真山水真水。客堂六月生昼寒，耳中仿佛高江滩。源潭窈窕不可测，波浪汹涌多奇观。泉边二老颜色异，偶坐似是庄与惠。万里谁论到海心，百年讎识临渊意？伟哉田子今儒宗，文标南指匡庐峰。不须对此更惆怅，会观瀑布青天上。杉风松日隔缥缈，云泂雪瀛何雄壮！我常梦往神空向。岂无吴生好手笔，为我写寄庐山障？

【胡人猎图歌】

边沙萧萧天北风，高林昼屯鞍马雄。胡人装束身手健，真与此图形貌同。冬寒猎傍

长城窟，城下平原日将没。呼鹰放犬无不为，数骑弯弓竞驰突。月高琵琶海西城，拂庐雪干氍毹轻。金钟虏酒亦易醉，玉胡骝骄不行。白发老胡黄战裙，抽箭仰视天山云。众中若认射雕手，汉家谁是李将军？

【皇陵】

陵阙皇灵，山河王气遥。万年龙虎抱，每夜鬼神朝。玉碗留天地，金灯照寂寥。如看翠华度，缥缈在青霄。（足继《行次昭陵》之作。）

【武关】

北转趋刘垓，西盘山武关。微茫一线路，回合万重山。天地几龙战，风云惟鸟还。关门锁溪水，日夜送潺湲。

【峡中】

自昔偏安地，于今息战侵。江穿巫峡隘，山凿鬼门深。浊浪鱼龙黑，寒天日月阴。夜猿啼不尽，凄断故乡心。

【昭烈庙】

漂泊依刘计，间关入蜀身。中原无社稷，乱世有君臣。峡路元通楚，岷江不向秦。空山一祠宇，寂寞翠华春。（黄清甫云：“匪直侘词，亦存名教。”）

【登楼凤县作】

近讯中原使，兼登万里楼。朝廷仍北极，行在且南州。峡断风云隔，江通日月流。如闻乘八骏，早晚向昆丘。（此为武宗南幸而作。）

【怀沈子】

沈生南国去，别我独凄然。落月清江树，归人何处船？十年安陆舍，数口太湖田。想到乡园日，生涯亦可怜。

【答望之】

念汝书难达，登楼望欲迷。天寒一雁至，日暮万行啼。饥饉饶群盗，征求及寡妻。江湖更摇落，何处可安栖？

【送贾郡博之阶州】

十载一儒官，西行路复难。羌夷应俎豆，边徼有衣冠。陇坂盘云上，秦城向斗看。好音怀万里，早晚报长安。

【得王子衡赣榆书】

万里一书札，逾年传帝都。窜身天地远，垂泪海云孤。柳送燕台骏，花留汉殿凫。赤霄终道路，白发且江湖。

【雨夜】

院静闻疏雨，林高纳远风。

秋声连蟋蟀，寒色上梧桐。短榻孤灯里，清笳万井中。天涯未归客，此夜忆江东。

【送曹端卿谪寻甸】

逐客滇南郡，云天此路长。高秋行万里，落日泪千行。作赋投湘水，题书寄夜郎。殊方气候异，去矣慎风霜。

【关门】

虎卫关门迥，龙沙塞曲深。风云时有气，日月昼常阴。中使西来讯，千官北望心。天寒汉宫阙，翠盖忆春临。

【送彭总制之西川】

蜀道青天上，岷山赤日西。九重连授钺，万里动征鼙。开府松杉静，悬军玉垒低。知公安蜀计，诸葛大名齐。（杨用修云：“森严庄重。”）

【安庄道中】

处处人家空薜萝，几年凋弊扰干戈。山过白水峰峦峻，路入盘江瘴疠多。岭徼土风连百粤，郊原人语杂诸罗。侧身西望看铜柱，此地曾经马伏波。

【岳阳】

楚水滇池经万里，使车重喜过巴丘。千家树色浮山郭，七月涛声入郡楼。寺里亭台

多旧主，城中冠盖半同游。明朝又下章华路，江月湖烟绾别愁。

【送雷长史】

彤管先朝随帝子，白头今日奉王孙。汉庭亦羡相如美，楚客重看贾傅尊。花下图书开玉殿，日高琴瑟在朱门。十年亭阁淮西宴，肠断梁王雪夜樽。（可匹空同“中夜悲歌”之咏。）

【送卫进士推武昌】

少年佐郡楚城居，十郡风流尽不如。此去且随彭蠡雁，何须不食武昌鱼？仙人楼阁春云里，估客帆墙晚照余。大别山前汉江水，画帘终日对清虚。（明秀。）

【送陆舍人使吴下】

柳拂清江画鹢飞，节旄更喜便南归。回风树里吹官骑，返照河边上客衣。北固楼台秋寺遍，长洲花草故宫非。登临莫怪多词赋，吴下才人是陆机。

【武昌闻边报】

传闻广骑近长安，北伐朝廷已命官。路绕居庸烽火暗，城高山海戍楼寒。一时边将当关少，六月王师出塞难。先帝恩深能养士，请缨谁为系楼兰？

【怀寄边子】

汝从元岁侍君王，谁念先朝老奉常？一出云霄空怅望，十年歧路各苍茫。春天缥缈金茎露，昼日氤氲紫殿香。独有扬雄尚陪从，白头抽笔赋《长杨》。

【得献吉江西书】

近得寻阳江上书，遥思李白更愁予。天边魑魅窥人过，日暮鼃鼃傍客居。鼓舵襄江应未得，买田阳羨定何如？他年淮水能相访，桐柏山中共结庐。（神来之作，不以工拙论，所谓章法之妙不见句法者。信阳谓不读唐以后诗，然买田阳羨，自属唐以后事，可知只是议论之高。）

【刘德徵上陵还有赠】

仙郎昨日五陵归，骏马朝回独掩扉。已向西山瞻帝寝，更从北极眺王畿。霜钟涧壑流清汉，玉殿松杉眇翠微。先帝侍臣零落尽，泰园宫草日霏霏。

【登楼观阁，时王令明叔邀张用昭、段德光、王敬夫、康德涵四子同游】

峻阁含风落照孤，凭高千里视平芜。凤笙锦曲春缥缈，瑶草金光昼有无。采药几时寻碧海？种桃无复问玄都。五陵冠剑豪游地，犹是长安旧酒徒。

【秋兴】

汉水东驰入楚来，长沙秋望洞庭开。江清楼阁中流见，日落帆樯万里回。去国尚思王粲赋，逢时空惜贾生才。湘南两度曾游地，惆怅烟花暮转哀。

前岁今皇新御极，凤衔恩诏出明廷。孤槎奉使日南国，万里题诗天畔亭。地入金沙江浩浩，风连铜柱海冥冥。昆明亦在滇城里，池上虚疑织女星。

【鲋鱼】

五月鲋鱼已至燕，荔枝卢橘未能先。赐鲜遍及中珰第，荐熟应开寝庙筵。白日风尘驰驿骑，炎天冰雪护江船。银鳞细骨堪怜汝，玉箸金盘敢望传？（赐及中珰，而寝庙未荐，则波及臣家益无望矣。中含讽谕，不同寻常赋物。少陵“西蜀樱桃”一种作法。）

【长安】

白云望不尽，高楼空倚阑。中宵鸿雁过，来处是长安。（忠爱。）

【竹枝词】

十二峰头秋草荒，冷烟寒月过瞿塘。青枫江上孤舟客，不听猿声亦断肠。

【送韩汝庆还关中】

华岳云台万里情，高秋落日眺秦城。

黄河一线通沧海，身在仙人掌上行。

【别相饯诸友】

双井山边送客时，满林风雪倍相思。西行万里遥回首，太华终南落日迟。（只写景而离情自现，得唐贤三昧矣。）

王廷相

廷相字子衡，浚川人。弘治壬戌进士，历官至兵部尚书，加太子太保。谥肃敏。

【赭袍将军谣】

万寿山前擂大鼓，赭袍将军号威武，三边健儿猛如虎。左提戈，右张弩，外廷言之赭袍怒。牙旗闪闪军门开，紫茸罩甲如云排。大同来？宣府来？（即空同《内教场歌》意。）

【秋日巴中旅行】

巴东秋气早，行客已凄凄。江险深三峡，云寒暗五溪。中原无雁至，异国足猿啼。况近乌蛮塞，连年尚鼓鼙。

【登台】

古人不可见，还上古时台。

九月悲风发，三江候雁来。浮云通百粤，寒日隐蓬莱。逐客音书断，凭高首重回。

【初见白发】

日日风尘色，劳劳簿领身。不知清镜里，已作二毛人。

【宫怨】

夜辇昭阳月，春筵上苑花。不成供奉日，枉自学琵琶！

【古陵】

古陵在蒿下，啼乌在蒿上。陵中人不闻，行客自惆怅。（可当。《蒿里曲》。故作旷达，语倍凄惋。）

卷六

徐祯卿祯卿字昌穀，吴县人。弘治乙丑进士，官国子博士。

迪功诗，大不及李，高不及何，而丰骨超然，故应鼎足。朱锡鬯云：“人所应有尽有，人所应无尽无，大复是也。人所应有尽有，人所应无尽无，空同是也。人所应有所不尽，人所应无尽无，迪功是也。”三人分量自见。钱牧斋左袒吴下，而排斥北地；王阮亭以“文章江左”、“烟月扬州”二语为吴体之卑卑者，彼此皆属偏见。北地自有异人，吴体非必卑卑也。

【杂谣】

夫为虏，妻为囚，少妇出门走，道逢爷娘不敢收。东市街，西市街，黄符下，使者来。狗舐舐，鸡鸣飞上屋，风吹门前草肃肃。（陈卧子云：“此纪正德五年八月之变。”）

【留别边子】

我车驾言迈，将子城之隅。岂无他人亲？卷恋心自知。握手一为叹，忽忽从此辞。

驱车何迢迢，迢迢复迟迟。匪我车轮迟，行子有所思。登高望河水，河水何弥弥？褰裳欲涉之，俯首以踟蹰。

孤杨生河干，袅袅何参差？

民生失俦匹，惻尔令心悲。“褰裳欲涉”下忽著比体，此古人章法。

【寄华玉】

去岁君为蓟门客，燕山雪暗秦云白。马上相逢脱紫貂，朝回沽酒城南陌。

燕山此日雪纷纷，只见秦云不见君。胡天白雁南飞尽，千里相思那得闻？

【送士选侍御】

壮士乐长征，门前边马鸣。

春风三月柳，吹暗大同城。芦沟桥下东流水，故人一尊情未已。胡天飞尽陇头云，唯见居庸暮山紫。羡君鞍马速流星，予亦孤帆下洞庭。

塞北荆南心万里，佩刀长揖向都亭。

【青门歌送吴郎】

吴郎醉嗜长安酒，落魄自言为客久。走马频看上苑花，回鞭几折青门柳。

青门瞳瞳鱼钥开，乳燕游丝相逐来。柳下雕鞍留别袂，花间酒盏覆苍苔。浮云去去辞城阙，芳草连天那可歇？野店春风听早莺，关河晓树悬星月。

千里淮流双画桡，广陵驿前逢暮潮。落日帆归扬子渡，青山家对伯通桥。吾家流水元非隔，宛转胥台通巷陌。草长难寻仲蔚居，林深不辨陶潜宅。

清溪屋下可垂纶，复有莼羹足献亲。君归倘食冰丝鲙，为念羁栖塞北人。

【从吴学士侄奎观模米襄阳山水图并学士题识】

昔上黄鹤楼，西望襄阳堤。襄阳草树淡于染，清猿落日令人迷。归来复见襄阳画，银海珠源恍余派。楚山沉沉烟雾高，淋漓七泽翻波涛。鱼舟贾舶入点缀，竹林枫树悬江皋。白云缥缈苍梧遥，旖如湘君垂素旄。我欲乘云向空举，拄杖呼云云不起。山中薜萝不可亲，怅望伊人隔秋水。延陵学士襄阳俦，对此踟蹰搔白头。碧山心期竟已矣，回首岁月成荒丘。犹有篇章未磨灭，教人空忆旧风流。

【古意】

空为郢中客，不见郢中吟。美人高堂上，自奏山水音。帝子葬何处，潇湘云正深。

寂寥谁共赏？江上独伤心。

【彭蠡】

茫茫彭蠡口，隐隐鄱阳岑。地涌三辰动，江连九派深。

扬舲武昌客，兴发《豫章吟》。不见垂纶叟，烟波空我心。

【在武昌作】

洞庭叶未下，潇湘秋欲生。

高斋今夜雨，独卧武昌城。重以桑梓念，凄其江汉情。

不知天外雁，何事乐长征？（李舒章云：“八句竟不可断。”五言律皆孟襄阳遗法，纯以气格胜人。）

【长陵西望泰陵】

昔送宫车出，长悲西雍门。

今来寒食节，独望霸陵园。杳杳仙城闭，萋萋封树繁。

当时侍从客，恸哭几人存。（隔句对，泯然无痕。忠爱之意，溢于言表。）

【送范静之迁威州】

吾怜范巨卿，惆怅不邀名。

作吏竹林下，清风讼狱平。与君同得罪，独窜夜郎城。万里巴江水，相思猿狖鸣。

【酬边太常于燕山见忆之作】

故人惠思我，百里寄瑶音。独在山中宿，松斋清道心。霜钟流夜壑，曲涧入幽琴。寂寞悲千古，桥陵梓椁深。

【送友人还吴】

阳月随阳鸟，遥从塞上来。

北人江北望，不见陇头梅。坐下杨朱泪，吟为庄舄哀。聊传数行札，千里送君回。

【月】

故园今夜月，迢递向人明。只自悬清汉，那知隔凤城？气兼风露发，光逼曙乌惊。何事江山外，能催白发生！

【送盛斯徵赴长沙】

昔愁越隼千峰仄，转入巴渝万里赊。岂料圣恩怜贾谊，犹烦佐郡出长沙。蛮中瘴远三湘水，江畔春逢十月花。

遥听岳阳楼上笛，可能回首忆京华。（送人每以忠爱勉之，此立言之体。）

【送耿晦之守湖州】

远下吴江向雪川，高秋风物倍澄鲜。

菰叶翠相乱，锦石游鳞清可怜。邮渚挝频津吏鼓，渔歌唱近使君船。

吴兴岷山足胜事，汉水襄阳空昔贤。（不点湖州故实，而山水清远，宛然在目。高季迪“疏柳一旗江上酒，乱山孤棹道中诗”自是佳句，然不必定是湖州诗也。）

【赠别献吉】

尔放金鸡别帝乡，何如李白在浔阳？日暮经过燕赵客，解裘同醉酒垆傍。徘徊桂树凉飙发，仰视明河秋夜长。

此去梁园逢雨雪，知予遥度赤城梁。

【古宫词】

兴庆池头漏未阑，梨园子弟曲将残。花前更奏凉州伎，无那西宫月色寒。

【春思】

渺渺春江空落晖，行人相顾欲沾衣。楚王宫外千条柳，不遣飞花送客归。

【济上作】

两年为客逢秋节，千里孤舟济水旁。忽见黄花倍惆怅，故园明日又重阳。（语不必深而情深，唐人身份如此。）

【安南歌送沈使君】

借问炎交路若何？片帆南指广州过。知君怕见桄榔树，近岭猿声日渐多。

乌蛮滩上烟水声，伏波庙前秋月明。夜半津人挽舟上，夷歌偏动望乡情。

【送萧若愚】

送君南下巴渝深，予亦迢迢湘水心。

前路不知何地别，千山万壑暮猿吟。（与何大复“太华、终南”之篇，可云双美。）

殷云霄云霄字近夫，寿张人。弘治乙丑进士，官南工科给事中。

【春望】

二月澄江春水深，北孤山头云阴阴。北孤山头云作雨，我欲渡江愁我心。

孟洋洋字望之，信阳人。弘治乙丑进士，官至南京大理寺卿。

【烟】

湘流落日外，沙迥暮生烟。杳杳千峰失，霏霏万壑连。鹊翻知浦树，人语辨江船。暗里猿声起，愁深夜不眠。

王韦韦字钦佩，上元人。弘治乙丑进士，官至太仆少卿。

【阁试春阴诗】

皇都三月春正深，东风酿暖淑气侵。

曙光溟蒙露华满，轻云阁日天沉沉。野色垂垂十余里，草绿柔茵低迤迤。半空落絮湿未扬，百丈游丝寒不起。鹁鸪枝上相踏鸣，若与此景偏多情。

空庭帘卷昼亦暝，隔墙惟见桃花明。小院门闲莺自语，画栋泥香燕初乳。苔花苍润上帘栊，蒙蒙经雨还未雨。含情伫立凭阑干，远峰漠漠登楼看。

碧窗窈窕银屏冷，金帐促回翠袖单。檐影频移暝云动，曲枕悠然醒午梦。

起来小立傍闲阶，花雾袭衣寒气重。（末二语，李西涯批其卷云：“如有神助。”）

【柳枝词】

渭水西来万里遥，行人归去水迢迢。

垂杨不系离情住，只送飞花过渭桥。

郑善夫

善夫字继之，闽县人。弘治乙丑进士，除礼部主事，以谏南巡杖阙下。寻乞归。用荐起南京刑部郎中，改吏部。少谷以杜为师，然过于质直，去风雅或远。

【初离京邑留别诸同志】

驱车遵城，振策率广路。仰盼孤云征，俯见波流溯。感念平生欢，岂以杯酒故？群居不自察，相失增怨慕。川河引舟楫，陵陆旷烟雾，重覩难可寻，努力敷襟素。

【送苏侍御从仁使蜀】

骢马今何去？玄冥岁已残。风云行剑阁，钲鼓动松潘。事在西戎部，功亏旧将坛。怀柔亦边略，要识圣恩宽。

【秋夜】

七月欲尽天气清，残月未上江犹明。流萤渡水不一点，玄蝉咽秋无数声。独客尚未送贫贱，四方况是多甲兵。立罢西风夜无寐，吴淞袅袅感人情。（颇唐似杜。）

【棹歌】

青螺江头游子吟，黄金台上秋云深。风尘一别一万里，美人驾车伤我心。

孙一元

一元字太初，不知何许人，或曰安化王孙也，自号太白山人。尝西入华，南入衡，东登岱，又南入吴，终于吴兴。

【访樵者】

远寻山中樵，不识山中路。隔林伐木声，遥忆林深处。不晤竟空归，日堕西陵树。

【晚霁】

晚来雨初霁，烟火隔林微。一径牛羊入，孤村桑柘稀。长天下远水，积雾带岩扉。月黑闻人语，溪南种树归。

韩邦靖

邦靖字汝庆，朝邑人。正德戊辰进士，除工部员外。以直言系锦衣狱，夺官。后起山西左参政。

【关中】

不得秦中信，今传关内兵。

不得秦中信，今传关内兵。饥荒失抚御，盗贼遂纵横。渭北何由定，商南岂可行？不知今日将，谁是汉长城。

张含字愈光，永昌人。正德丁卯中云南乡试。

【己亥秋月寄杨升庵】

金马秋风十载余，芙蓉深巷闭门居。

登楼莫作依刘赋，奉使曾传谕蜀书。卧病可怜天一柱，独醒无奈楚三闾。比来消息风尘断，白首沧江学钓鱼。

胡纘宗

纘宗字孝思，巩昌人。正德戊辰进士，历官至右副都御使。乘舆幸楚，纘宗作诗纪事，为人告讦，下狱，寻放归。

【登天柱阁】

与客上江楼，横江山欲浮。云当天柱出，月傍小孤流。帆外收吴楚，尊前落斗牛。弥漫忽千里，倚槛思悠悠。

戴冠

冠字仲鹞，信阳人。正德戊辰进士，授户部主事。以建言贬广东乌石驿丞。起官，终山东提学副使。

【立春日舟中题】

作客尚无地，他乡空复春。舟中儿女大，天末岁时新。乐事喧殊俗，羁愁滞远人。椒盘怀故里，肠断白头亲。

骆用卿用卿字原忠，余姚人。正德戊辰进士，官兵部员外郎。

【题韩信庙】

逐鹿中原汉力微，登坛频蹙楚军威。足当蹶后犹分土，心已猜时尚解衣。毕竟封侯符蒯彻，几曾握手到陈豨？英魂漫洒荒山泪，秋草长陵久落晖。（李献吉云：“此题淮阴庙绝唱也。”三四极写汉高诡诈，而淮阴之冤，自在言下遇之。）

杨慎

慎字用修，新都人。正德辛未赐进士第一，授翰林修撰。以议大礼泣谏，杖谪永昌。天启初，追谥文献。

升庵以高明伉爽之才，宏博绝丽之学，随题赋形，一空依傍，于李、何诸子外拔戟自成一队。五言非其所长，以过于秾丽，失穆如清风之旨也。

【宿金沙江】

往年曾向嘉陵宿，驿楼东畔阑干曲。江声彻夜搅离愁，月色中天照幽独。岂意飘零瘴海头，嘉陵回首转悠悠。江声月色那堪说，肠断金沙万里楼。

【三岔驿】

三岔驿，十字路，北去南来几朝暮？朝见扬扬拥盖来，暮看寂寂回车去。今古销沉名利中，短亭流水长亭树。

【锦津舟中对酒别刘善充】

锦江烟水星桥渡，惜别愁攀江上树。

青青杨柳故乡遥，渺渺征人大荒去。苏武匈奴十九年，谁传书札上林边？

北风胡马南枝鸟，肠断当筵蜀国弦。（五言近体有“江花与江草，异国看春生”句同一凄惋。）

【赋得千山红树图送杨茂之】

萧郎雅工金碧画，爱画碧鸡与金马。画作千山红树图，行色秋光两潇洒。摇落深知宋玉悲，登山临水送将归。丹林初晓清霜重，紫谷斜阳赤烧微。故人辞我故乡去，

滇树遥遥接巴树。桑落他山共醉时，枫香客路消魂处。白首遐荒老未还，流波落木惨离颜。锦城红树哪能见？千里随君梦里攀。（才人远窜，千古恨事，读数诗，令人百端交集。）

【垂杨篇】

灵和殿前艳阳时，忘忧馆里光风吹。千门万户旌旗色，九陌三条雨露滋。苍凉苑日笼燕甸，缥缈宫云覆京县。

芳树重重归院迷，飘花点点临池见。临池归院总仙曹，应制分题竞彩毫。诏乘西第将军马，诗夺东方学士袍。金明绿暗留烟雾，旧燕新莺换朝暮。

只知眉黛为君颦，肯信腰肢有人妒。从此沉沦万里身，可怜憔悴几经春。支离散木甘时弃，攀折荒亭委路尘。摇落秋空上林远，婆娑生意华年晚。

肠断关山明月楼，一声横笛清霜坂。

【送余学官归罗江】

豆子山，打瓦鼓。阳坪关，撒白雨。

白雨下，娶龙女。织得绢，二丈五。一半属罗江，一半属玄武。我诵《绵州歌》，思乡心独苦。

送君归，罗江浦。（全用《绵州歌》，后只缀四语送行，另是一格。）

【塞垣鹧鸪词】

秦时明月玉弓悬，汉塞黄河锦带连。都护羽书飞瀚海，单于猎火照甘泉。

莺闺燕阁年三五，马邑龙堆路十千。谁起东山安石卧，为君谈笑靖烽烟？

【送彭幸庵尚书致仕】

忆昔西征歌《采薇》，雪山万里驻骅骝。总戎全蜀风云阵，纪绩成周日月旗。诸葛蔓菁遗壁垒，陶潜松菊旧柴扉。前贤出处真相似，雅志如公两不违。

【春兴】

最高楼上俯晴川，万里登临绝塞边。碣石东浮三绛色，秀峰西合点苍烟。天涯游子悬双泪，海畔孤臣谪九年。虚拟短衣随李广，汉家无事勒燕然。（义勇之气至欲托之从军，读者可以悲其志矣。）

天上风云此际多，山中日月竟如何？争传鸣凤巢阿阁，又见飞鸿出罽罗。宣室鬼神思贾谊，中原将帅用廉颇。难教迟暮从招隐，拟把生涯学醉歌。

【柳】

垂杨垂柳管芳年，飞絮飞花媚远天。金距斗鸡寒食后，玉蛾翻雪暖风前。别离江上还河上，抛掷桥边与路边。

游子魂锁青塞月，美人肠断翠楼烟。（带六朝格，八句皆对，又体中之变者，杜老“风急天高”一章，其开先也。）

【怀归】

星桥南望沉犀渚，雪岭西连抱耳河。关塞渺茫魂梦隔，山川迢递别离多。汀州春雨拏芳杜，茅屋秋风带女萝。心事未从詹尹卜，生涯聊听僊童歌。

【武侯庙】

剑江春水绿沄沄，五丈原头日又曛。旧业未能归后主，大星先已落前军。南阳祠宇空秋草，西蜀关山隔暮云。正统不惭传万古，莫将成败论三分。（古来武侯庙诗，以此章为最，情韵声律无一不合也。或云此升庵录元人作。）

【涪江泛舟】

明月沉清露，秋风起白云。兰桡乘溜急，木叶下江闻。爽籁金悬奏，遥峰翠积氛。碧潭留雁影，锦汭散虹文。旅望随天豁，幽阿与岁分。登临知自好，寂寞共谁云？

【江陵舟中赠田李二子】

落月寒沙夜未分，玉箫金管醉中闻。明朝回首沅江路，愁听清猿和白云。

常伦字明卿，沁水人。正德辛未进士，除大理评事。

【望山有怀故人】

羈步局重城，流观狭四野。高高见西山，乡愁冀倾写。天际望不极，延伫一潇洒。落叶归故根，山云满楸枰。

无情尚有适，何以慰离者？

【过韩信岭】

汉代推灵武，将军第一人。祸奇缘蹶足，功大不容身。

带砺山河在，丹青祠庙新。长陵一抔土，寂寞亦三秦。

周在在字善卿，太仓州人。正德甲戌进士，官至浙江右参政。

【闺怨】

江南二月试罗衣，春尽燕山雪尚飞。应是子规啼不到，故乡虽好不思归。（不咎征人不返，而归怨于子规，寄情一何微婉。）

薛蕙

蕙字君采，亳州人。正德甲戌进士，官吏部员外郎。以议大礼下狱，寻复职，未几罢归。西原诗力追雅音，故不落凡近语。览者勿以才情求之。

【效阮公咏怀】

飘风振玄幕，若木零朱华。六龙匿西山，蒙汜扬颓波。翩翩市中子，于心太回邪。不见憔悴色，但闻慷慨歌。

卑辱诚未远，祸乱岂在多？人人各怀私，安能顾其他？已矣勿重陈，嗟予可奈何！（守身慎微语，可作箴铭。）生才良不幸，处世诚独难。

扬蛾兴妒阶，怀璧贾罪端。灵均既见放，韩非亦自残。奉身失所从，慷慨使我叹。

【杂诗】

富贵使心惑，嗜欲致行妨。宴安损性灵，美疢生膏肓。吾观古来士，高躅互相望。首路或暂同，中道何苍黄？班生嗣前烈，马融遁远方。藉梁庵为累，附窦终自戕。通人识尚尔，咄咄可悲伤。（文人末路，污行戕生，皆富贵之念中之也。班固、马融朗然前鉴，犹有借学术以附权门者。）

【赠孟望之】

踟蹰郊野外，白日匿西山。行人去有期，安得久周旋？请为《游子吟》，与子结缠绵。忧来动人心，恻怆不能言。言念平生友，意气非徒然。行役不足辞，贫贱非所怜。君其笃明信，慰我心悁悁。

【月夜坐忆】

明月三五时，流光千里外。虚馆风泠泠，寒墀霜霭霭。不见南楼客，徒忆西园盖。欢酒无盈觞，忧襟有余带。沉吟静夜思，缅邈佳人会。

【答王允升省中对雨见忆之作】

康乐愁霖唱，平原苦雨诗。故人歌此曲，赠我慰相思。薜荔垂青阁，芙蓉泛绿池。今朝一尊酒，最恨不同持。

【昭王台】

燕昭无故园，蓟野有空台。寂寞黄金气，凄凉沧海隈。儒生终报主，乱世始怜才。回首征途上，年年此地来。（“乱世始怜才”是“今急而求子”注脚。）

【草堂】

萧萧寒雨对高秋，寂寂空床拥敝裘。归去钧天频有梦，挽回沧海独无谋。平生颇诧任公子，末路方思马少游。珍重故人招隐意，草堂南郭可淹留。

【孙氏沱西别业】

巴陵西来沱水深，水边楼阁长阴阴。鼉鼉夜出洞庭岸，彪豹昼啼云梦林。鼓枻乍逢渔父笑，拏舟时听越人吟。卜居何日从公去？拟向桃花处处寻。

【送杨石斋】

社稷功成后，山林避宠年。遭逢谁可并，出处独超然。反侧当前日，经纶迈昔贤。殷忧兴圣主，至治格皇天。凶竖同摧朽，苍生尽解悬。庙谟随指顾，臣节见周旋。智勇千夫敌，勋劳百辟先。赏仍虚裂土，名已重凌烟。握玺惭周勃，挥金缅鲁连。急流嫌盛满，介石慕贞坚。许国心恒切，还乡兴偶牵。留侯初相汉，乐毅晚辞燕。异渥丝纶数，高风进退全。草停黄阁诏，花簇锦江船。水槛星桥侧，茅堂雪岭边。云霞深绿野，卉木富平泉。事业存钟鼎，仪型照简编。累朝瞻翊戴，四海忆陶甄。

白首归休记，青春送别筵。衣冠望行色，端不异登仙。

【送周子贤按贵州】

万里牂牁路，炎州百粤南。悬梯穿鸟道，流沫下龙潭。赤坂鼉鼉出，玄崖日月含。虹霓蒸海气，烟雾洒春岚。飞豹缘篁竹，垂猿堕石楠。橘花香细细，藤刺绿毵毵。岭外青骢驭，台中白笔簪。秦冠高铁柱，汉节照金函。行迈应多暇，登临素所耽。江山吟谢客，物色助清谈。送远多无绪，忧时且不堪。安危廷诤地，迟子促朝参。

许宗鲁

宗鲁字伯诚，咸宁人。正德丁丑进士，官至副都御史，巡抚辽东。

【东岳】

秩祀严东土，明禋冠五宗。金函神鬼篆，玉简帝王封。海涌中宵日，岩留上古松。何当凌截嶂，飞举跨苍龙。

【辽左雪中登楼】

岁杪崇朝雪，天涯绝塞城。冻云连海色，枯木助风声。怀土情无已，登楼赋未成。梅花南国思，笛里暮愁生。

【登齐山楼】

近郭危楼俯碧湍，倦游孤客倚朱阑。淮肥山色尊前出，吴楚江流画里看。旅思逢秋增短鬓，乡心随雁过长安。

黄花白酒登高日，玉笛金笳起暮寒。（对结体每防收束不住，此故别于中间对偶。）

【班婕妤】

妾命由来薄，君恩岂异同？自怜团扇冷，不敢怨秋风。

王廷陈

廷陈字稚钦，黄冈人。正德丁丑进士，授吏科给事中。谏南巡，谪裕州知州。寻下狱，免归。

【矫志篇】

蛟龙虽困，不资凡鱼，鸞鷟虽孤，不匹鸞雏。虽有香草，当户必除。虽有仁人，在敌必诛。狐白虽美，炎暑必置。舟车之用，易地则弃。兰蕙不采，无异蓬蒿。干将不试，世比铅刀。以骥捕鼠，曾不如狸。饿夫获璧，不如得糜。郭生纯臣，鲁连高士，彼乃登台，此乃蹈海。宁直见伐，无为曲全。宁渴而死，不饮盗泉。

【咏怀】

民食美刍豢，鸱鸢甘臭陈。西子岂不都？鱼鸟不见亲。万类殊所嗜，物岂慕非伦？箕毕各有好，况此世上群。情欲孰为正，参差何可均？黜智任自然，悠悠葆天真。

【闻箏】

花月可怜春，房栊映玉人。思繁纤指乱，愁剧翠蛾颦。授色歌频变，留宾态转新。

曲终仍自叙，家世本西秦。（仿佛“十五嫁王昌”之作。）

敖英字子发，清江人。正德辛巳进士，官至河南右布政使。

【塞上曲】

无定河边水，寒声走白沙。受降城上月，暮色隐悲笳。玉帐旄头落，金微雁阵斜。几时征战息，壮士尽还家？

【辋川谒王右丞祠】

蜀栈青骡不可攀，孤臣无计出秦关。

华清风雨萧萧夜，愁绝江南庾子山。（为右丞辨冤，语极含蕴。）

蔡羽字九逵，吴县人。国子生，授南翰林院孔目。

【思田园】

南方树艺早，嘉蔬当及时。王官凿冰罢，忽起田园思。东郊织台笠，西郭编茅茨。田家不辛苦，衣食更待谁？

曳裾京华尘，徒自隳四支。三江绿烟起，何日伫杖藜？

【晓起】

竹色衣全绿，林光露未晞。

陇猿催梦晓，寒月堕烟微。别恨琴中语，流年暗里归。悠悠花上蝶，故故作双飞。

文徵明

徵明初名璧，以字行，更字徵仲，长洲人。以岁贡入京，用荐授翰林院待诏。卒，私谥贞宪。

待诏尝有句云：“湖上修眉远山色，风前薄面小桃花。”亦广平之赋梅花也。

【新秋】

江城秋色净堪怜，翠柳鸣蜩锁断烟。

南国新凉歌《白苎》，西湖夜雨落红莲。美人寂寞空愁暮，华发凋零不待年。莫去倚阑添怅望，夕阳多在小楼前。

【沧浪池上】

杨柳阴阴十亩塘，昔人曾此咏《沧浪》。春风依旧吹芳杜，陈迹无多半夕阳。积雨经时荒渚断，跳鱼一聚晚风凉。渺然诗思江湖近，更欲相携上野航。

王宠字履吉，吴县人。贡入太学。

圭臬颜、谢，痕迹未融。然尔时吴中诗格，以贡士为最。七言律亦颇沉郁，或者必以摹古短之，何也？

【旦发胥口经湖中瞻眺】

瀛壖委苕藪，地险隘山川。浑沌自太古，漭泆开吴天。仰饮延池津，俯灌东南偏。龙宫曷瑰丽，蛟室幽玄。孕化晨阳吐，涵虚宵象悬。洪流既澎湃，列嶂亦回延。灵标海上阙，石秀镜中莲。开冬眷肃气，落木浩无边。黄鹄展奇翼，八表恣周旋。倘遇浮丘公，造蓬莱巅。

夙有丘壑尚，缅怀鸾鹤踪。扬帆忽夭矫，赤水骖虬龙。五湖写杯掌，三州荡云胸。金屏匝地轴，玉镜开天容。丹丘驻日月，瑶草连春冬。绛气恣萦薄，青霞何复重？

仙人蜕化处，千载空芙蓉。灵境指顾间，行当往追从。（极意造句，拟之镂金错采。）

【入消夏弯】

千山玩回转，双阙开嶙峋。围作玉镜潭，流水桃花春。鸡犬自甲子，衣冠乃秦民。表里重湖阻，丹青四望匀。孤峰表日观，群嶂摩天垠。波光别骀宕，霞采相鲜新。疑觞王母池，误攀织女津。海鸥戏兰薄，游儵莹心神。牙樯悲昔幸，玉辇罢今巡。荣华无常境，山水有天真。尘缨聊以濯，惭尔棹歌人。

【送钱太常元抑祠祭显陵】

江汉朝百灵，绛节集鄢郢。兴园奠其阳，虹熠光景。象设开天庭，环卫森五岭。

斋房产灵芝，玉醴出金井。神游驾虚无，剑舄存遗影。洒扫祠官虔，匕鬯皇情耿。太常典秩宗，精白一心秉。

龙颜授玉册，殿上亲祇领。玄端佩冲牙，陟降瑶坛静。风清灵旗翻，天赤御气罔。山河扶栋梁，虎旅肃藩屏。

还轺告成命，弭节指俄顷。备闻古夔龙，密勿金华省。仿佛弘治风，廷论多骨鯁。

我辈饱藜藿，散发从箕颍。（肃肃穆穆，得汉《郊祀歌》一体。）

【南都】

锦缆牙樯万里游，天吴海若翼王舟。襄城七圣空迷辙，弱水三山未稳流。

边塞风云连朔漠，重臣节钺自公侯。

两京角立分形势，居重还须控九州。（羽檄时闻，江彬辈节钺自擅，而帝游幸无度，失居重驭轻之势。草莽臣惄然忧之。此诗史也。）

【秋怀】

风管龙箫清且悲，南徐北固自逶迤。海门直指联三象，日驭巡行逼九疑。入计衣冠轻玺绶，防秋兵马偃旌旗。

长卿《谏猎》无消息，怅望江湖有所思。（亦武宗幸京口时作。）

金銓字在衡，陇西人，寓居金陵。

【泊淮上】

愁轻游冶兴，老重别离情。野戍寒更尽，河桥春水生。断云疏雁影，残月乱鸡声。明发应千里，萧萧过楚城。

【除夕】

还忆去年辞白下，却怜今夕在黄州。空江积雪添双鬓，细雨疏灯共一楼。世难久持弃鱼雁绝，家贫常为稻粱谋。

归来故旧多凋丧，愁对东风感旧游。

卷七

高叔嗣字子业，祥符人。嘉靖癸未进士，官至湖广按察使。

苏门五言，冲淡得韦苏州体。王元美评云：“如高山鼓琴，沉思忽往。木叶尽脱，石气自青。”良然。王敬美云：“徐昌穀、高子业二君，诗有不同，而皆巧于用短。徐以高韵胜，高以深情胜。更千百年，李、何有时废兴，二君必无绝响。”

【再调考功作】

引疾三上书，微愿不克谐。徙官复在兹，心迹一何乖。轩裳日待旦，阊阖凌云排。

入属金马籍，出与群龙偕。积贱讵有基，履荣诚无阶。但惜平生节，逾久浸沉埋。既妨来者途，谁明去矣怀？

鸟迷思故林，水落存旧涯。

唯当寻素业，归卧守荆柴。（谨微葆真，不躁进，不妨贤，卓然想其风概入理不腐，善学大谢。）

【古歌】

荆和当路泣，良璞为谁明？

茫然大楚国，白日失兼城。燕石十袭重，鱼目一笑轻。古来多感叹，今予益吞声。

【叙怀】

伊昔迨弱冠，奋足参贤豪。衣褐出下国，脱挽造中朝。圣期开九五，河清在一朝。升龙假玄渊，鸣凤托芳条。五从宰府辟，连荷公叔招。名过有瑕纇，道在无矜骄。犹全不肖躯，解冕未逍遥。

【答谷司仆见问】

幸自返中园，非关逃微禄。方因疾病余，黽勉供樵牧。春至东郭田，夏来北林木。

时从远原上，日纵平郊目。野老逢与言，道书间能读。何能共世人，无事相追逐？劳君问出处，日暮掩茅屋。

【简袁永之狱中】

本同江海人，俱为轩冕误。子抱无妄忧，余有多言惧。昔来始青阳，今此已白露。

岂乏速进阶，苟得非余慕。罪至欲何言？直以愚慵故。众女竞中闺，独退反成怒。追诵古时人，蒙冤谁能诉？

皇心肯照微，与子齐归路。

【病起偶题】

空斋晨起坐，欢游罢不适。微雨东方来，阴霭倏终夕。

久卧不知春，茫然怨行役。故园芳草色，惆怅今如积。

【送别德兆武选放归】

燕郊秋已甚，木叶乱纷纷。

失路还为客，他乡独送君。罢归时共惜，弃置古常闻。莫作空山卧，令人望白云。

【分水岭晚行】

客兴日无奈，兵荒岁屡加。少年曾许国，多难更移家。远水通春骑，孤城起暮笳。凭高一回首，何处是京华？

【寒食定兴道中】

二月莺花少，千家雨雪霏。

可怜值寒食，犹未换征衣。积水生空雾，高城背落晖。忍看杨柳色，从此去王畿。

徐阶

阶字子升，华亭人。嘉靖癸未赐进士第三，累官少师、吏部尚书。赠太师，谥文贞。

【送司封仲芳杨子赴留都】

哲人重道义，朝贵不足縻。丈夫志四方，远适非所悲。如何与子别，怅怅不忍辞。古道日沦替，群谏纷追随。子独谅迂僻，经训相靡 靡。规。去住忽以异，丽泽安所资。颓波无停流，灵耀亦西驰。感此重念子，何以慰尔知？至理不外得，吾心实吾师。愿言励操存，千里同襟期。

【横溪为彭允禎赋】

横溪东去水迢迢，虚阁重檐共寂寥。山外夕阳低度鸟，雨余春渚暗通潮。寒空落叶书声静，秋草孤帆客梦遥。欲徙石湖湖上石，为君乘月更吹箫。

郑旦旦字希周，歙县人。嘉靖癸未进士，官至浙江右布政使。

【晓发洱海，夕次滨川】

天高野旷瘴烟收，风急霜繁落木秋。

箐道千盘临戍堡，山城百雉入边州。诸蕃乐岁休戎马，孤馆频年望斗牛。夜半角声吹激烈，纷纷凉月照人愁。

张时彻

时彻字唯静，鄞县人。嘉靖癸未进士，官至南京兵部尚书。

【采葛篇】

种葛南山下，春风吹葛长。二月吹葛绿，八月吹葛黄。

腰镰逝采掇，织作君衣裳。经以长相忆，纬以思不忘。出入君筐笥，长得近辉光。层冰布河水，中野皓凝霜。

吴罗五文采，蜀锦双鸳鸯。君恩当断绝，叹息摧中肠。中肠日以摧，葛叶日以衰。愿留枯根株，化作萱草枝。（古乐府语意）

【初秋】

一声渔唱海天秋，素练初飞白鹭洲。亦有芙蓉自开落，何人解识汉宫愁？

苏祐

祐字允吉，濮州人。嘉靖丙戌进士，官至兵部左侍郎，宣大总督。

【九日】

落木惊风候，淹留感岁华。阴云连紫塞，清泪对黄花。八骏周京马，孤蓬汉使槎。高台予懒上，不为苦思家。

【予告归入倒马关作】

南风吹雨傍关来，关上千峰画角哀。

老去尚怜金甲在，生还重见玉门开。鹍弦漫引《思归》调，虎节空惭上将才。圣主恩深何以报？车前部曲重徘徊。

【塞下曲】

将军营外月轮高，猎猎西风吹战袍。戍鼓无声河汉转，露华霜气满弓刀。

华察察字子潜，无锡人。嘉靖丙戌进士，官至侍读学士，掌南院。学士五言，冲淡有陶、韦风，然垢氛已离，未穿溟滓。

【秋日观稼楼晓望】

日出天气清，山中怅幽独。登高一眺望，风物凄以肃。流水映郊扉，炊烟散林屋。

秋原一何旷，薄阴翳荒竹。时闻鸟雀喧，因念禾黍熟。

悠悠沮溺心，千载犹在目。（王摩诘云：“雀喧禾黍熟，”此衍作十字，便不及古人。）

【宿玉阳仙房】

返照明溪梁，深松晦夕景。岩卧符夙期，云阴石床冷。因投物外心，遂入清虚境。天寒木叶疏，月落山房静。然灯独不寐，秋宵一何永！明发从此辞，白云锁苍岭。

【游善卷碧山岩】

落日下空门，斋钟出林莽。偶兹叩精庐，再宿翠微上。旧游不知处，但见松杉长。岩虚露气清，坐觉心魂爽。月白山窗高，夜静风泉响。遂令寤寐中，超然脱尘网。

云壑永栖迟，愿言税归鞅。

【五月望夜与诸君山中再酌】

仲夏苦昼永，薰风起将夕。圆景海上来，照此山中客。坐令微暑消，兼使众累释。

兴至时命觞，露下复移席。因耽水竹居，遂同鱼鸟迹。盘游岂忘返？玩物聊自适。台空人影疏，夜静潭气白。

参差树杪峰，历历辨咫尺。超然悟真境，万物一虚寂。

【山台晓望怀王仅初不至】

初日照台上，兴来成独游。

天高宿雾尽，木落空山秋。晓色侵残鬓，新寒上故裘。吴门隔烟水，怅望空悠悠。

【惠山寺与施子羽话别】

看山不觉暝，月出禅林幽。夜静见空色，身闲忘去留。疏钟隔云度，残叶映泉流。

此地欲为别，诸天生暮愁。（“夜静见空色”五字入微，然钟、谭专取此种便与诗道日远。）

陆粲

粲字子馀，长洲人。嘉靖丙戌进士，官工科给事中。坐劾张、桂，谪都匀驿丞，迁知永新县。

【赠别王直夫】

威凤天际翔，潜虬泽中蟠。严子时闭肆，贡公乃弹冠。显晦岂必同？各以性所安。子行树远绩，奋身青云端。鄙人栖蓬蒿，蹇拙聊自完。丈夫志千载，飞沉何足叹！相期保贞素，岁晚同金兰。

袁袞

袞字永之，吴县人。嘉靖丙戌进士，官刑部主事。谪戍湖州，后用荐起，官至广西提学僉事。

【送陈德夫使鲁】

帝曰封同姓，皇华遣使臣。河山藏汉誓，宝玉展周亲。殿说灵光古，经传孔壁新。余生好文献，一为访先民。

【自柳至平乐道中书事】

远触苍梧瘴，初乘漓水槎。蚺蛇晴挂树，射蜮昼含沙。屋覆湘君竹，山开蜀帝花。《夷坚》收未尽，《博物》待张华。

【大驾视牲南郊】

大路调仙驭，朱旗列禁城。帝牛三月系，田烛九衢明。日并龙旒出，山将彩仗迎。《横汾》卑汉咏，禋祀达皇情。

【秋兴】

仙仗行宫旧内居，花间往往驻鸾舆。徒闻汉帝《横汾曲》，不见长卿《谏猎书》。天子射蛟开水殿，奚官牧马遍郊墟。

蒹葭苒苒秋无限，怅望烟云万里余。

王慎中慎中字道思，晋江人。嘉靖丙戌进士，官至河南参政。遵岩以古文传，然五言古亦窥颜、谢堂庑，无一浅语滑语。

【登金山口绝顶】

地纪控西界，灵山亘北徂。足弱步履憩，崖峭石犹踈。枝樛乃能援，葛脆不可挽。当其意象开，岂复虑高蹇？瞻峰皆列施，陟涧数回缅。稍觉天地宽，即看云烟变。石窦芝自荣，林罅雪尚泫。兴阔无近寻，登高有远见。周圻矗五云，易水通一线。微茫燕赵区，历历皆可辨。长啸发灵籁，倦坐席苔藓。氛垢苟不婴，沉虑斯可遣。

【游白鹿洞】

素婴丘壑情，况秉英贤想。寤寐悬宿心，游盘得兹赏。重阴始晦蒙，杲杲旋开朗。揽胜据巉岩，探奇历榛莽。境闲百虑空，意惬二仪广。野色浮巾衣，秋容成物象。菊含露下英，泉作山中响。柔叶稍朝零，刚条非夏长。景物易流徙，今古同俯仰。踌蹰怅回轸，何时还独往？

【游麻姑山】

云出本无心，择栖多奇巘。繄予慕真胜，涉趣不知远。初缘碧涧行，几傍丹崖转。林追去虎踪，蹬蹑飞猿践。泉流递浅深，岩谷变阴显。喷瀑遇留憩，石床时仰偃。桂芳洞里秋，霞映山中晚。探异寻前期，入幽忘后反。神游力不憊，理惬情俱遣。天路如可梯，欲以微官免。

皇甫冲

冲字子浚，长洲人。嘉靖戊子举人，与弟洙、沆、濂称四皇甫。

吴中诗品，自高季迪、徐昌穀后，应推皇甫兄弟。以造诣古淡，无一点秣纤之习。时二黄、三张，空存名目耳。

【维摩寺雨坐】

回岭无仄径，陟冈有夷壤。展睐入空蒙，游心益昭朗。长风吹轻衣，飘摇翠微上。古寺迷夕烟，明灯淡绡幌。

冥雨从东来，惊雷自西往。林峦忽不见，但闻山涧响。景寂非避喧，心莹乃成赏。为礼沉痾踪，因之知幻象。

【于岩石上眺东西两湖】

旭践山中蹊，午憩岩上石。云移石欲堕，雨霁蹊犹湿。倚策眺两湖，波光渔相袭。

东若既纒青，西蘅亦凝碧。芙蓉落双镜，天影浮重壁。樯乌有离声，矶鸥无并翼。会兹物化情，感彼高深迹。

从适得所遣，何为苦拘迫？

皇甫沆字子循，长洲人。嘉靖己丑进士，官至云南按察僉事。

子循古体出入二谢，五言律亦在钱、刘之间，与兄子安可云敌手。

【秋夜把酒对月】

宋玉陈《九辩》，陆机歌百年。怅兹清秋日，聊使幽怀宣。矫矫归云雁，嘒嘒含风蝉。摧芳委朝露，俄景流夕川。鳞运有代谢，华无长妍。始知行乐贵，何用居情牵。

？长夜思秉烛，新月正当筵。金尊泛绿醕，宝瑟絙朱弦。商歌当枣下，楚舞出花前。余名焉足藉，达生乃为贤。

【过武城言子祠作】

溯风枉轻桡，戴星理扁棹。超忽之武城，有荡瞻鲁道。古邑一何卑，令猷久弥劭。弦歌谢清响，精华契深造。曰余厕文儒，耽寂违时好。剖符辞帝京，腰章宰名赵。谅乏操刀资，惧贻制锦诮。经过缅遐瞩，神对宣幽抱。言采江上蘋，荐此庙中貌。谁谓千载殊，可以同高调。

【奉答子安兄】

江郭改故阴，家园蔼新霁。柔条始发林，芳草渐纡砌。潘居信为闲，杨亭况重闭。曰余忝明时，与子承嘉惠。分省各有愆，佐郡惭怕莅。暂就北山招，转惬东田税。情忘桃李言，迹岂匏瓜系？感遇兴长谣，来章缅幽契。

【从军行寄赠杨用修】

思文际圣君，稽古萃群辟。子云侍承明，胡为去荒域？被命事犀渠，差胜下蚕室。

愤志酬八书，荣名重三策。丁年子卿嗟，皓首仲升泣。看鸢穷瘴烟，放鸡定何日！业既违操觚，勋还期裹革。

五月行渡泸，千里望巴国。泸水向东流，巴云忽西匿。

相思持寸心，愿附双飞翼。（用修之才而谪戍边徼，有情所共悲也。拟之马迁、子卿、仲升、伏波，几于歌以当哭。）

【舟中对月书情】

不识别家久，但看明月辉。关山一以鉴，驿路远相违。影落吴云尽，凉生楚树微。天边有乌鹊，思与共南飞。

【九日寄子约】

漫有登高兴，兼当望远何？

对花惊白发，见雁忆黄河。乱后书来少，霜前木落多。不堪羁宦日，同是阻于戈。

【元夕熊子叔抑过集时谪远州】

国论何年定？乡心此夕摇。雁飞天畔驿，龙隐日南桥。谪宦恩非薄，之夷路诘遥？谁怜梁傅泪，曾洒汉文朝。

【寄刘谏议畿】

欲将尺素远相贻，疏懒无如与性宜。北虏尘飞榆塞日，西京灰满柏梁时。中朝望属阳司谏，左掖吟怜杜拾遗。定有封章回圣主，莫须焚草避人知。

【广寒宫登眺】

宝阁凌霄建，珠窗映日开。月临疑桂宇，露洒即铜台。山悉图嶠入，池犹象汉回。倚妆花屡发，窥舞鸟能来。

倾国元因色，劳民岂但财？地随胡运改，栋与美人催。殷鉴良非远，秦宫亦可哀。

圣朝留古迹，皇览日休哉！（以前朝为荒宴之戒，得杜老《咏九成宫》意。）

【对月答子浚兄见怀诸弟之作】

南北何如汉二京，迢迢吴越两乡情。

谢家楼上清秋月，分作关山几处明。

唐顺之

顺之字应德，武进人。嘉靖己丑进士，官至佥都御史。天启中追谥襄文。

【登喜峰古城】

（时三卫贡散牧关外）

绝顶孤峰见废关，短衣落月试跻攀。三秋豹旅方乘障，万里龙媒正满山。候雁似随乡思去，寒花将送使臣还。筹边迂薄真无补，空望伊吾抵掌间。

【复官后报京师友人】

姓名不复挂朝参，鱼鸟由来性所耽。篋里符经都已废，山中药草渐能谙。疏狂自分

三宜黜，懒病其如七不堪。深谢故人推轂意，莫将阳羨比终南。

【冬至南郊】

明王敦大报，泰時礼神君。位以南离正，宵从甲子分。月临太乙馆，星动羽林军。除道疑登岱，鸣箫异渡汾。声容六变合，海岳百灵纷。封检征题字，屏帷悉画云。神光人共见，天语帝亲闻。盛迹谁能赋？多惭扈从群。

陈束束字约之，鄞县人。嘉靖己丑进士，官至河南提学副使。

【咸宁山中雪霁晚行】

雪霁乍见山，残阳稍辞岭。暝色起烟氛，寒光散墟井。田空猎火还，林冻栖乌警。遥闻野寺钟，初月生俄顷。

【都下秋雨夜饮王子长宅】

阔别时何屡？蹉跎鬓已侵。

还朝明主赐，卜夜故人心。凉雨杯初覆，空堂漏欲沉。安知非梦寐？相对帝城阴。

黄省曾

省曾字勉之，吴县人。嘉靖辛卯举人。

【江南曲】

旖旎绿杨楼，依傍秦淮住。朝朝见潮生，暮暮见潮去。（有情而必尽言，此诗味所以薄也。只此说住，见言外有无限情事。）

钱榘

榘字君望，南通州人。嘉靖壬辰进士，历官参议

【悯黎咏】

嘉靖戊申，崖吏失御，重以积蠹之余。群黎遂叛，攻掠城邑，远近绎骚。抚者无策，漫以牛酒从事，越岁不戢。当路请命征讨，予分典戎事，深悼诛夷之惨，用广咨諏，卒藉天威，诛获渠首，歼荡丑类，总五千余级。诸村悔过，悉归顺焉。庚戌夏

四月三日，凯奏底定，追惟致寇有因，覆车当戒，感时述事，潸然有怀。

在昔邃古初，鸿蒙辟天地，绝谷嶂南海，深箐郁苍翠。中有黎母居，伊人尚蒙昧。凿井以饮渴，农田亦时艺。荒路暖匪通，幽局或交市。虽尔隔华界，犹纪王正岁。生黎若草木，荣陨随和厉。熟黎若鸟兽，麋鹿俟无智虑。所以古先圣，馭之以不治。

粤南本炎峽，矧此琼崖东？玄冬日且和，幽郊鲜阴风。花柳荫广隰，苗黍青芄芄。皇仁渐南极，草木均化工。岂独兹黎人，物与非吾同？军行值人日，感叹心冲冲。

朝发城东门，夕驻藤江垒。杀气干层云，狼师渡藤水。鸡犬皆震惊，人民尽奔徙。海避愁蛟蛇，山匿畏虎兕。蛇虎犹可虞，狼毒不可迺。军令甚分明，颠仆何由弭。伶俜泣路衢，迸泪不能已。嗟哉一将功，岂独万国毁？

海南无猛虎而有麋与麋。玄崖产珍木，种种称绝奇。斯物出异域，颇为中国推。以兹重征索。奔顿令人疲。穷年务采猎，为官共馈仪。苦云近岁尽，无以充携持。直欲诉真宰，铲此苏民脂。物理有固然，忉忉令人思。

叶落当归根，云沉久必起。黎人多良田，征敛苦倍徙。诛求尽余粒，尚参犊与豕。昨当租吏来，宰割充盘几。吏怒反索金，黎民那有此？泣向逻者借，刻箭以为誓。贷一每输百，腴削痛入髓。生当剥肌肉，死则长已矣。薄诉吏转嗔，锁缚不复视。黎儿愤通决，挺身负戈矢。枪急千人奔，犯顺非得已。赫赫皇章存，今人弃如纸。

朔风戒良节，赫赫张皇师。军门号令严，震肃将天威。壮士快鞍马，锋镝如星飞。一举破贼垒，刀斧纷纍挥。剖尸越丘阜，踏血腥川坻。白日暗西岭，瘴气昏余晖。翹鼠堕我前，饥乌逐人归。征夫怀惨忧，涕泗沾我衣。黎人本同性，云何发祸机。神武贵勿杀，不在斩获为。息火当息薪，弭兵当弭饥。谁生此厉阶，哲士知其非。（治之以不治，馭远人之道也。征求贡物，赋敛无艺，兵戎于是兴矣。谁生厉阶，至今为梗。未以弭饥为救乱之本，是真能弭乱者，老成远虑，可垂炯戒，后之柄国者，尚其敬而听之。）

尹耕

耕字子莘，蔚州人。嘉靖壬辰进士，官至河南按察僉事，坐劾戍辽左。子莘七言律本李空同派，有秋笳晓角之声。

【秋兴】

蓟门千里接云中，燧火清宵警报同。合阵几窥青海月，鸣鞭争下黑山风。冬残战士

衣仍薄，岁歉孤城廩欲空。南国十年输挽尽，防秋诸将漫论功。

十万鸣弦报吉囊，野心狼子是花当。连姻固自轻中国，分道频看入汉疆。推毂丈人空肉食，操戈遗孽尚萧墙。不应干羽修文日，岁岁三关有战场。

威名万里马将军，白首丹心天下闻。辽水旌旗余杀气，泰山松柏已高坟。条侯自靖中州变，窦宪曾铭塞外勋。独倚凌烟思将略，暮天征雁下寒云。

万山环合蔚州城，紫寒连云朔气清。禾黍岁时供上谷，烽烟日夜接神京。九宫迤逦通军壁，高垒崔嵬列虏营。稍喜摧锋章节帅，能将俘获谢苍生。

【上谷歌】

大宁无路援开平，极目孤悬独石城。遥忆先皇亲跃马，长驱绝塞苦提兵。寒流汨汨交樵径，野戍荒荒列汉旌。

千载土人谈往事，伯颜山下有英声。飞狐倒马紫荆连，此去朝廷路一千。向日北门严锁钥，于今南牧盛风烟。时名受脤当关将，岁德临分破阵年。

愿假精兵渡辽水，莫令疲病久戈鋌。

【紫荆关】

汉家锁钥惟玄塞，隘地旌旗见紫荆。斥堠直通沙碛外，戍楼高并朔云平。

峰峦百转真无路，草木千盘尽作兵。谁识庙堂柔远意，戟门烟雨试春耕。

【上谷歌上楚中丞】

戍楼霜重角声残，策马朝登十八盘。

紫气正当天北极，彩云时见汉长安。誓将锁钥标铜柱，应有麒麟画铁冠。况是六龙巡幸地，至今溪谷尚鸣銮。

【春怀】

春深关塞尚屯兵，万里防胡拱汉京。不为翠华临远道，岂应金甲废深耕。转输坐见司徒急，经略亲看相国行。莫讶至尊忘北顾，显陵迁附圣人情。

往岁关山亦丧师，犹能不失汉旗旌。可怜虎帐分符日，偏是沙场弃甲时。白草自长骠骑垒，黄云空压李陵碑。

书生无计当戎右，一剑真思报主知。（诸咏得少陵《诸将》遗意，但少开阖变化，所以不逮古人。）

皇甫湜字子安，长洲人。嘉靖壬辰进士，官至浙江按察僉事。

子安枕籍选体，故五言自高。然得风格而遗精理，未云诣极也。

【送周氏】

清晨饯我友，驾言远徂征。前瞻齐鲁墟，千里浮云兴。亲友岂不昵？怀役不遑宁。旷野多悲风，扬尘翳边庭。中衢雪霰集，边马寒无声。蹊谷少行迹，侧足横层冰。回首望京阙，能不恻中情？子其只自爱，顺时保荣名。

【秋日杂诗】

廓处乏欢惊，出门眺长衢。悲风吹落日，四顾无行车。嗟跼失盛年，感叹独嗟吁。况我在樊笼，六翮不得舒。抚剑思西迈，安得守故庐？淮阴困閭里，马生恋边隅。桑梓岂我志，蓬蒿非我虞。行行舍此去，去去浮云俱。

【将命巡轺徙倚署阁】

弥辰倦纷牍，徂春怅无乐。庶以散予襟，独此稽山阁。霞蔚见层峦，花深隐群壑。本自沧海人，悔吝滋縻爵。旋里东江舳，徘徊眷林薄。俄顷恻幽衷，遇物悲离索。且凭浮云征，聊希至人托。

【发郡城之天台道中述所经览寄友】

夕梦层城阿，晓行沧波上。縈溪复含流，连岑时隐嶂。风湍信千转，云峰非一状。锦缤纷迎玩，氤氲忽弥望。兰泉芬可掬，苔壁险难傍。思偕同怀子，携手追禽尚。

【杂兴】

骛节流炎纪，驰晖届清商。游鱼湊重渊，蟋蟀鸣空堂。白露滋前除，阴风来北房。我心亦何思？所思天一方。离居宛如昨，再睹鸿雁翔。含情抚遥夜，申旦独彷徨。哀彼《采葛》诗，零泪沾衣裳。

【雪山歌奉寄彭太保】

雪山嵯峨控西极，寒井阴光混开辟。千秋鸟道无阳春，北风惨淡吹峨岷。羽书宵过褒斜道，火入灵关彻昏晓。

愁云百里填城河，帐中银烛然盘陀。将军狐裘细马驮，弹箏伐鼓金叵罗。指麾羽扇白玉珂，背河一战收蓬婆。铭功刻石报天子，麒麟阁上事已多。

忆昔中原全盛日，八方无虞醴泉出。龙举空悲剑舄藏，海南漠北俱萧瑟。君王垂衣念西土，钱塘老子不足数。彭公大梁伫献捷，已见彤弓出天府。

持节心知主恩重，入关更识王臣苦。文武吉甫非公谁？临洮健儿勇如虎。骥子朝披玉垒云，鱼文夜湿金堤雨。阆中一月见节制，烹羊宰牛酌清醑。

狼籍衣冠颂破竹，马前父老称安堵。园陵佳气春氤氲，锦官城中日鼓舞。当时匹马更朝天，又逐轻车过酒泉。勋名岂数七十战，至今边卒高枕眠。

归来谒帝承明殿，世事那知一朝变。功成下吏古所悲，浮云蔽日今曾见。天下惊闻柏台火，匣内空留上方剑。壮士长歌《梁父吟》，孤臣独泣瑶池宴。

莲峰落月照黄河，榆谷飞尘暗兰县。

武穆祠西秀水流，一望江山泪如霰。（功成下吏，今古同悲。改弦变调，如宫声之换羽也。）

【西湖歌寄方思道】

西湖窈窕三十里，柳丝含烟拂湖水。

青山荡漾春风来，苏公堤边花正开。玉缸春酒映江碧，几醉江边柳花白。城头日出照高楼，银铮翠管喧行舟。吴姝如花卷绡幕，山水倒入金屏流。

朝来复脱千金骏，还有床头紫绮裘。人生行乐莫顾惜，落日松风吹古丘。我忆京华旧游地，鱼浦东看动愁思。醉里空歌镜湖月，梦中尚识孤山寺。

信安使君还旧溪，应对花卮惜解携。白沙翠竹无人问，湖上孤吟闻马嘶。

【再别兄弟作】

可叹江潭客，重为魏阙游。河梁一怅望，芳草剧含愁。陇树三年泪，边云万里秋。无由慰栖泊，羈影任悠悠。

蔡楠楠字子木，德清人。嘉靖壬辰进士，官至南京兵部侍郎。

【晚晴】

山晴欲暮天，山色转苍然。泉落云中碓，溪回树杪船。斜明沙际日，远遍绿芜烟。还见凫鸥伴，闲飞秋水前。

黎民表民表字维敬，从化人。嘉靖甲午举人，官至布政司参议。

【紫荆关】

径转蛇盘险，云连鸟去长。山桃微着紫，沙柳不成黄。重镇临天府，神功划大荒。金城谁献议？老作尚书郎。

【横翠楼】

高楼当绝塞，春望转氤氲。百战全燕地，千重大漠云。控弦无掠骑，饮羽忆将军。老去亲戎马，悲笳向夕闻。

【同邝别驾，蔡山人登九成台】

芙蓉秀色半阴晴，影入空江百丈深。紫阁倒垂星宿象，碧天吹落凤鸾音。烽尘正属谈兵日，云路谁为出世心？风景故园犹想象，丹梯吾肯倦登临。

沈炼

炼字纯甫，会稽人。嘉靖戊戌进士，除清丰知县，入为锦衣卫经历。坐劾严嵩，廷杖，谪田保安州。寻为奸党所陷，戮于边。隆庆初赠光禄寺少卿，谥忠愍。

【寄冯敬叔】

同作他乡客，嗟予更滞留。关山明月夜，边塞白云秋。汉阙孤臣梦，胡笳万里愁。

桑乾河水近，知是忆并州。

【得应职方书诗以答之】

郎署飞符日，题书问谪居。自因乡使到，翻觉旧交疏。

塞月尘沙里，边风鼓角余。谁知迁客梦，夜夜绕鸾舆。（应是谪戍后作。）

【送朱子南还】

十年辛苦在京华，梦里何时不见家？

一照若耶溪畔月，始知杨柳隔天涯。

翁大立大立字儒参，馀姚人。嘉靖戊戌进士，官至南京兵部尚书。

【吴讴】

旧征未云已，府帖重征新。昨朝银花布，今日金花银。侵晨趋城府，薄暮遍乡邻。一身应重役，奔走无定晨。父母生我时，胡不百我身？残躯被捶楚，苦切难具陈。宁为乞市儿，莫作当官人。（银花布，金花银，当日征税名目，唯吴地行之。）

王问

问字子裕，无锡人。嘉靖戊戌进士，官至广东按察僉事。及卒，门人私谥文靖。

【自山中泛湖归】

登践穷幽深，下山日已晚。

余照留青蘋，归去度苍巘。对此生远心，返棹意自缓。川途风浪平，沿流弄清浅。

【赠吴之山】

城柝声声月未央，江云初散水风凉。看君已作无家客，犹是逢人说故乡。（其声凄以哀。）

徐文通

文通字汝思，永康人。嘉靖甲辰进士，历官山东按察副使。

【岱宗】

岱顶凌霄十八盘，中原萧瑟思漫漫。振衣日观三秋曙，倚剑天门六月寒。风雨黄河通瀚海，星辰紫极近长安。小臣愿献蓬莱颂，闾阖高悬谒帝难。

陈皋谟

皋谟字思赞，江阴人。嘉靖甲辰进士，历官南京工部郎中。

【环县城远眺】

灵武孤城霁色开，感时还上最高台。山楼风急熊旗动，关塞天连鸟道回。经略久寒西夏胆，安危深仗北门才。殊方独抱怀乡思，日暮愁闻画角哀。

张居正

居正字叔大，江陵人。嘉靖丁未进士，以庶吉士历官礼部尚书。入阁，官至太师，谥文忠。

【舟泊汉江望黄鹤楼】

枫林霜叶净江烟，锦石游鱼清可怜。贾客帆樯云里见，仙人楼阁镜中悬。九秋查影横清汉，一笛梅花落远天。无限沧洲渔父意，夜深高咏独鸣舷。

杨继盛

继盛字仲芳，容城人。嘉靖丁未进士，官兵部员外郎。坐论马市，贬狄道典史。事白，入为户部员外，调兵部。疏劾严嵩，论死。赠太常少卿，谥忠愍。

【送徐子与谪狱江南】

寥落白云司半虚，看君此去更何如？西曹月满幽人榻，南国星随使者车。塞雁不堪行断候，秋风况是叶飞初。秣陵故旧如相问，为道疏狂病未除。（婉而多风。）

杨巍

巍字伯谦，海丰人。嘉靖丁未进士，知武进县，入为兵科给事中。累官吏部尚书，进少保、太保。

【早秋登龙门城楼】

指点云州地，真为汉北门。

八城临大漠，一路向中原。晴日山川映，秋田禾黍繁。文庄经略处，父老至今言。

【萧关北作】

塞路山难断，胡天云不开。遥惊戍火起，数见羽书来。周室朔方郡，唐家灵武台。客心正多感，羌笛暮堪哀。

姚汝循汝循字叔卿，上元人。嘉靖丙辰进士，官至大名知府。

【郡斋咏怀】

巴江清且驶，日有东归舟。凛凛岁复暮，而我何淹留？才不瘳民瘼，位固忝邦侯。负担过所任，踏增烦忧。南山有薄田，犹堪具膳羞。弃捐久不理，粮莠将盈畴。至道贵兼济，岂固为身谋？十羊方九牧，雅志怅悠悠。安能逐时态，坐取素餐尤。

【章昆冈别驾邀登城南楼】

楼前新涨迥浮天，把酒登楼思渺然。白鸟于人如有识，青山何处不堪怜。孤舟渔火炊寒渚，萧寺昏钟起暮烟。簿领稀疏逢胜景，谁能独醒向尊前？

魏时亮

时亮字敬吾，南昌人。嘉靖己未进士，官至南京刑部尚书。

【平壤拜箕子墓并访井田遗迹】

禹范留西土，孤臣独向东。道无浮海叹，义与采薇同。旧井存殷画，遗黎尚古风。荒丘平壤外，《麦秀》想遗宫。（柳州碑文，尽四十字内安放妥贴，神气完足。）

申时行

时行字汝默，吴县人。嘉靖壬戌赐进士第一，累官少师兼吏部尚书。赠太师，谥文定。

【题清秋出塞图】

生不识医无间，梦不到狼居胥。瞥然示我出塞图，令我目眩心神徂。忆昔筹边赞庙

谟，桓桓司马杰丈夫。帝授节钺临玄菟，高凭熊轼佩虎符。榆关九月沙草枯，霜鹰下击秋原芜。烟荒云惨天模糊。惟兹辽左僻海隅，频年侵扰无宁都，射雕跃马弯强弧。司马申令陈师徒，指挥铁如意，玩弄金仆姑。扬旌督战亲援枹，万卒超距争先驱。奔狼突豕皆就俘，凯歌入奏天颜愉。司马让功欲若无，但云将士多勤劬。何以劳行役？请蠲幕府租。何以恤饥疲？请发司农储。人人挟纊齐欢呼！自从司马归江湖，辽人茹苦若堇荼。荷戈不解甲，挽粟仍飞刍。羽檄征材官，络绎在道途。震邻之恐非剥肤，骚动根本何为乎？安得再起司马登戎枢，坐纆长策消隐虞，国威震叠边人苏。（安边之策，全在得人与转输，二者失而边事坏矣。篇内具有识力。）

【大阅诗应制】

庙略收群策，宸游简六师。代当全盛日，春是大搜时。云捧苍龙驾，风回翠凤旗，辕门开复道，帐殿绕行麾。细柳前军驻，长杨后骑随。虬须天策将，猿臂羽林儿。拂剑星文动，弯弓月影披。连营分雁翼，布阵合《鱼丽》。礼示三驱正，锋藏九变奇。张侯仍是豹，贾勇尽如罴。引满双雕落，腾空万马驰。元戎归节制，法从肃威仪。讵数夸胡猎，还欣奏凯期。《大风》歌汉士，《吉日》诵周诗。我祖犁庭烈。先皇保泰规。永言思继述，持以赞雍熙。（归本于文皇之犁庭、孝宗之保泰，寓规于颂，大臣进言之体。）

唐钺钺字君锡，兰溪人。嘉靖癸卯举人。官任楚府长史。

【江行】

客计方归越，征桡更背吴。风萤临水乱，江月向人孤。洲已过迷子，山犹及望夫。可怜清夜色，强半在长途。

许邦才邦才字殿卿，历下人。嘉靖癸卯举乡试第一，官德府长史。

【汴河守冻】

客馆寒灯泪满襟，间关万里欲归心。眼前一水冰霜苦，又说三江瘴疠深。

皇甫濂

濂字子约，长洲人。嘉靖甲辰进士，官兴化同知。

【悼子乘】

溟溟雨露集，熙熙岁始更。灵蠢各有化，人理独无生。

念我泉下子，一绝如朝荣。生男以待终，胡为遽夭折？清尘布虚室，寒晦凝轩屏。宿草旅庭荐，哀鸟为悲鸣。

怅恍鲤趋日，礼训犹用情。流目无存影，涕泪交沾纓。恫忧何能已？叹息每遗声。堂闱旷綦迹，诗书空复盈。

奚但肠九回，心膂成颓崩。愧乏延陵达，无乃伤吾明。

【不赴郡檄答子循兄】

矫翮思霄翥，游鳞托渊沉。物类各有适，殊途难并寻。岂伊世网虑，扰扰谁为心？振衣还东山，寢迹栖旧林。江海多风涛，舟楫弭川阴。无令冲波激，但恐岁序侵。愿言谢西府，谷口有徽音。

卷八

李攀龙攀龙字于鳞，历城人。嘉靖甲辰进士，官到河南按察使。

历下诗，元美诸家推奖过盛，而受之掊击，欢呼叫呶，几至身无完肤，皆党同伐私之见也。分而观之，古乐府诗及五言古体，临摹太过，痕迹宛然；七言律及七言绝句，高华矜贵，脱弃凡庸。去短取长，不存意见，历下之真面目出矣。七言律已臻高格，未及变态；七言绝句有神无迹，语近情深，故应跨越余子。

【录别】

颜色无常好，春华一以零，悲风蔽地来，四顾何冥冥！寤言怀往路，揽衣从此兴。寒气拳毛发，涕泗断为冰。仰视河汉星，离如水中萍。景光不恋人，游子岂遑宁？夜依牛羊宿，日驱弩马行。努力及明时，安能爱其情！

【又录别】

秋风西北来，萧萧动百草。荡子无家室，悠悠在长道。红颜能几时？弃捐一何早！对客发素书，零涕复盈抱。上言故乡好，下言故人老。（浅浅语道得情出。）

【古意】

秋风西北起，吹我游子裳。浮云从何来？安知非故乡。萧萧胡马鸣，翩翩下枯桑。暮色入中原，飞蓬转战场。往路不可怀，行役自悲伤。（“浮云”十字，殊近古人。）

【和许殿卿春日梁园即事】

梁园高会花开起，直至落花犹未已，春花著酒酒自美。丈夫但饮醉即休，才到花前无白头，红颜相劝若为留。春风何处不花开，何处花开不看来，看花何处好空回！（三句一韵，末三句缠联而下，格调甚新。）

【岁杪放歌】

终年著书一字无，中岁学道仍狂夫。劝君高枕且自爱，劝君浊醪且自酤。何人不说宦游乐？如君弃官复不恶。何处不说有炎凉？如君杜门复不妨。纵然疏拙非时调，便是悠悠亦所长。

【黄河】

复就三秦役，还为《四牡》歌。北风扬片席，大雪渡黄河。才岂诸郎少，名非一郡多。儒官明主意，吾道好蹉跎。

【广阳山道中】

出峡还何地，松杉郁不开。雷声千嶂落，雨色万峰来。地胜纾王事，年饥损吏才。难将忧国意，涕泣向蒿莱。

【崔驸马山池燕集得无字】

主家池馆帝城隅，上客相如汉大夫。十里芙蓉迎剑舄，一尊风雨对江湖。桥边取石鲸飞动，台上吹箫凤有无？向夕不堪车马散，朱门空锁月明孤。（玩末句应主亡之后。）

【初春元美席上赠谢茂秦得关字】

凤城杨柳又堪攀，谢朓西园未拟还。客久高吟生白发，春来归梦满青山。明时抱病风尘下，短褐论交天地间。闻道鹿门妻子在，只今词赋且燕关。（诵五六语，如见茂秦意气之高，应求之广。）

【同元美、子相、公实分赋怀泰山得钟字】

域内名山首岱宗，侧身东望一相从。河流晓挂天门树，海色秋高日观峰。金篋何人探汉策，白云千载护秦封。向来信宿藤萝外，杖底西风万壑钟。（第二语弱。附记赵鹤登岱句云：“山压星辰从下看，海浮天地自东回。”胸中不知吞几云梦也。惜通篇不称。）

【送皇甫别驾往开州】

衔杯昨日夏云过，愁向燕山送玉珂。吴下诗名诸弟少，天涯宦迹左迁多。人家夜雨黎阳树，客渡秋风瓠子河。

自有吕虔刀可赠，开州别驾岂蹉跎。（济南论七律云：“王维、李颀颇臻其妙。”读此数篇，知得力有由。）

【送赵户部出守淮阳】

仙郎起草汉明光，几载军储事朔方。五马新为淮海郡，三台旧署度支章。行车麦秀随春雨，卧阁花深对夕阳。地忆上林词赋客，鸿书遥下楚云长。

【送憺员外按察郢中】

醉拥骊驹不可留，送君花发凤凰楼。青春开府西陵色。到日登台北雁愁。寒雨远分荆楚望，白云无尽汉江流。共知人世悲难合，倘得隋珠莫暗投。

【送陆从事赴辽阳】

御苑东风吹客过，共看芳草有离珂。西山晴雪鸿边尽，北海春云马上多。地险时窥玄菟郡，天骄夜遁白狼河。知君幕下参高画，诸将何时议止戈？

【上朱大司空】

河堤使者大司空，兼领中丞节制同。转饷十年军国壮，朝宗万里帝图雄。春流无恙桃花水，秋色依然瓠子宫。太史但裁《沟洫志》，丈人何减汉臣风。

【怀子相】

蓟门秋杪送仙槎，此日开尊感岁华。卧病山中生桂树，怀人江上落梅花。春来鸿雁书千里，夜色楼台雪万家。

南粤东吴还独往，应怜薄宦滞天涯。

【赵州道中忆殿卿】

忆尔檐帷出牧年，风尘谁识使君贤？政成神雀犹堪下，兴尽冥鸿遂杳然。树色远浮疏雨外，人家忽断夕阳前。重来此地逢寒食，何处看春不可怜！

【平凉】

春色萧条白日斜，平凉西北见天涯。惟余青草王孙路，不属朱门帝子家。宛马如云开汉苑，秦兵二月走胡沙。欲投万里封侯笔，愧我谈经鬓有华。

【杪秋登太华山绝顶】

缥缈真探白帝宫，三峰此日为谁雄？苍龙半挂秦川雨，石马长嘶叹苑风。地敞中原秋色尽，天开万里夕阳空。平生突兀看人意，容尔深知造化功。（沧溟诗有虚响，有沉著。此沉著一路。）

【郡城送友人】

西来山色满城头，东望漳河入槛流。傲吏岁时频卧阁，故人风雨一登楼。乱离王粲逢多病，著作虞聊老更愁。君到长安相问讯，谁怜五月有披裘？

【张驾部宅梅花】

仙郎雪后建章回，清夜西堂拥上才。笛里春愁燕塞满，梁间月色汉宫来。即看芳树催颜鬓，莫厌寒花对酒杯。共忆故人江北望，因君赋罢倚徘徊。

【送杨给事河南召募】

丑虏休南牧，朝廷议北征。幄中新授律，天下大征兵。使者持符出，君推抗疏名。黄金秋突兀，白羽日纵横。岳雪三花秀，河冰万马行。将军邀剧孟，公子得侯嬴。屠贩多豪杰，风尘郁战争。有呼皆左袒，无役不先鸣。宁久燕山戍，终期瀚海清。过梁投赋笔，更为请长缨。

【七夕集元美宅送茂秦】

祖席陈瓜果，征衣理薜萝。云边看露掌，花里出星河。仙吏挥金碗，佳人罢锦梭。新知天上少，秀句邺中多。疏拙时名忌，雄豪虏障过。秋风吹鬓发，落日渡滹沱。匕首荆卿赠，刀头桂客歌。明年见牛女，能不忆羊何？

【塞上曲送元美】

白羽如霜出塞寒，胡烽不断接长安。城头一片西山月，多少征人马上看。（送元美、寄元美诸诗，可使乐人歌之。）

【送子相归广陵】

广陵秋色雨中开，系马青枫江上台。落日千帆低不渡，惊涛一片雪山来。

【寄元美】

蓟门城上月婆娑，玉笛谁为出塞歌？君自客中听不得，秋风吹落小黄河。

渔阳烽火暗西山，一片征鸿海上还。多少胡笳吹不转，秋风先入蓟门关。

【于郡城送明卿之江西】

青枫飒飒雨凄凄，秋色遥看入楚迷。谁向孤舟怜逐客？白云相送大江西。

【怀明卿】

豫章西望彩云间，九派长江九叠山。高卧不须窥石镜，秋风憔悴侍臣颜。

【赠梁伯龙】

太华峰头玉女坛，别时明月满长安。不知秋色今多少，君到仙人掌上看。

【春日闻明卿之京却寄】

十载浮云傍逐臣，归来不改汉宫春。摩挲金马宫门外，谁识当时谏猎人？

【挽王中丞】

（中丞名忬，元美父也。为分宜严氏所害。）司马台前列柏高，风云犹自夹旌旄。
属镂不是君王意，莫作胥江万里涛。（为中丞吐气，而忠厚之意宛然。）
幕府高临碣石开，蓟门丹重徘徊。沙场入夜多风雨，人见亲提铁骑来。

【和聂仪部明妃曲】

天山雪后北风寒，抱得琵琶马上弹。曲罢不知青海月，徘徊犹作汉宫看。（不著议论，而一切著议论者皆在其下。此诗品也。）

【观猎】

胡鹰掣辔北风回，草尽平原使马开。臂上角弓如却月，当场意气射生来。

章美中美中字道华，吴县人。嘉靖丁未进士，官至宪副。

【暮相思】

征帆日已远，回波不相待。暝色孤峰来，故乡何处在。日淡墟里烟，云尽天边海。
如何暮相思，坐令鬓容改？

【仲春虎丘】

孤阁生残照，平台下夕阴。疏钟不知处，人影在花林。古刹云光杳，空山剑气深。

依依池上月，犹复照登临。

【初秋感怀】

秋风吹海水，夜色一何长！思妇楼头月，征人马上霜。亭皋云稍白，陇坂叶初黄。物候堪消落，应怜杜若芳。

【送人】

送子薛萝别，悠悠鸾鹤群。乱山秋雨歇，孤驿暮涛分。去国见飞鸟，思家生白云。阖闾城上月，清影为留君。

【秋思】

凉风起燕赵，万里浮云阴。思妇惊秋叶，寒蛩啼暮林。霜催银箭色，雁度玉关心。萧瑟江潭客，芙蓉孤渚深。

王世贞

世贞字元美，太仓州人。嘉靖丁未进士，官山东副使。以父难解官，后补大名兵备，历仕至刑部尚书。

弇州天分既高，学殖亦富，自珊瑚木难以及牛溲马勃，无所不有。乐府古体高出历下何啻数倍。七言近体亦规大家，而锻炼未纯，故华赡之余，时露浅率。选中严加汰存，不使胡元瑞诸人得藉口也。

【天门开】

天门旭，呀然豁。窍混沌，金精发。焱若电，烛潢汉。十二楼，裊鱼贯。琉璃蹙阶，火齐鑿圯。光液四射，不可仰视。屏翳走，彳勺约驰。霓旌霭，若摇支。朱明曜以东起，纤阿迫以西垂。白榆历历河之湄，天浆潋洄示昭仪。天门开，朝紫宫，中有使者冠芙蓉，朱衣璧简缥緗青。类有疑无触若冥，将上帝命况群生。颛精稽悬臚所希，惠我来思庇蒸黎，皞皞帝功斂希夷。（光彩灼烁，不必尽规汉乐。）

【战城南】

战城南，城南壁。黑云压我城北，伏兵捣我东，游骑抄我西，使我不得休息。黄尘合匝，日为青，天模糊。钲鼓发，乱欢呼。胡骑斂，飙迅驱，树若荠，草为枯。啼者何？父收子，妻问夫。戈甲委积，血淹头颅。家家招魂入，队队自哀呼。告主将

，主将若不知。生为边陲士，野葬复何悲！釜中食，午未炊，惜其仓皇遂长诀，焉得一饱为！野风骚屑魂依之。曷不睹主将，高牙大纛坐城中，生当封彻侯，死当庙食无穷。（“黄尘合匝”三语，写出古战场。末即“死是征人死，功是将军功”意，特变化无迹。）

【钦丕 行】

（《山海经·钦丕 图赞》：“钦丕 及鼓，是杀祖江，帝乃戮之于昆仑之东。”）

飞来五色鸟，自名为凤凰。千秋不一见，见者国祚昌。响以钟鼓坐明堂。明堂饶梧竹，三日不鸣意何长！晨不见凤凰，凤凰乃在东门之阴啄腐鼠，啾啾唧唧不得哺。夕不见凤凰，凤凰乃在西门之阴媚苍鹰，愿尔肉攫分遗腥。梧桐长苦寒，竹实长苦饥。众鸟惊相顾，不知凤凰是钦丕。（应指分宜言。钤山读书时，天下以姚宋目之，故有“千秋不见，见者国祚昌”之语。）

【将军行】

娄猪化为龙，头角故不分。贪狼长百兽，那不食其群？有何短老公，自称大将军。从兵三十万，华盖若飘云。尺一丹棱篋，细刺蛟螭文。一署臣某字，直入铜龙门。忽开青天笑，雷公不得闻。碧眼双胡儿，惯骑大宛驹。与公同卧起，辫发貂檐褕。朝令谒天子，暮令拜单于。单于开篋看，中有尺一书。织成紫氍毹，恰恰覆穹庐。犀毗黄金造，密嵌珊瑚来。团龙五色帛，百匹为一角。单于大欢喜，亲为割肉炙。小妇弹琵琶，大妇奉羊酪。手取一束箭，墨文何错落！为语而将军，物微意不薄。箭锋但相近，各各相引却。归还告将军，将军大欢喜。今年胡却去，好复开茅土。幕府上功簿，两胡对金紫。鬼伯何催促？将军向蒿里。严霜一夜零，华堂遍荆杞。翩翩执金吾，缙骑类貔虎。急为发其私，丞相下御史。支磔将军骸，分梟十二边。车裂两胡儿，划肉施乌鸢。红颜夫人妇，悬首映旌旆。白面羽林郎，含咽向重泉。小女配人奴，歌舞侯家筵。田园亿千疆，各自称新阡。生为众人恨，死为众鬼怜。寄语二心臣，贻臭空万年。（此诗为仇鸾作。铺叙丰腴，中带古劲，最近汉人。又有《袁江流》一章，纪严氏父子事，仿《焦仲卿妻诗》，缘摹仿有痕，故不录。）

【遥望北邙山】

遥望北邙山，冢墓郁相樛。石兽蹲草间，妖狐误来求。斧斤焉施伐，原窖各趋畴。积泯渐成无，焉能睹其由？生时藉世赢，迹往神不留。岂若蓬蒿士，一语为千秋。

【过维扬有怀子相】

淮南万木落，蒹葭鸿雁秋。回瞻大江水，极眺黄河流。念此区中士，天翰阻同游。岩岩丽神京，英俊满宾帟。岂乏携手好？抗志乃绸缪。浮沉众自睹，安测衷所由。奈何各分离，徽音邈以修。子如宵行烛，分辉均道周。予如汀际鹭，哀鸣望其俦。

【过长平作长平行】

世间怪事哪有此，四十万人同日死。白骨高于太行雪，血飞迸作汾流紫。锐头坚子何足云？汝曹自死平原君。乌鸦饱宿鬼车哭，至今此地多愁云。耕农往往夸遗迹，战镞千年土花碧。即令方朔浇岂散，纵有巫咸招不得。君不见，新安一夜秦人愁，二十万鬼声啾啾。郭开卖赵赵高出，秦玺忽送东诸侯。（说出天道好还，使穷兵黷武者知戒。）

【赠梁公实谢病归】

汝谋结室罗浮顶，下饮仙人葛洪井。桂树宛宛山日深，松花蒙蒙白云冷。我亦欲买蜻蜓舟，归与少年为薄游。《采莲》一曲杳然去，得醉即卧清溪头。

【送卢生还吴】

卢生善诗逸者流，百结鹈鹕安足愁。辄然一笑别我去，春花落尽胡姬楼。欲留不能意弥恻，众中谁怜好颜色？短裘倘过邯郸道，青草已没平原宅。吴趋小娃迎问郎，北游满地尘茫茫。采菱深处唱一曲，岂若芦茄能断肠。

【酌孙太初墓】

死不必孙与子，生不必父与祖。突作凭陵千古人，依然寂寞一抔土。道场山阴五十秋，那能华表鹤来游。君看太华莲花掌，应有笙歌在上头。（离奇突兀。吊太白山人，自应尔尔。）

【陵祀】

松楸何不极，复道见行宫。剑珮千官月，桥陵万马风。地回山尽拱，云合树俱雄。白首先朝事，伤心涕泪中。

【自夹山趣颜神感古】

千秋此夹谷，驻马意徘徊。苍岭争何向？青天线划开。人疑悬索度，水忆建瓴来。回首兵车地，虚生命世才。

【陪段侍御登灵岩绝顶】

径折全疑尽，峰回陡自开。苍然万山色，忽拥岱宗来。碧涧传僧梵，青天落酒杯。雄风别有赋，不羨楚兰台。（“苍然”二语，可匹空同《泰山》诗。）

【登太白楼】

昔闻李供奉，长啸独登楼。此地一垂顾，高名百代留。白云海色曙，明月天门秋。欲觅重来者，潺湲济水流。（天空海阔，有此眼界笔力，才许作登太白楼诗。）

【送顾舍人使金陵还松江】

汝岂因鲈脍？吾曾识凤毛。青云归暂得，《白雪》和谁高？海色钟山雨，秋声笠泽涛。南征有诸将，为语圣躬劳。

【送张虞部伯启左迁常州别驾】

把袂翻轻别，沾膺自感时。主恩迁地近，吾道小臣宜。月迥延陵剑，潮平太伯祠。古人崇退让，今子莫凄其。（忠厚。）

【乱后初入吴舍弟小酌】

与尔同兹难，重逢恐未真。一身初属我，万事欲输人。天意宁群盗，时艰更老亲。不堪追往昔，醉语亦伤神。（“一身初属我”与“书到汝为人”，各极沉痛。五六正是追往昔也，气雄味厚，不愧杜陵。）

【庚戌秋有约吴峻伯不就，赋此】

汉树淹胡月，天都拂塞尘。九关虚虎豹，屋阁望麒麟。社稷群公手，兵戈一介身。请缨还请剑，慷慨涕沾巾。

【义士李国卿归骨长山，哭以送之】

生死衔恩在，间关病骨遥。刀头空自卜，匕首为谁骄？风色田横馆，寒云豫让桥。岂无心一寸？魂断竟难招。

【书庚戌秋事】

传闻胡马塞回中，候火甘泉极望同。风雨雕戈秋入塞，云霄玉几昼还宫。书生自抱

终军愤，国士谁讥魏绛功？北望苍然天一色，汉家高碣倚寒空。（三句言宣大兵入援，四句言上自西苑还大内也。）

【登岱】

尚忆秦松帝蹕留，至今风雨未全收。天门倒泻银河水，日观翻悬碧海流。欲转千盘迷积气，谁从九点辨齐州？人间处处襄城辙，矫首苍茫迥自愁。

壁立芙蓉万古看，削成松桧隐高盘。中峰翠压徂徕色，绝顶青收碣石寒。《梁甫吟》成还自和，茂陵书就欲谁干？依微白马吴阊在，欲向秋风问羽翰。

轩辕皇帝有高台，鞭石千秋辇道开。匹练天萦吴观出，金泥日射汉封回。西盘瓠子河如带，东挂扶桑海一杯。谁为登坛论王气，只应尘世有仙才。

【盘山】

千盘历尽更茫然，回首中原暝色边。峡转琳宫藏汉月，峰排紫剑插胡天。云根桧坼龙鳞起，磴道泉归玉乳悬。深夜不须惊鼓吹，看予箕坐啸风前。

【行部高阳遇河决不浸三板】

投马虚疑碓石成，射蛟或恐海神惊。陆沉玄圃千峰细，天倒黄河万堞平。渐老中原鱼沸郁，欲归南极虎纵横。浊醪谁是高阳侣？遥夜穷愁白发生。

【同省中诸君过徐丈】

词客真同河朔游，主人偏解孟公留。高城过雨凉生席，残夜花明月满楼。紫玉行杯弹《出塞》，红牙催拍按《梁州》。更怜少日阊门侣，菱叶芙蓉湖上舟。

【立春前一日过尹汝渔副使饮】

东走齐河冰雪开，郁葱佳气近楼台。相逢腊向尊中尽，敢道春从使者来。落日千门飞雁去，黄云一骑按雕回。知君且住袁丝里，陆博酣歌未易才。

【寄家弟振美】

江头风色峭帆新，江雁衔芦来往频。握手已非生别地，题诗还是暂时人。天横北海书难信，日落吴门练未真。俗敝汝曹无可却，时违豺虎即须亲。（应是家难后诗。）

【寄秋中丞子承】

黄龙东去海云低，玄菟城头乌夜啼。帐子青羌新属国，军中白马旧安西。牙旗月拥诸陵出，甲帐天回万堞齐。最是驼酥争捧处，不妨飞捷醉中题。

【送徐子与祀康陵】

佳城葱郁锁楸梧，武帝神游定有无。金榜星辰千岭逼，翠旗风雨万灵趋。俱传骏足留瑶海，亦有龙髯堕鼎湖。此日词臣空洒泪，猷陵春望已模糊。（题祀康陵，结到望猷陵，见遗泽在人，不忍忘也。）

【戚大将军入帅禁旅，枉驾草堂，赋此赠别】

初闻小队驻吴江，忽漫花溪隐画双。细柳尚虚金锁甲。前茅时缓碧油幢。南中旧部思驰义，塞上新城喜受降。倘写云台须第一，如论国土总无双。

【忆昔】

忆昔南巡汉武帝，楼船车马日相望。轻裘鄠杜张公子，挟瑟邯郸吕氏倡。秋尽旌旗营细柳，夜深烽火猎长杨。孤臣亦有遗弓泪，不见当时折槛郎。（张公子指钱宁一流，吕氏倡谓刘娘。）

【故关】

四塞河山险，中通一线行。雄关蔽全赵，叠嶂拱神京。尺地分寒暑，中天各晦明。秋英开绣壁，夕照吐金城。屋似浮空置，田疑傍汉耕。云根穿作窦，石髓借为粳。树杂旌旗拥，峰陪剑戟迎。符从襄子计，阵拟率然名。广武堪称客，成安未晓兵。古来兴废事，大半误儒生。

【送妻弟魏生还里】

阿姊扶床泣，诸甥绕膝啼。平安只两字，莫惜过江题。

【从军行】

蹋臂归来六博场，城中白羽募征羌。相逢试解吴钩看，已是金河万里霜。

【西宫怨】

点点莲花漏未央，乍寒如水浸罗裳。谁怜金井梧桐露，一夜鸳鸯瓦上霜。

【饮欧阳镇朔即事有赠】

旌旗春偃白龙堆，教客休停鹦鹉杯。歌舞未残飞骑出，月中生缚左贤来。

【广陵访周公瑕不遇】

豪华自古让维扬，一水横江即异乡。二十四桥歌吹遍，不知何处觅周郎。

【戚将军赠宝剑歌】

毋嫌身价抵千金，一寸纯钩一寸心。欲识命轻恩重处，灞陵风雨夜来深。

曾向沧海割怒鲸，酒阑分手赠书生。芙蓉涩尽鱼鳞老，总为世间事渐平。

谢榛字茂秦，临清人，自称四溟山人。

四溟五言近体，句烹字炼，气逸调高，七子中故推独步。古体局守规格，有宗法而无生气，弗取也。

【榆河晓发】

朝晖开众山，遥见居庸关。云出三边外，风生万马间。征尘何日静，古戍几人闲？忽忆弃繻者，空惭旅鬓斑。（读“风声万马间”，纸上有声。若衍成二语，气味便薄。）

【大梁冬夜】

坐啸南楼夜，孤灯客思长。人吹五更笛，月照万家霜。归计身多病，生涯鬓易苍。征鸿向何许，春意遍湖湘。

【居庸关】

控海幽燕地，弯弓豪侠儿。秋山牧马处，朔塞用兵时。岭断云飞迥，关长鸟度迟。当朝有魏尚，复此驻旌旗。

【送谢给事封蜀】

使星巴蜀外，汉节夜郎西。树断分金马，江清见石犀。王孙重茅土，天子赐桐圭。异世怀张载，应留剑阁题。

【渡黄河】

路出大梁城，关河开晓晴。日翻龙窟动，风扫雁沙平。倚剑嗟身事，张帆快旅情。茫茫不知处，空外棹歌声。（“翻”字、“归”字，得少陵诗眼法。）

【初冬夜同李伯承过碧云寺】

并马寻名寺，登高藉短筇。飞泉鸣古涧，落月在寒松。石路经千转，云岩复几重？人间多梦寐，谁听上方钟？

【李行人元树宅同谢张二内翰话洞庭湖】

南望岳阳郡，苍茫吴楚分。帆回孤岛树，楼出九江云。落日波中没，秋风天外闻。何时采蘋藻，湖上吊湘君？

【暮秋简徐别驾载卿】

南征秋转剧，不寐夜漫漫。白发艰虞出，沧洲去住难。旌旗连野暗，兵甲照江寒。选将须臾事，谁能议筑坛？

【元夕道院同公实、子与、于鳞、元美、子相五君得家字】

长空月正满，游骑隘京华。夜火分千树，春星落万家。乘闲来紫府，垂老问丹砂。笙鹤归何处，依稀见彩霞。（“春星”五字，亦警亦秀，自能高压满坐。）

【七夕敬二君饯别得秋字】

北斗挂城头，明河迥不流。人间清露夜，天上白榆秋。聚散多歧路，悲欢自女牛。谁知老来拙，回首故乡楼。（与“朝晖开众山”一种起手。）

【送樊侍御文叙之金陵】

地入维扬路，天分牛斗墟。秋帆二水外，春草六朝余。冰雪生官舍，风尘走谏书。从来经国者，宁不念樵渔？

【送钦水部子辰之沛中】

清标怜水部，南去意何穷？树色分淮甸，河流见禹功。乱帆春草外，古堞暮云中。感慨登台处，萧萧起大风。

【有感】

薄伐元中策，论兵自古难。汉唐频拓地，将帅几登坛。绝漠兼天尽，交河荡日寒。不知大宛马，曾复到长安？

【野兴】

白白露凝地，飞飞雁渡河。孤峰依汉迥，老树得秋多。月晓山精伏，时清野父歌。短筇随我意，一径入烟萝。

【秋日怀弟】

生涯怜汝自樵苏，时序惊心尚道途。别后几年儿女大，望中千里弟兄孤。秋天落木愁多少，夜雨残灯梦有无？遥想故园挥涕泪，况闻寒雁下江湖。

【夜话李孺长书屋因怀其尊君左纳言】

忘年尔我重交情，论事相同见老成。月至广除寒有色，鸦归疏柳夜无声。三农最苦江南税，百战方休海上兵。风暮银台应叹感，几人封事为苍生？（时江南增税，海寇方息，山人感事及之，非泛作忧时语。）

【中秋宴集】

满空华月好登楼，坐倚高寒揽翠裘。江汉光翻千里雪，桂花香动万山秋。黄龙塞上征夫泪，丹凤城中少妇愁。词客共耽今夜酒，漫弹瑶瑟唱《伊州》。

【送谢武选少安犒师固原，因还蜀会兄葬】

天书早下促星轺，二月关河冻欲消。白首应怜班定远，黄金先赐霍嫖姚。秦云晓渡三川水，蜀道春通万里桥。一对郾筒肠欲断，鹑鸪原上草萧萧。（将题意逐层安放，一气转折，有神无迹，与高青邱《送沈左司》诗，三百年中不易多见者也。）

【送王侍御按河南】

塞上初归复此行，燕南极目送飞旌。天连嵩岳寒云尽，马渡黄河春草生。簪笔常思未央殿，封章时发大梁城。知君最爱应刘赋，更向西园一寄声。

【七夕留别汪伯阳、李于鳞、王元美得知字】

久客言归意，留连几故知！鹊桥星度夜，燕馆月沉时。天上才欢合，人间转别离。晴分绛河影，秋动白榆枝。桂醕还成醉，萍踪不可期。年年湖海上，今夕定相思。

【行路难】

荀卿将入楚，范叔未归秦。花鸟非乡国，悠悠行路人。（平谈语，而行路之难自见。）

【秋闺曲】

目极江天远，秋霜下白蘋。可怜南去雁，不为倚楼人。

【塞下曲】

旌旗荡野塞云开，金鼓连天朔雁回。落日半山追黠虏，弯弓直过李陵台。

【漠北词】

石头敲火炙黄羊，胡女低歌劝酪浆。醉杀群胡不知夜，鹞儿岭下月如霜。

【捣衣曲】

秦关昨夜一书归，百战犹随刘武威。见说平安收涕泪，梧桐树下捣寒衣。（“可怜无定河边骨，犹是春闺梦里人”，几于哀感顽艳矣。此诗可以嗣音。）

【远别曲】

郎君几载客三秦，好忆侬家汉水滨。门外两株乌柏树，叮咛说向寄书人。（写情极真，方之“茨姑叶烂”一篇，可云新声古意。）

卷九

张佳胤

佳胤字肖甫，铜梁人。嘉靖庚戌进士，官至兵部尚书，加太子太保，赠少保，谥襄敏。少保诗时露警拔，陈卧子重其庄雅，称为李、王后劲。

【乌蛮滩】

乌蛮滩前石齿齿，盘涡转地惊涛起。险绝空传滟滪堆，估客帆樯愁欲死。万里江源异域来，右出夜郎左交趾。青天赤日毒雾合，跼跼飞鸢堕深水。我本西梁道上人，瘴乡奔逐胡为尔？停舟一奠伏波祠，丹荔黄蕉前致词。英雄心事无今古，神物风云各有时。铜柱功名倘难就，泽车款段任吾之。

【宿黄牛峡】

春到黄牛峡，江辞白帝城。楚云高不落，巴水去无声。绝塞书难得，孤舟月更明。棹歌听自短，几处夜猿鸣。

【赴雁门，闻虏退去呈杨中丞】

驱车九月度飞狐，万里霜凄塞草枯。白马偶来逢使者，黄沙何处走单于？胡云夜动双龙匣，汉日秋悬八阵图。一自雁门留李牧，边关烽火至今无。

【登函关城楼】

楼上春云雉堞齐，秦川芳草自萋萋。黄看雨后河流急，青入窗中华岳低。客久独凭三尺剑，时清何用一丸泥。登高远眺乡心起，关树重遮万岭西。

梁有誉

有誉字公实，顺德人。嘉靖庚戌进士，官刑部主事。

【姑苏怀古】

看山几日到吴中，游客登临感慨同。金虎迹荒灵气灭，水犀军散霸图空。春归茂苑乌啼月，花落横塘蝶怨风。谁识倦游心独苦，扁舟常忆五湖东。

【燕京感怀】

尘塞戈鋌血未干，龙庭烽火报长安。拟擒颉利先开幕，欲拜嫫姚更筑坛。青海月明胡马动，黄榆风急皂雕寒。材官羽骑多如雨，夜夜旄头倚剑看。

吴国伦

国伦字明卿，兴国州人。嘉靖庚戌进士，官至河南参政。

【送徐行父少参赴关内】

咸阳天下险，洛邑天下中，潼关睥睨周西东。君自三川历三辅，分陕经营王命同。登车慷慨千人雄，矫若八翼凌苍穹。左冯翊，右扶风，汉关秦畿指顾通。为将匣里双龙剑，掷作天边二华峰。

【得元乘书】

已道还江县，犹然滞海门。别来新鬼哭，书至故人存。万死悬兵力，孤忠藉主恩。岂无排难意，畏路不堪论。（善偷杜意。）

【高州杂咏】

粤南天欲尽，风气迥难持。一日更裘葛，三家杂汉夷。鬼符书辟瘴，蛮鼓奏登陴。遥夜西归梦，惟应海月知。（风土诗须此奇警之笔。方写得生动。）

【鄱阳湖】

欲向匡庐卧白云，宫亭水色昼氤氲。千山日射鱼龙窟，万里霜寒雁鹜群。浪拥帆樯天际下，星蟠吴楚镜中分。东南岁暮仍鼙鼓，莫遣孤舟逐客闻。

【送姜太史节之使楚王】

天子分桐叶，词臣下柏梁。共怜星是使，况乃玉为堂！江汉环宗国，风云护帝乡。居人思过沛，太史复浮湘。地险东南胜，藩盟带砺长。晴山开绛节，高浪出牙樯。杨柳停旌艳，椒兰设醴芳。楼台招鹤驭，环珮忆鹓行。六博中原路，双锋北斗傍。缄书如有意，归雁自衡阳。

【寄远曲】

章台杨柳绿如云，忆折南枝早赠君。一夜东风人万里，可怜飞絮已纷纷。

徐中行中行字子与，长兴人。嘉靖庚戌进士，官至江西左布政使。

【暮发滁阳】

荒城一骑出，落日万峰西。涧水流人影，松阴散马蹄。悬崖青欲滴，芳草绿堪迷。洵美非吾土，翻然忆故溪。

【盘江驿阻雨，寄门人汪维】

天连益部长多雨，路出盘江况毒淫。春早蛰龙蒸赤水，夜深山鬼啸青林。已怜道远妻孥累，更恐年衰瘴疠侵。吹笛袁生应好在，怀予堪和武溪吟。（结用爰寄生事，恰与门人关合。）

宗臣臣字子相，兴化人。嘉靖癸丑进士，官至福建提学副使。

【登云门诸山】

山头日白云英英，千峰倒插千江明。手把芙蓉步石壁，苍翠乱射猿鸟惊。谁其云外吹紫笙，欲来不来空复情。天风吹我佩萧飒，恍疑身在昆仑行。

【雨夜沈二丈至】

榻有何人下？君能此夜过。寒蝉吴客赋，衰凤楚人歌。雨气千江入，秋声万木多。明朝寒浦望，摇落有渔蓑。

【长庚、纯一、舜隆既别忆之】

一别不自意，茫然空复愁。孤舟仍盗贼，多病已春秋。明月半江水，故人何处楼？风尘双泪眼，为我寄沧洲。

张九一

九一字助甫，新蔡人。嘉靖癸丑进士，授黄梅知县，历官右佥都御史，抚宁夏。

【寄见甫弟】

历尽巴山白发新，西风何处不伤神。马曹蹭蹬官难达，鸟道崎岖老更贫。九派长江春后雁，一年芳草梦中人。相思况是无消息，徙倚天涯涕泪频。

王世懋

世懋字敬美，太仓州人，元美弟。嘉靖己未进士，官至太常寺少卿。

【送李太史元甫册封蜀藩】

玉检金泥出大庭，双旌万里去冥冥。汉宫朝浥仙人露，益部宵占使者星。巫峡云中流濯锦，峨眉天半落空青。先驱耻作临邛客，橐笔重题剑阁铭。

【横塘春泛】

吴姬小馆碧纱窗，十里飞花点玉缸。蜡屐去寻芳草路，青丝留醉木兰双。山连暮蔼迷前浦，云拥春流入远江。棹里长干听一曲，烟波起处白鸥双。

潘纬字仲文，歙县人。

【送友人北游】

樽酒慰行轩，交深敢赠言。经过郑庄驿，好问孟尝门。一诺休轻许，千金未是恩。年来长送客，此意不曾论。

张邦伊字孺觉，鄞县人。以父荫仕至陕西苑马寺少卿。

【沈嘉则有三楚之游，席上得分字】

春城斗酒惜离群，把袂高歌到夕曛。地入衡阳三楚尽，天回襄汉九江分。停舟夜听湘灵瑟，倚阁高攀鄂渚云。知尔尚平家累浅，逢人胜事好相闻。

戚继光

继光字元敬，登州人。世袭卫千户，以参将备倭浙东，破倭于台州、平海卫等处。寇平，以都督同知召理戎政，出为蓟镇总兵，进左都督，加少保。

【盘山绝顶】

霜角一声草木哀，云头对起石门开。朔风虏酒不成醉，落叶归鸦无数来。但使玄戈销杀气，未妨白发老边才。勒名峰上吾谁与？故李将军舞剑台。（无意为诗，自足生趣，若郭定襄直于诗坛中位置之。）

欧大任

大任字桢伯，顺德人。以岁贡选江都训导，入为国子博士，终南京户部郎中。

【泊枞阳眺览，遂忆汉武之游】

行役届皖城，放舟下枞阳。原隰郁膺膺，江波浩荡荡。忆在元封中，君王狩朱方。大江深且广，及兹一苇航。弯弧射蛟台，皇武何可当！宸游事既往，六合无回光。不见楼船还，空余蕙兰芳。追昔有虞氏，恭己垂衣裳。圣人重无为，君子贵豫防。览古动凄恻，延伫增彷徨。

【除夕九江官舍】

钱岁浔阳馆，羁怀强笑欢。烛销深夜酒，菜簇异乡盘。泪每思亲堕，书频寄弟看。家人计程远，应已梦长安。（一结忆及家人，又于家人意中念己之梦长安，曲折往复，善学少陵。）

【九月十五夜月】

瑶草三秋色，金风一夕寒。书缘多难绝，月在异乡看。凄断惊霜角，迟回望露盘。刀头今未定，谁最忆长安？

【登宣武门楼】

百二山河控上游，郁葱佳气满皇州。风驱大漠浮云出，天转滹沱落日流。双阙金茎连北极，万家红树动高秋。茱萸黄菊俱堪佩，独上城南百尺楼。

张元凯

元凯字左虞，吴县人。苏州卫指挥。

【枫桥与送者别】

枫桥秋水绿无涯，枫叶满树红于花。万里之行才十里，阖间城头尚堪指。游子尊前泪湿衣，离心已逐片帆飞。酒酣忘却身为客，意欲元同送者归。（英雄儿女一齐下泪。）

陈鹤鹤字鸣野，山阴人。世袭百户。

五言如“近海潮通郡，连山瘴入楼”“孤月常随棹，寒潮自到门”，颇近自然。

【夜坐寄朱仲开、张瓿江】

坐久北风起，江声带远沙。客愁初到鬓，乡梦不离家。林静无残叶，灯寒有落花。怀君滞羁旅，云海各天涯。

【卧病双溪山馆见月寄张有功】

溪边桑柘映双流，病里萧条赋《四愁》。坐雨几宵方见月，别君一日已成秋。山深倦鹊犹依树，风定飞萤自上楼。托迹文园须共遣，莫因乡国叹羁留。

徐渭字文长，山阴人。

【怀陈将军同甫】

飞将远从戎，翩翩气自雄。椎牛千嶂外，骑象百蛮中。铜柱华封尽，昆池汉凿空。雁飞真不到，何处寄秋风？

沈明臣明臣字嘉则，鄞县人。

【顾晋卿度上闻其弟益卿宪副南越之捷】

廿年豺虎剧纵横，百粤遥传一日平。再睹楼船横海出，更标铜柱伏波名。天青马嶂春销甲，雨过龙川夜洗兵。谁道虎头非将种，请缨从古是书生。

【凯歌】

衔枚夜度五千兵，密领军符号令明。狭巷短兵相接处，杀人如草不闻声。（嘉则与徐文文长同在胡少保宗宪幕。少保尝宴将士于烂柯山，酒酣乐作，嘉则于席上赋《凯歌》十章，吟至“狭巷短兵”二语，少保起捋其须曰：“何物沈郎，雄快乃尔！”命工刻石置山上。）

唐诗诗字子言，无锡人。

【横江曲】

家住横江口，年年伤暮春。落花随水去，不为待归人。

黄姬水姬水字淳父，长洲县学生。

【与友人共饮】

青郊歇马拂吴钩，萍聚天涯共白头。久客新丰惟命酒，长谣故国一登楼。林残半壑飞寒雨，潮落空江急暮流。世路风烟悲去住，莫辞此日醉箜篌。

袁景休

景休字孟逸，吴县人。隐于卜。

【送沈嘉则游中原兼访戚将军】

中原此去欲如何？把酒闻君慷慨歌。道上霜寒逢白雁，马前木落见黄河。五陵烟雨秋难尽，三辅风云气尚多。记得少年曾学剑，壮心犹自忆廉颇。

嵇元夫

元夫字长卿，归安人。

【刈稻夜归】

西庄刈稻夜半归，明月皎皎当柴扉。橹声隔岸人语近，斗柄插江霜气微。木叶萧萧覆林屋，芦花茫茫藏钓矶。儿童村南酒家去，野夫独立风吹衣。

【立秋日卢沟送新郑少师相公】

单车去国路悠悠，绿树鸣蝉又早秋。燕市伤心供帐簿，凤城回首暮云浮。徒闻后骑宣乘传，不见群公疏请留。三载布衣门下客，送君垂泪过卢沟。（此江陵与司礼监冯保逐新郑相公事也。无位之士，为之垂泪，足征公论在人。）

居节节字士贞，吴县人。

【晚坐】

鸦背夕阳尽，柴门暮色初。山寒渐风露，人语半樵渔。落叶闻砧急，芦花映月疏。年年楚江上，不见雁将书。

孙良器良器字贡甫，休宁人。

【过姑苏有感】

东吴城外尽烽烟，百姓流移半在船。为问秋风旧来雁，稻粱今有几家田？（此诗应是倭寇之后经过所作，此“江燕初归不见人”，其声又萧飒矣。）

王叔承叔承字承父，吴江人。

【风雨泛太湖，宿松陵长桥漫兴】

群飞鸥鹭去不极，予亦扬帆赴杳冥。酒鬓湖风寒气白，打船春雨浪花青。水边万树来江县，云里双峰出洞庭。七十二桥灯火乱，野烟沽酒宿渔汀。

王稚登

稚登字百穀，长洲人。国子监生。

【塘栖道中】

水阔雨冥冥，帆飞去不停。人声两涯断，鱼市一江腥。云已辞吴白，山初到越青。侯芭数行泪，千里吊《玄经》。

【闻警】

交河十月水潺潺，虏骑秋高过黑山。六郡平时元近塞，一夫谁个可当关？云中太守须重起，日逐贤王未肯还。空抱平胡二三策，书生无计谒龙颜。

【袁相国故居访李孝甫太仆】

鱼文匕首不离身，马踏长安市里尘。重过杨家旧亭子，深悲侯氏老门人。朱栏易主花无色，青眼逢君酒可亲。同是中郎琴畔客，一般憔悴各沾巾。

汪时元

时元字惟一，休宁人。

【九日舟中】

秋风叶正飞，江上逢重九。人世几登高？寂寞黄花酒。（只此已足。）

蔡文范文范字伯华，新昌人。隆庆戊辰进士，历官广东布政司参议。隆庆以后，诗教渐衰，故所收从略。

【自瀛德至东昌道中杂诗】

闻道张秋决，先朝虑独深。名山标戊己，奉使失辛壬。地控支祈锁，天寒象罔沉。谁知神禹迹，疏凿本无心。

【游南岳】

缥缈仙台紫气浮，烟笼玉座俨垂旒。地包荆楚标南纪，江合沅湘向北流。牲帛千秋周祀典，衣冠五月舜诸侯。尘缘未断惭仙骨，金简云书何处求？

黄洪宪

洪宪字懋忠，嘉兴人。隆庆辛未进士，改庶吉士。官至少詹事，掌翰林院事。

【山海关】

长城古堞俯沧瀛，百二河山拥上京。银海仙槎来汉使，玉关秋草戍秦兵。星临尾部双龙合，月照平沙万马明。闻道辽阳飞羽急，书生急欲请长缨。

李三才

三才字道夫，临潼人。万历甲戌进士，官至户部尚书。

【送许郎中转饷蓟密诸镇】

重镇经行远，清秋离别难。和戎兼汉策，转饷命秦官。朔雁惊风下，边云入夜寒，都亭尊酒罢，落叶满征鞍。

朱期至期至字子得，蕲水人。万历甲戌进士，官怀庆知府。

【送蒋太守之琼州】

五羊南去客心孤，铜柱遥分使者符。为语越裳诸属国，清时不用贡珊瑚。（从张谓《戏杜侍御送贡物诗》翻出，能尊国体。）

冯琦

琦字用韞，临朐人。万历丁丑进士，官至吏部侍郎。赠礼部尚书，谥文敏。

【题三娘子画像】

红妆一队阴山下，乱点酡酥醉朔野。塞外争传娘子军，边头不牧乌孙马。（此为忠顺夫人作。）

朱国祚

国祚字兆隆，秀水人。万历癸未赐进士第一，官至南京礼部尚书，入东阁后加少傅。赠太傅，谥文敏。

【经宁庶人废苑】

吴淞何知反，刘安但自尊。鱼盐时不利，鸡犬尔焉存？俘已儒臣获，军犹镇国屯。白头遗老在，尚说献王孙。

【西山谒景皇帝陵】

戾园凄断白杨风，黄瓦今看天寿同。北狩专驰通问使，南还偏赏夺门功。若教守土盟城下，安得蒙尘返域中？多少谏臣司耳目，昌言翻赖校官忠。（追复景皇帝谥号，由荆门市训导高瑶上疏言之。）

【恭谒庆陵作】

讲幄频趋鹤御深，重来就日惨棠阴。十年始受东朝册，一月真倾下土心。视榷尽收中使节，披沙罢采邝人金。最愁日历书难既，龙去乌号涕不禁。

徐学聚

学聚字敬舆，兰溪人。万历癸未进士，官至右佥都御使，巡抚福建。

【夜宿日观峰禅房】

岱宗面面削芙蓉，时有卿云出汉封。杖屨中天干象纬，风烟下界起蛟龙。河流旧绕沧溟远，练影斜悬紫翠重。夜半石床天籁发，梦中错认景阳钟。

汤显祖

显祖字义仍，临川人。万历癸未进士，官南京礼部主事。谪典史，量移知遂昌县。

【送别刘大甫】

欲别悲歌鸡又鸣，白头无计与书生。恩仇未尽心难死，独向田横岛上行。

徐燧字惟和，闽县人。万历戊子举人。

惟和近体宗法唐人，在诗道冗杂时遇之，如砂砾中得简珠也。七言绝尤能作情至语，在李庶子、郑都官之间。

【铜雀妓】

铜台遗令在，玉座主恩非。旧曲流哀管，余香散舞衣。穗帷空寂寞，罗绮失光辉。日日西陵望，君王归不归？

【陈价夫归自崖州谈粤中山水，因怀旧游】

朱崖弹铗动经年，醉向黎姬酒肆眠。笑语自存豪士气，衣裳犹带岛夷烟。菠萝老去甘如蜜，菱叶开时小似钱。十载游踪俱是梦，不堪重听旧山川。

【送人游吴楚】

津亭烟柳绿垂丝，万里关山匹马迟。去国正当秋尽后，登楼多在日斜时。楚江草长悲鹦鹉，吴苑花深走鹿麋。话别何须共惆怅，秋风摇落是归期。

【旅次石头岸】

石头城下水微茫，回首乡关驿路长。瓜步烟波连断霭，秦淮云树隔斜阳。秋高落木现村舍，夜静寒潮到女墙。客里愁心已如此，一闻南雁更凄凉。

【金陵故宫】

先朝遗殿闭尘埃，零落空劳过客哀。五夜铜壶干罢滴，六宫金锁涩难开。翠华逝后全无迹，罗绮焚余自有灰。弓箭尽埋烟雨冷，椒房一半上莓苔。（阅五六知当时初无逊国之事，盖帝与后同在灰烬中也。史氏《致身录》之诬，神庙时人俱能言之，得钱牧斋诸人之辨益明。）

【送李太守擢宪滇南】

昆明池水静无波，拥传新从燹道过。开府定能宽汉法，采诗自可入蛮歌。趁墟滇客龙名市，纳款蛮王象渡河。他日勒功留片碣，点苍如黛石嵯峨。

【访梅禹金秦淮客舍】

舟过长干问客星，风流不用叹飘零。一秋桃叶居淮水，（时同小姬。）十月梅花梦敬亭。游遍南朝故宫地，翻残西竺《净名经》。赠君欲折藏鸦柳，满目长堤何处青？

【武夷溪口送惟起弟】

青山游侣散纷纷，况复临歧远送君！两地雁鸿难顾影，一时鸾鹤总离群。人从杜若洲边去，路在桃花洞口分。明发登高各惆怅，鹅溪斜日幔亭云。

【丹阳遇陈十八】

丹阳渡口遇同乡，欲语匆匆怨夕阳。君返江南我江北，云山千叠断人肠。

【长门怨】

芳草何进辇路通？长门花鸟自春风。只缘薄命难承宠，岂是相如赋未工？

【邮亭残花】

征途微雨动春寒，片片飞花马上残。试问亭前来往客，几人花在故园看？（绝句七章，词不必丽，意不必深，而婉转关生。觉一种至情余于意言之外。）

【酒店逢李大】

偶向新丰市里过，故人尊酒共悲歌。十年别泪知多少？不道相逢泪更多。

【芋江驿楼送张四之白下】

春风吹柳万条斜，极目金陵隔暮霞。不必相思当后夜，片帆开处即天涯。

【御儿舟中别朗公】

月下谈深睡已迟，满身凉露夜何其？鸡声未断钟声起，又是江头欲别时。

【寄弟】

春风送客翻愁客，客路逢春不当春。寄语莺声休便老，天涯犹有未归人。

陶望龄

望龄字周望，会稽人。万历己丑赐进士第三，官至国子祭酒。卒谥文简。

【沛县过高帝庙】

路经旧沛山川古，龙起中原战斗多。一代雄图开赤帝，千秋遗庙傍黄河。云归尚识真人气，风起犹传《猛士歌》。魂魄来游长此地，汉宫秋色近如何？

高攀龙

攀龙字云从，无锡人。万历己丑进士，历官至左都御史。坐忤逆阉，削籍被逮，赴水死。赠太子少保、兵部尚书，谥忠宪。

忠宪诗无心学陶，天趣自会，羽翼名教，人不以《击壤》一派为高，益信定山、甘泉非风雅之宗也。

【水居】

薄暮登楼，四望远畴。时雨既降，农人乍休。乳燕来止，儵鱼出游。万族有乐，吾心何忧？（中有元化，偶然得之。）

【夏日闲居】

长夏此静坐，终日无一言。问君何所为？无事心自闲。细雨渔舟归，儿童喧树间。北风忽南来，落日在远山。顾此有好怀，酌酒遂陶然。池中鸥飞去，两两复来还。

【湖上闲居季思子往适至】

正尔山水间，念我烟霞友。春风吹微波，日暮倚杨柳。我友惠然至，童仆喜奔走。相别叹几时，相逢虑非久。所欢得晤言，欲言仍无有。默默各自怡，一室闲相偶。夜深不能寐，明月在东牖。

【夜步】

幽人夜未眠，月出每孤往。繁林乱萤照，村屋人语响。宿鸟时一鸣，草径露微上。欣然意有会，谁与共心赏？

【韬光静坐】

偶来山中坐，兀兀浹旬余。淡然心无事，宛若生民初。流泉当几席，众山立庭除。高树依岩秀，修篁夹路疏。所至得心赏，终日忻忻如。流光易蹉跎，此日良不虚。寄言缮性者，速驾深山居。

傅新德

新德字元明，定襄人。万历己丑进士，官至国子祭酒，赠礼部右侍郎。谥文恪。

【送郭青字参藩巴蜀】

殊方几载叹离群，忽漫相逢又送君。万里江湖龙剑合，一尊风雨蓟门分。峨岷迥出天连雪，栈阁平临马度云。蜀相威名应不负，他时消息好相闻。

区大相

大相字用孺，广南高明人。万历己丑进士，官翰林检讨，历赞善、中允。

【家人初至京，置酒亭中对雪作】

庭霰今朝集，家筵此日开。不知燕雪地，犹讶故园梅。玉袖承花出，珠帘卷絮回。瑶华虽可赠，留赏上春来。（中允海南人。海南无雪，故颌联特妙，颈联亦秀艳，“香雾云鬟”同一笔墨。）

【送何仪部稚孝谪桂林】

长沙非不远，南去更萧林。谪宦楚山尽，独行湘水深。乡书同雁少，官舍共猿吟。今夕怀人梦，随君到桂林。

【南行感怀】

闻道貂珰辈，由来为扫除。先朝烦镇守，重任典方舆。贡采山川竭，征输井邑虚。明明皇祖训，宫抚意何如？（时矿税之使，纷纭四出，至寺人职扫除者，列坐督抚之上。小民穷瘁，几于赋《苕华》、歌《莠楚》矣。诗中念祖训，正以慨时事之非也。）

【入罗滂水】

井邑新安集，闾阎杂汉徭。火耕春伐木，山猎夜归樵。潮响蛩溪合，林光瘴峒消。直须勤抚字，勿使困征徭。

郑明选明选字子升，侯官人。万历己丑进士，官南京刑科给事中。

【感怀】

黄虞世已远，大道渐陵迟。十室八九空，奸邪乃猖披。法令日以繁，盗贼日以滋。宣尼相鲁国，道路不拾遗。君子正其本，礼义将自治。莫以鞭与箠，能使疲马驰。莫以刑与戮，能使风俗移。长吏苟有阙，三尺将安施？

【恭闻册立皇太子，喜而赋诗】

少海初流润，前星已丽空。九重原独断，四皓本无功。鹤驭丹霄上，龙栖紫禁东。君王有《金鉴》，早晚赐春宫。（神庙为郑妃故，屡欲建立福王，迫于公议而止。作者归本“九重独断”，立言之体，故应温厚也。）

【十五夜写怀】

明月孤悬夜，空斋独坐人。地平连海岳，天阔散星辰。禄米悲亲没，柴门忆弟贫。吾生无限事，况感百年身。

归子慕子慕字季思，昆山人。万历辛卯举人。崇祯时追赠翰林待诏。

待诏诗雅淡清真，簪瓢童冠，无非乐趣。生平与高忠宪公郭道义交，诗品亦略相似，所云同心之言也。

【对客】

默然对客坐，竟坐无一语。亦欲通殷勤，寻思了无取。好言不关情，谅非君所与。坦怀两相忘，何害我与汝？

【城北初夏】

三见草木荣，栖栖犹未旋。偶与城市远，因耽此地偏。独馆背清池，一无俗事牵。晨兴课书罢，日午蛙声喧。出门见新秧，微绿映远田。久晴初得雨，稚子亦欣然。田父说岁占，今兹定有年。物情既如此，予乐复何言。（谈然无意，太羹玄酒之遗

。)

【杂诗】

日出群动作，智计千万端。用此徒为劳，不用殊未安。所繇在有身，坐令思虑殫。所以古贤达，与物同一观。俯仰放怀抱，宇宙何其宽！

【馆城北】

妻孥昔居城，我淹江上庐。妻孥来江上，我去城北居。城北保所事，二生喜从余。既爱童子真，且得人事疏。长夏北窗竹，风吹几案书。坐看墙外帆，树中去徐徐。中情苟无系，触物皆有余。今兹对佳节，正值秋风初。香稻感我情，归食空江鱼。小女解思父，一见当何如？

【壬寅正月西村筑室成】

经始逼岁除，春肇室云考。结构称心为，弥拙亦弥好。村树既罗列，溪流亦滌抱。北牖移修簦，南圃艺药草。室中图与书，闲暇可探讨。农人理耰锄。念此岁供早。顾我长负疴，不耕惭亦饱。

【移居】

冉冉岁云暮，寒风动林於。言辞东村宅，去适西村庐。岂无旧巢恋？欢与吾仲俱。西村况不远，相去一里余。回瞻竹树间，炊烟出前厨。吾病四十衰，厌厌日不如。忧患易反本，戚戚念友于。安得我叔氏，亦复来此居。遥望城中山，引领空嗟吁。

【丙寅六月过吴子往荻秋庵】

萧瑟湖上庐，六月如清秋。凉雨过柴门，绿杨风飏飏。水滨一稚子，洋洋何所求？终日无一鱼，持竿钓不休。问之向我笑，使我心忘忧。（诸咏有物我同得之趣，觉月到天心，风来水面，终是有心作理语。）

【归江上】

去年冬尽归，室家尚完好。儿女曝檐隈，墙头日杲杲。今年冬尽归，离忧不可道。中馈阒无人，虚堂尘不扫。一儿依外家，两女傍兄嫂。奚独天运乖，谋生亦草草。人世骨肉缘，尚尔不可保。而况一切营，何足撓怀抱？久矣吾行迷，回车苦不早。

【岁暮别诸生】

惻惻不可道，臨歧但依依。常恐語言多，貌勝中情微，感茲寒色厲，北風吹爾衣。
歲暮家室情，各各念爾歸。群居雖云樂，人情諒難違。所患不同心，不患相見稀。
尼父重久要，如醴久已非。勸哉儀先民，雅道庶可几。（人人胸臆中語，便是至情。
視華子潛詩，只学得陶公形象，所謂得其皮骨者也。）

卷十

谢肇淛肇淛字在杭，长乐人。万历壬辰进士，官至广西左布政使。

【秋日邀龙君御同钟伯敬、林茂之赋诗，君御时将赴湟中】

营道植高操，大音谢俗机。谁云京洛尘，而能缙素衣。前踪既云邈，后会安可希？斗酒自斟酌，蟹螯秋正肥。南陆有残暑，西山无留晖。不知松际月，已挂花间扉。杂坐忘磬折，绪谈闻芬菲。君今赴河湟，戎马生郊畿。白面谁见赏？青云愿多违。旧欢意未浹，新离泪仍挥。余亦倦游者，因之歌《式微》。

【送徐兴公还家】

枫落空江生冻烟，西风羸马不胜鞭。冰消浙水知家近，春到闽山在客先。斜日雁边看故国，孤帆雪里过残年。怜予久负寒鸥约，魂梦从君碧海天。

【春怨】

长信多春草，愁中次第生。君王行不到，渐与玉阶平。

【秋怨】

明月怜团扇，西风怯绮罗。低垂云母帐，不忍见银河。

袁宏道

宏道字无学，公安人。万历壬辰进士，官吏部郎中。公安兄弟意矫王、李之弊，而入于俳谐。又一变而之竟陵，诗道遂不复振。人但知竟陵之衰，而不知公安一派先之也。

【感事】

湘山晴色远微微，尽日江边取醉归。不见两关传露布，尚闻三殿未垂衣。边防自古无中下，朝论于今有是非。日暮平沙秋草乱，一双白鸟避人飞。

曹学佺

学佺字能始，侯官人。万历乙未进士，历官参议广西。天启中以阉祸除名为民。崇祯初起复广西，疏辞不赴。家居二十余年，殉节死。

【夜泊彭山江口】

锦城平日暖，旅泊始知寒。犍蜀中分地，岷峨相向看。冈连三女冢，水疾二郎滩。芦苇风吹急，萧萧汉将坛。（岑彭遇害此地，有“彭亡”之称。）

【泰昌皇帝挽歌】

龙驭升遐日，封章满御床。施行犹令旨，德意自先皇。沛若江湖决，俄然石火光。更闻哀诏到，能不泪沾裳。（“龙驭升遐”谓神宗，“更闻哀诏”谓光宗。）

劝进笺三上，腾欢遍九垓。逐臣皆召用，中使尽收回。货贱昭先俭，心劳集相才。大工须计日，久矣柏梁灾。

罢税不停征，边庭岁用增。金钱溢输挽，士马饱飞腾。北阙闻天语，东隅望日升。那堪遽辞世，仓卒治山陵。

九转神丹秘，三旬帝业终。《春秋》书法谨，中外揣摩穷。雨泣将填巷，攀髯或堕弓。由来戮方士，岂但为无功？

【过木渎】

指点十三桥，迎船半柳条。夕阳潮正满，春草岸俱遥。琢研开山市，为园灌药苗。卖饧时节近，处处有吹箫。（琢研种花，风土自昔，写来光景如画。）

【送陈民部出守思州】

言辞粉署重凄凄，道路时闻征马嘶。日照梦悬乡树外，夜郎吟向郡楼西。竹鸡群里登峨岭，铜鼓声中出朗溪。我欲白门攀柳送，相思此夜有乌啼。

【八月朔日，王元直招，集南楼，送陈汝翔之东粤、王玉生之清漳、沈从先还姑苏、徐兴公之建溪、陈维寻之聊城、蒋之才之广陵、予返白下】

西风萧瑟动离颜，一树衰杨不胜攀。秋老几人犹白社，月明无主自青山。征途南北高楼外，客泪纵横杯酒间。此别纷纷难聚首，天涯哪许梦魂闲。

蔡毅中

毅中字弘甫，光山人。万历辛丑进士，官至礼部右侍郎。

【秋兴】

木落江空天气清，西风萧飒雁南征。浮云暗逐年华变，歧路虚怜短鬓生。千里关河悬客梦，万家砧杵动秋声。崇兰芳芷依然在，何处江潭吊屈平？

公鼐

鼐字孝与，蒙阴人。万历辛丑进士，官至礼部右侍郎。谥文介。

【咏古】

古人获我心，善达穷通理。安危虑所居，屈伸贵自己。已贵可复贱。中立常不倚。衰至易生骄，腊毒恒在美。薛公仅遗荣，疏傅庶知止。寥廓睇冥鸿，矰缴安可拟？

【穆陵关】

昔日齐侯履，南疆尽此封。诸山沂作镇，五岳岱为宗。霸国犹余业，重关识旧踪。故园相去近，回首海云重。

【诸将】

上谷渔阳拱帝京，相连河外受降城。一从塞马来南牧，遂使王师罢北征。绝徼尚传青海箭，中原新动绿林兵。主忧正值宵衣日，谁向天山答太平？

李流芳

流芳字长蘅，嘉定人。万历丙午举人。

嘉定四君中，以檀园为上。虽渐染习气，而风骨自高，不能掩其真性灵也。

【过皋亭龙居湾宿永庆禅院，同一濂、澄心、恒可诸上人步月】

归装出西湖，间道向黄鹤。屡愆桐坞期，偶遂龙居诺。轻舟凌晨风，遥山满晴廓。丹林尚可数，寒条纷无托。披松指微径，听水扪暗壑。新构争远势，平台揽摇落。霜余山容浅，天清海气薄。暂歇尘劳心，始知寂灭乐。

每多方外游，见僧即如故。灯明一龕下，夜长愜深悟。不知山月上，千林已流素。出门寻旧溪，爱踏松影路。气和空宇澄，寒魄如春露。幽泉洗我心，微钟杳然度。（读第二章，如见东坡承天寺夜游光景。）

【白门七夕】

（时将入燕。）

旧日维舟处，悬情独柳条。秋风又京国，客思正江湖。长路有时到，欢期难再邀。徘徊望牛女，愁绝向中宵。

【黄河夜泊】

明月黄河夜，寒沙似战场。奔流聒地响，平野到天荒。吴会书难达，燕台路正长。男儿久为客，不辨是他乡。

唐时升时升字叔达，嘉定人。

【南翔里有八老人为社，长者年九十四，少者年八十一，居止不一二里。耄耄相望，杯酒谈笑，日相娱乐，诚太平盛事。诗以纪之】

白鹤村头春日晓，香雾蒙蒙百花好。苍颜素发八老人，花前置酒相倾倒。笑说邻翁学语时，追谈邑子知名早。不知主客更劝酬，争引曾玄互提抱。今年孟春甲子晴，占云麻麦俱丰成。坐中祭酒九十四，敬酌社公旨且清。其间迭起拜更祝，但愿脚健双眸明。桂林从事八十一，只闻唤弟无呼兄。南村翳翳桑榆日，出共持杯归散帙。但课儿孙种黍苗，何知方士餐芝术。香山居士有遗篇，九十不衰真地仙。公等康健逢圣世，能无旦暮歌皇天？愿炊香饭秬酿酒，日奉杖履长周旋。武皇遗事多讹谬，欲问銮舆南幸年。

【薛侍御出按贵州，便道归云南省觀】

绣衣持节出长安，南入牂牁路万盘。重箬湿云常欲雨，点苍晴雪不知寒。登车自扫豺狼迹，问寝应弹獬豸冠。遥忆树头新酒熟，（云南人酿酒于树）刺桐花下正承欢

程嘉燧字孟阳，歙县人，寓居嘉定。

孟阳诗亦娟秀少尘。自钱牧斋訾警李、何、王、李诸人，推孟阳为一代宗主，几与高季迪、李宾之前后相埒矣。而阳羨邵子湘有心矫枉，摘其累句云：“争倚画桡冲妓席，独横朱袖占歌筵”、“亦知终去婚和嫁，且恋闲来弟劝兄”、“近逐歌喉须闯席，闲开笑靥待歌船”、“闲偎串迹圆留面，戏剧鞋痕曲印肩”、“年去贫来不自由，暗伤颜面向交游”等句，谓其秽褻俚俗，几于身无完肤矣。予录其气清格整、去风雅未远者四章，见孟阳自有真诗，勿因牧斋之过许，而毛举其疵以掩之也。

【值唐叔达同钱将军北上言别】

方舟燃烛夜相过，道上匆匆奈别何！我已三年怀锦里，君偏五月渡黄河。南游谁共烟花早，北上兼闻金鼓多。此别各怀无限意，莫将春泪点江波。

【送李中翰还朝】

汉家宫阙枕燕关，使者乘槎八月还。吴地潦平犹似海，广陵涛壮正如山。同舟夜醉神仙侣，染翰春随供奉班。闻道沧溟今未息，几回沟壑动愁颜。

【阊门访旧作】

怅望吴阊百里余，故园兄弟日应疏。多年华鬓丝相似，三月春愁水不知。歌扇旧分桃叶渡，钓船还傍藕花居。扫眉才子何由见？一讯桥边女校书。

【登楼】

少小听歌怕唱愁，一声楚尾与吴头。如今身在伤心地，但见春光莫上楼。

杨涟

涟字文孺，应山人。万历丁未进士，熹宗朝官至副都御史。劾魏阉二十四大罪，被逮，死镇抚司狱。赠太子少保、左都御使，谥忠烈。

【题柏子园青芸阁】

官阁凌空汶水深，金飙初动客登临。浮云易改三山色，落叶先惊万里心。江上美人遗杂佩，城南少妇拭清砧。繁台兔苑今禾黍，日暮凭栏思不禁。

王象春

象春字季木，济南新城人。万历庚戌进士，官至吏部郎中。

【书项王庙壁】

三章既沛秦川雨，入关又纵阿房炬，汉王真龙项王虎。玉玦三提王不语，鼎上杯羹弃翁姥，项王真龙汉王鼠。垓下美人泣楚歌，定陶美人泣楚舞。真龙亦鼠虎亦鼠。（奇辟可俚谢皋羽篇。）

贺万祚万祚字孝延，嘉兴人。万历庚戌进士，官至江西右布政使。

【周侍御行部】

兰台使者旧知名，揽辔从容江海情。抗疏共看任伯雨，行军还拟赵营平。五花骢马巡周道，《三辅黄图》历汉京。不独艰危忧水旱，前筹更欲请长缨。

高道素

道素字玄期，嘉兴人。万历己未进士，官工部郎中，以督造桂府殿倾，论死。

【秋日寄沈无回】

凉风起庭际，帘幕迴秋阴。一叶空阶落，孤灯独坐深。芙蓉思远道，蟋蟀动愁吟。谁念闲居客，能伤迟暮心！

陈鸣鹤鸣鹤字汝翔，闽人。诸生。

【伍相祠】

黄池宴罢羽书催，骨葬鸱夷梗可材。西子已辞吴苑去，东门忍见越兵来。春风故国蘼芜长，落日荒祠杜宇哀。千载忠魂何处问？满城儿女弄潮回。

周永年永年字安期，吴江县学生。

【吊淮阴侯】

一市人皆笑，三军众尽惊。始知真国士，元不论群情。楚汉关轻重，英雄出战争。何能避菹醢，垂钓足平生？

王人鉴人鉴字德操，吴县人。

【冬夜闲居】

忽忽寒光早，闲居水上村。病疏当世事，贫负故人恩。黄叶深樵径，荒烟淡荜门。凭谁论出处，短褐信乾坤。

吴稼澄稼澄字翁晋，孝丰人。以例除南光禄典簿。

【金陵酒肆赠茅平仲】

暮年看尔壮心孤，落落酣歌击唾壶。但数一钱怜姹女，才夸千骑笑罗敷。梨花雨湿红襟燕，杨柳春藏白项乌。欲向卢家借双桨，莫愁不是旧时湖。

宋登春

登春字应元，新河人。

【秋日野望】

听鸟中林性，看云故国心。地卑湘汉阔，天远洞庭深。老马空知道，穷猿岂择林？十年书剑客，寂寞到如今。

孙友篪友篪字伯谐，歙县人。

【过古墓】

野水空山拜墓堂，松风湿翠洒衣裳。行人欲问前朝事，翁仲无言对夕阳。

俞安期安期字羨长，吴江人。

【忆家】

故国千山外，经秋远别离。浮生能几日？为客此多时。衰眼高堂泪，寒砧少妇悲。天涯念游子，风雨共凄其！

【望海】

纷纷灵异变昏朝，阴火随波远自飘。龙藏函经连水府，蜃楼开市借云霄。星临东极无分野，山入南荒有沃焦。日日潮来长应候，似应西答百川朝。

【登祝融峰】

中天积气入清凉，云雾翻看地混茫。雨挟苍龙奔下岭，星悬朱鸟定南方。何年石匮藏金简，自古山祇礼赤璋。坛上长流青玉乳，神池高捧帝台浆。

何白

白字无咎，永嘉人。

【淮上归兴】

淮泗秋风动地来，月明如水雁声哀。南经伍员吹簫市，北眺曹公较弩台。归路渐香菰米饭，佳期已负菊花杯。愁闻烽火连东北，极目浮云黯未开。

郑琰

琰字翰卿，闽县人。

翰卿工七言律，如“霜色欲将关树折，河声如带戍楼奔”、“磧上阴云连塞黑，关中落日带沙黄”、“剑戟已消兵后火，髑髅犹泣战时疮”，皆慷慨有燕赵声。

【哭李大将军】

十万旌旗染血丹，招魂夜夜哭桑乾。残兵来拾中郎印，野鸟飞登大将坛。金兽锁门严鼓角，石麟窥冢葬衣冠。至今俺答骑胡马，犹是将军旧战鞍。

盛鸣世

鸣世字太古，凤阳人。国子监生。

【题岳阳酒家壁】

巴陵压酒洞庭春，楚女当垆劝客频。莫上高楼望湖水，烟波二月已愁人。

沈木木字子乔，嘉兴县学生。

【夜起】

暑夜不成寐，起步中庭中。残月忽堕水，明河犹在空。篱根滴清露，树杪生微风。坐爱新凉好，先秋有候虫。（“残月忽堕水”二语，是夜起；“鸡声茅店月”二语，是晓行。各入神妙。）

王屋字孝峙，嘉善人。

【子夜歌】

千金买良玉，百金求良工。为侬作双环，相连无始终。

妾身妾自惜，君心君自知。莫将后日情，不如初见时。

吴梦旸梦旸字允兆，归安人。

【送胡孟韬邑博之沅江】

携手情无极，茫茫此别何？一官犹俎豆，满地已干戈。畏路身难定，骚人怨自多。
可堪寥落思，木叶洞庭波。

范汭汭字东生，乌程人。

【琴川夜泊怀孙齐之】

野宿次皋，青青荻笋齐。潮痕随月落，山势压城低。残梦风前 斥，归心曙后鸡。
还知高隐处，只隔水东西。

【春日讯吴允兆】

远树微波黯不分，阖闾城畔寄孤云。春来尽有还乡梦，除却青山便是君。

吴兆兆字非熊，休宁人。

【同曹学佺过宿碧峰寺愚公房】

入寺昏烟敛，双桥竹涧通。僧归残磬里，客梦乱山中。灯暗窗沾雨，枝喧鸟堕风。
他乡寥落夜，语笑喜能同。（戊子春宿寒山空谷庵中，始知“客梦乱山中”句之妙。）

徐 勃 勃字兴公，闽县人。

【送俞本之游楚】

寒皋木落水连天，云际孤城望汉川。隔岸数声湘女瑟，中流千里鄂君船。鹧鸪夜叫
黄陵月，猿狖秋啼赤壁烟。挟得《离骚》经一卷，行吟长对楚江边。

【送康元龙之灵武】

贺兰山下战尘收，君去征途正值秋。落日故关秦上郡，断烟残垒汉灵州。胡儿射猎经河北，壮士吹笳怨《陇头》。城窟莫教频饮马，水声呜咽动乡愁。

黄河官路黑山程，羌笛横吹汉月明。漠北峰烟三里雾，陇西鼙鼓十年兵。燕鸿度塞寒无影，胡马行沙暗有声。后夜思君劳远梦，朔风吹过白登城。

文震孟

震孟字文起，长洲人。天启壬戌赐进士第一，授翰林修撰。忤逆阉，镌级归。崇祯初复原官，历仕至礼部侍郎、东阁大学士。卒谥文肃。

【拟古远行】

江之阳兮有屿，江之阴兮有渚。朝而风兮夕而雨，望夫君兮渺何许。春波兮悠悠，日暮兮夷犹。拏青桂兮为楫，搴木兰兮为舟。恍含思兮凝睇，乘清风兮远游。远游兮上下，载行兮载舍。遵中流兮待君，将寄心于远者。

徐石麒

石麒字宝摩，嘉兴人。天启壬戌进士，除工部主事。崇祯初起补南礼部。历史部尚书。乙酉城陷，自经可经堂。

【望匡庐】

突兀此何处？匡君庐亘天。黛浮五老壁，青入九江船。慧远林中寺，康王谷口泉。符生今已老，谁与买山钱？

倪元璐

元璐字玉汝，上虞人。天启壬戌进士，改庶吉士，官至礼部尚书、翰林学士。京师陷，自缢。初谥文正，定谥文贞。

【皇极门颁历作】

凤阙开彤旭，猊炉散紫烟。六阶齐度纬，七政转玑璇。甲历龙躔改，寅宾象魏悬。明时功在革，资始义承乾。黑帝威初试，青皇位早传。周官新月令，甘氏旧星篇。人继羲和后，书成冀荚前。庚先三日戒，贞下一元旋。图篆符垂赤，干支德应玄。兴王惟有岁，太史又编年。赐出黄星曜，披看绿字鲜。因知天历数，如日起虞渊。

蒋灿灿字韬仲，长洲人。崇祯戊辰会魁，官至天津兵备副使。

【题杜少陵像】

谁貌杜陵老，忧怀笔底传。凋残悲瘦马，慷慨拜啼鹃。作客依江阁，浮家寄楚船。高才同落，千古有青莲。

大雅长往矣，遗容后代看。万间思广厦，一谏失微官。抗志隆中对，饥驱蜀道难。萧骚两鬓白，应为忆长安。

徐汧

汧字九一，长洲人。崇祯戊辰进士，官至少詹事。家居，殉节死。

【三月十九日】

珍饌精繆赐讲筵，每逢令节主恩偏。十章书未陈《金鉴》，九逝魂犹恋细旃。社稷风云谁奏曲？园林霜露已经年。龙髯回睇桥山远，玉匣珠襦不忍传。

万寿祺寿祺字年少，徐州人。崇祯庚午举人。

【入沛宫】

泗亭春尽树婆娑，汉帝宸游不再过。魂魄有时还至沛，楼台落日半临河。风吹大泽龙蛇近，天入平沙雁鹭多。我亦远随黄绮去，东山重唱采芝歌。

【赠胡彦远】

河渚经营把钓纶，乾坤草莽一闲身。南阳高卧真名士，东汉余生旧党人。十载荃蘅同入梦，三冬冰雪独伤神。荷锄归去田庐闭，莫向人间学问津。

马世奇

世奇字君常，无锡人。崇祯辛未进士，改庶吉士，官至翰林院侍讲。京师陷，自缢。初谥文忠，定谥文肃。

【赠曹元宰守漳州】

灵槎秋泛海天凉，五夜心悬燕寝香。总为至尊忧社稷，汉臣何必薄淮阳！（温柔敦

厚。)

杨廷麟廷麟字伯祥，清江人。崇祯辛未进士，官终编修，死节赣州。

【别叶侍御】

浑水桥边寺北田，行滕东去雨连绵。桑村古渡沙移路，茅屋人家鸟就烟。江左衣冠悲楚泽，淮西烽火接秦川。更闻群盗郊原遍，欲下浔阳万里船。（“茅屋”句写尽荒凉，不减“江燕初归不见人”句。）

张溥溥字天如，太仓州人。崇祯辛未进士，改庶吉士。

【孟门行】

双丝系玉环，宛转生光泽。本以结同心，何知反弃掷！君家美酒琥珀光，红颜少年坐满堂，酒酣意气不可当。君家玉堂盛孟门，孟门深谷无朝昏。中有美人啸且歌，仁义结客客自多，相与醉君金叵罗。黄雀衔环报旧主，畏君弹射远飞去，夜深孤栖城北树。（“夜深孤栖”，余情不尽，忠爱之心，故应如是。）

姜埰

埰字如农，莱阳人。崇祯辛未进士，官礼科给事中。以言事廷杖，削籍戍宣城。

【赴戍宣州卫】

垂死承恩谴，天威咫尺间。荷戈荒徼去，收骨瘴江还。袞职犹思补，龙髯竟绝攀。桥陵千滴泪，独在敬亭山。（泪痕血点垂胸臆。“荒徼瘴江”，未合宣州。）

顾咸正咸正字端木，昆山人。崇祯癸酉举人，除延安推官，殉节死。

【登华山】

倚杖高台万里秋，山川元气共沉浮。金神法象三千界，玉女明妆十二楼。井钺参旗皆北拱，浊河清渭自东流。愁看杀气关中满，独立南峰最上头。

陈宗之

宗之字玉立，长洲人。崇祯癸酉举人。

【汉道】

汉道昔云季，四海沸群雄。贤士失纲维，奔窜投西东。管宁栖辽海，田畴隐无终。郑玄与王粲，各自获所从。如何盛明世，栖栖泥淖中？雨雪积荒途，渚田路不通。宁无《北门叹》？要自秉固穷。疾耕寡乐郊，仕宦乏奇功。乾坤虽浩广，何地置吾躬？怆恻衡门下，忧来溯悲风。

谢遴遴字汇先，宜兴人。崇祯癸酉举人。

【巴女词】

巴川积水极岷峨，巴女明妆艳绮罗。为语秋江风浪急，断肠休唱《木兰歌》。

吴本泰字本泰字美子，仁和人。崇祯甲戌进士，官南京礼部郎中。

【帝京篇】

梦想黄金台，来歌白石粲。明明圣人出，旭日天方旦。广殿饬梓材，神霄耸轮奂。微垣妖彗消，芝盖卿云缦。三吴罢机杼，九庙秉珪瓚。下国颂时雍，至尊理宵旰。宵旰怀殷忧，筹边寝弛玩。军需飞檄催，水衡仰屋叹。大奸已距脱，群疑未冰泮。渐鸿虽可仪，羔羊不闻赞。名盛实则衰，事倍功乃半。因之敕几康，匪伊游泮涣。君既勤昼接，臣当思日赞。朝中去朋党，政府参谋断。网必挈其纲，绳先理其乱。求治勿太速，防微勿滋蔓。所期日月光，幽遐理必贯。（思陵初政，实有可观。狐疑琐屑，仍任奄人，而臣工泄泄，朋党连结，此后日事也。诗中思患豫防，具有灼见。）

万泰泰字履安，鄞县人。崇祯丙子举人。

【留别董西来】

客途相见即相亲，总是凄凉梦里人。且喜何郎能似舅，不妨绮季未称臣。睢阳城上三生泪，无定河边后死身。惆怅天涯分手处，秋高一雁落江津。

阎尔梅

尔梅字用卿，江南沛县人。崇祯丙子举人。诗有奇气，每近粗豪。兹择其尤雅者。

【重过兖州】

亭长台西旧酒徒，疏狂名姓满江湖。每从世外寻高蹈，不识人间有畏途。季札重来周乐散，奚斯一去鲁宫芜。高楼极目谁同醉？正月愁听有蟋蟀。

刘永锡

永锡字钦尔，魏县人。崇祯丙子举人，官长洲儒学教谕。革命后隐于阳城湖之滨，穷饿死。

【行路难】

云漫漫兮白日寒，天荆地棘行路难。（四字抵过千万言。）

陈子龙

子龙字人中，更字卧子，青浦人。崇祯丁丑进士，官兵科给事中。殉节死。

诗教之衰，至于钟、谭，剥极将复之候也。黄门力辟榛芜，上追先哲，厥功甚伟。而责备无已者，谓仍不离七子面目。将蝓蟪齐鸣，不必有钧韶之响耶！

【曜灵】

（《曜灵》，天子遇旱而忧，省狱减刑，雨以时降，诗人美之也。）

曜灵维阳，杲杲丽天，爰自东作，火现于昏。天之荐瘥，蕴隆如焚。皇曰予冀方，邦畿所安。废我来牟，兆民孔艰。（一章。）

旱之始盛，维尘冥冥。旱既太甚，百卉俱零。岂降自天，胡德非馨。曾是有象恭，曾是有谗慝，曾是有诡随，曾是有掊克。（二章。）

爰命宗伯，大雩孔明，爰命彻侯，于郊于宗。以尔币玉，及尔斯牲，方社既周，山川用享。（叶）振古率育，胡遘予不宁。（三章。）

巍巍蓊丘，维君宅之。翼翼皇心，维天绎之。礼草不展，来飧来格。膳宰既彻，镛鼓既释。凡百君子，勖尔无斁。（四章。）

皇曰司寇维刑，世重世轻。朕璽奸宄，或愆于平。悍阳骄骄，忧我黎氓。乃清岸狱，乃释累囚。肆赦时夏，式歌且讴。倬彼燕山，出云油油。终朝弥野，既舒既柔，既沾既优。田畯语语，乐哉士女，以育我稷黍。皇王布惠，无赐纯嘏。

【仲夏值左掖门，送夏彝仲南归】

金塘回素波，中有双鸳鸯。托身在清禁，和鸣君子傍。顾此同林鸟，孤翼忽南翔。生平志慷慨，何事独难忘？本为四海人，岂得常相将？丈夫重知己，万里同一乡。龟勉效贞亮，德辉在岩廊。莫忧青蝇多，和璧贵善藏。执手不能语，怅矣结中肠。

【杂诗】

山椒微风发，薄暮迟佳人。颓阳淡林表，素月生河津。伫立怀往路，时晏多苦辛。君家青云楼，瑶华艳当春。皋兰亦有芳，欲寄良无因。欢爱岂足重？要使恩谊申。浮云诚易阻，白璧终见珍。

至道无相非，末流乖心迹。高怀苟不亮，执疑日以积。贤随贵同用，愚与贱交役。腾名固自阶，投谗岂无隙？营营棘上蝇，可以携金石。履纯思寡尤，超方鲜奇策。毁誉苟未忘，顾影渐踖。

墓门有恶木，鸱鸢巢其巅。同兹雨露润，不与百卉妍。性质固自殊，大造安能迁？我行适见之，中心怀忧悵。利斧虽在手，斩伐无此权。去去保芳洁，愿言艺蘅荃。（手无斧柯，奈龟山何！）

【平陵东】

炎精中烬妖彗红，平陵松柏生秋风。四十万人颂符命，巨君却在层城宫。东郡太守建旗鼓，排山动地连关辅。五威国将纷东驰，《大诰》《金縢》亦何补？污宫荐棘虽无成，天下始知称汉兵。不逢时会岂失策，犹与宛洛开先声。斗柄横斜渐台蹙，白水真人坐黄屋。逢萌束帛卓茂封，义公碧血无人哭。男儿何必上云台？千古徒悲两黄鹄。（义公之称兵，更难于胜、广之开汉祖，而光武之封不及，何也？不以成败论人，具有卓识。）

【小车行】

小车斑斑黄尘晚，夫为推，妇为挽。出门何所之？青青者榆疗吾饥，愿得乐土共哺糜。风吹黄蒿，望见墙宇，中有主人当饲汝。叩门无人室无釜，踯躅空巷泪如雨。（写流人情事，恐郑监门亦不能绘。）

【寄献石斋先生】

烈风萧条吹百羽，朱凤葳蕤适南土，罗爵如云不见天，秦人高歌楚人舞。出门不向妻子辞，八尺银铛五色组。虎须校尉红锦裘，峨舸大艗下江州。蛟龙鬻鬻黄沙卧，

日月冥冥青枫秋。赭衣墨幘安鱼服，予亦相逢淮水曲。京华时事不足论，惨淡相看日弥促。镰刃谁留门外兰，庖厨肯恕山中鹿？可怜举世学浮沉，烛龙回照杳难寻。苍茫不解时人意，爱护还凭明主心。我有短札置怀袖，安能一矢千黄金？平生风义兼师友，陈蔡相从但鼓琴。（此石斋被逮，黄门遇之淮南而作。）

阊阖门开翡翠城，凤凰十二相和鸣。碧血一洒玉阶裂，惊雷急电何时平？门生往往自引匿，故吏不复相通名。贾彪奔走何侧足，曹鸾上书翻桎梏。钩党几入甘陵部，相将同入黄门狱。绯衣狱吏行生风，黄封小匣排当中。更番榜掠不知数，但称汝罪如山崇。小臣万死不足惜，圣德如天辉典。带血晨兴写《孝经》，裹疮夜卧编《周易》。爰书一旦下高天，薄谴由来湘水边。万里闻声颂明圣，汉廷有待贾生还。（此述石斋自诏狱得戍酉阳而作。“带血晨兴写《孝经》”二语，自是当时实事。）

【交河】

鸟啼征马动，曙色散滹沱。海气通三岛，天风静九河。沙平边草断，日淡塞云多。百里无烟火，空林枉自过。

【庐居】

行遁山河改，归来松菊荒。尚余三亩宅，无复万家旁。析死烦宗祝，偷生愧国殇。但依亲陇在，含笑此高冈。

【襄阳】

江汉西陲重，荆襄南纪雄。诸侯悲岷首，耆旧失隆中。燧色通秦塞，妖星下楚宫。不知大堤女，何处舞春风？

【杂感】

大河南北望，万里入春愁。车马空官渡，风烟满豫州。黄巾连户著，白骨少人收。自古中原地，应烦圣主忧。

兵戈传剑外，消息每差池。已失夔门险，谁言蜀栈危？雪山寒鼓角，玉垒暗旌旗。天子频西顾，元臣实总师。（此杨嗣昌总师时也，夔门失而蜀不可守矣。丧师辱国，伊谁之咎哉？）

【送张玉笥中丞擢河道少司空随召陛见】

旧闻开府静牙璋，诏领河堤入未央。周室保厘分郑鄢，汉家底绩念宣房。九天星宿

开秦塞，万里梯航走冀方。为语至尊南顾日，不堪重问海陵仓。（典切）

【酬李司马萍槎先生】

久瞻枢府重明光，投我连城云锦章。伤乱已闻刘太尉，赏音深愧蔡中郎。九龙移帐春无草，万马窥边夜有霜。早晚沧江惊驿使，诏书先问右贤王。

【钱塘东望有感】

清溪东望大江回，立马层崖极望哀。晓日四明霞气重，春潮三折浪云开。禹陵风雨思王会，越国山川出霸才，依旧谢公携屐处，红泉碧树待人来。

【送吴峦稚司李桂林】

翡翠巢边匹马过，千盘桂岭郁嵯峨。南浮漓水啼猿满，北望君山落雁多。蛮府官闲能作赋，汉廷恩近忆鸣珂，愁心独系张平子，欲寄琅玕奈远何！

【重游弇园】

放艇春寒岛屿深，弇山花木正萧森。左徒旧宅犹兰圃，中散荒园尚竹林。十二敦槃谁狎主？三千宾客半知音。风流摇落无人继，独立苍茫异代心。（今弇园一带废为民居矣，读此不胜时代之感。）

卷十一

梁朝钟朝钟字未央，顺德人。崇祯己卯举人，殉节死。

【将出皖，留别杨六符、沈乃功、唐圣俞、徐誉星】

船傍垂杨别绪生，烟含春树雁归声。群公缟带遗吴锦，幕府青丝唱《渭城》。几树乌啼趋夏口，何时马首望西京？江南江北如相忆，千里高楼待月明。

方以智

以智字密之，桐城人。崇祯庚辰进士，授翰林检讨。革命后为僧，名弘智。

【看月】

一片钟山月，那从岭外看。昔尝临北阙，今独照南冠。万里天难问，三更影易寒。梦中儿女路，莫忆旧长安。

黄周星

周星字九烟，上元人。崇祯庚辰进士。晚变名黄人，字略似。自沉于水。

【秋日与杜子过高座寺登雨花台】

被发何时下大荒，河山举目共凄凉。客来古寺谈秋雨，天为幽人驻夕阳。去国屈原终幸直，无家李白只佯狂。百年多少凭高泪，每到西风洒几行。

陈瑚字言夏，太仓州人。崇祯壬午举人。

【赠吴兴公】

我非陈孟公，君乃吴季子。千金重一诺，结交有终始。仗剑作远游，欲为报仇死。惜哉时不遇，长叹归故里。其事虽不成，其名满人耳。

【李映碧廷尉遗地图】

图画山川感慨多，边陲风景近如何？入关无复萧丞相，聚米空思马伏波。两戒一江横似线，九州五岳小于螺。错疑留守魂归夜，风雨声声唤渡河。（读至末语，纸上有声，恐流边光景者不能作，亦不解读。）

【山中喜遇徐昭法共饮】

一夜寒香万树开，相逢花下且衔杯。穷途兄弟难成醉，故国风烟易入哀。雪满山中苏武窖，云横江上谢翱台。寸心不尽斜阳晚，湿遍青衫首重回。

徐枋

枋字昭法，吴县人。崇祯壬午举人。考文靖公殉节后，隐于上沙。

【别诗】

上山采薇蕨，日暮不盈把。苦饥不足悲，将遗同心者。良友远别离，踟蹰送于野。我有盈觞酒，黄流倾玉斝。申以《远游曲》，中怀期共写。清商一何悲，四座和者寡。恐伤游子心，揽涕不敢下。景光已西驰，日月不我假。

谭贞良贞良字元孩，嘉兴人。崇祯癸未进士。

【楼桑先主庙】

系出中山近，名从小沛闻。卜邻占李定，望气得周群。象叶黄龙瑞，符仍赤帝文。全家频脱险，一旅忽能军。名士收诸葛，英雄独使君。志宁摧百战，力已限三分。泪尽髀生肉，魂归栈入云。枯桑遗庙折，野火断碑焚。系马寒风急，题诗塞日曛。榆存旧社，弦管尚纷纷。

【题河梁泣别图】

都尉台前起朔风，节旄空尽路西东。不知别泪谁先落，同在河梁夕照中。

黄淳耀

淳耀初名金耀，字蕴生，嘉定人。崇祯癸未进士。乙酉城破自缢。

【野人】

野人叹息王师劳，秦贼楚贼如猬毛。攻城掠野官吏死，大江以北民嗷嗷。昨闻死贼劫财赋，分与官军作贿赂。乱斫民头挂高树，黎明视贼贼已去。（时章疏皆称贼为死贼。）

野人叹息年岁恶，池中掘井井底涸。飞蝗引子来蔽天，枉自倾家事田作。朝廷加派

时时有，哭诉官司但摇手。归逢吏胥狭路边，软裘快马行索钱。

野人叹息朝无人，朝中朋党如鱼鳞。十官召对九官默，匍伏苟且容一身，庙堂何人理阴阳，频年日食四海荒。吾欲上书问朝士，却恐人诃妄男子。（朝野大势如是，虽欲不亡，其可得乎？）

吴易易字日生，吴江人。崇祯癸未进士，殉节死。

【威宁伯王襄敏公越】

威宁熊黑姿，高视气敌万。脱略绳墨外，勇智走飞电。大廷吐奇言，排闾怒风旋。威声动异域，瑰特震所见。目属膺帝心，短袂故上殿。帝曰快御史，为朕将而弁。所部皆鹰腾，公也身搏战。搗虚握胜策，入穴虎乃困。一炬红盐池，冰天千帐燭。烽消玉关烟，雪卷阴山片。辕门正高会，琵琶奏哀艳。战士挟秦姝，顿使死力贱。豁达笼豪英，出没神鬼眩。丈夫重勋名，志岂在铁券？绝塞悬孤臣，中援何足玷？惨淡黄金印，零落白羽扇。风尘暗不开，北顾抚长剑。（为威宁一洗其辱。《怀贤》诸咏，原本少陵《八哀》，而已之抱负自出。三章择其犹有骨干者。）

【定襄侯郭忠武公登】

郭公武定孙，神驹渥洼好。十龄走健笔，吸振奇藻。洞彻《春秋》义，兵法腹笥了。安危异人出，所以奠皇造。英宗北狩初，决机一何早！黄尘拥翠盖，痛愤居庸道。紫微为荡摇，柱极西欲倒。我公奋孤撑，乃心协少保。国也今有君，挥血视清昊。截塞云中城，虎豹郁相抱。崩腾万马阵，击众每用少。猿臂捷有神，铁甲尽穿缟。杨石雄军声，锁钥资电扫。撒烈天网翻，槎枒地龙绕。岂多三军力，遂争造化巧。诗看横槊赋，檄倚马上草。排宕非常姿，灏气秋空。高咏战场篇，寂寞风流绍。

【少保戚公继光】

大将东南谁？戚公真鹰扬。雄情恣捭阖，秘策挥阴阳。夙奉綦履训，更见经术详。结友倾贤豪，文采殊颀颀。晓达三门流，以律师所臧。龙鸟追武侯，衡轴通轩皇。变化开精心，什伍为鸳鸯。（少保所结阵名）岛夷蹂南土，兵气惨不张。闭营百日练，战士虎力强。疾扫溟波平，受钺总蓟方。计伸犁庭威，十万环偏厢。远猷振华夏，定策为周防。亭障杂星罗，旌旄蔽日光。呼韩遂稽首，郅支亦来王。款关四十年，戎马不敢扬。伐暴贵上兵，功岂必战场。竟无通侯赏，坐使壮士伤。时平武略绌，世乱智勇长。问彼登坛者，曷以恢我疆？

黄翼圣翼圣字子羽，太仓州人。崇祯中辟召，官安吉知州。

【渝城度岁】

风俗他乡异，巫歌达四邻。江明无月夜，猿唤不眠人。眷属生兼死，年光腊带春。客中艰一醉，辜负物华新。

周立勋立勋字勒卣，华亭县学生。

【咏怀】

东登泰山颠，累累见城郭。秋风吹平原，牛羊下寒泽。吕尚本阴谋，渔钓竟所托。神明启远疆，后世资经略。遭逢良有时，志士固穷约。飘蓬西南征，浮云散林薄。悲哉大国风，田横不可作。

【伤春】

平池曲巷古祠东，几树桃花落晚风。明日殷勤尊酒后，春光已过别离中。

白燕坟前载酒过，几人同唱《柳枝歌》。莫愁一夜花如雪，摇落春心自此多。

夏完淳完淳字存古，华亭人，考功郎允彝之子。殉节死。

存古十五从军，十七授命，生为才人，死为鬼雄，汪锜不足多也。诗格亦高古罕匹。

【秋怀】

凉风何瑟瑟，吹我游子颜。历历江上林，流蝉鸣其间。浮云西南征，一去何时还？驾舟凌洪波，杖策穷崇山。君子不遑息，小人豫以闲。感激在沟壑，敢念徒旅艰？中夜起百忧，劳人独长叹。

秋色从西来，风物自凄紧。金飙辞炎晖，玉露戒商轸。鸱鸢薄暮鸣，幽兰望秋陨。零落在一时，荣华若朝菌。高从巢父栖，下与壶公饮。静观百岁间，无名以为准。

【精卫】

北风荡天地，有鸟鸣空林。志长羽翼短，衔石随浮沉。崇山日以高，沧海日以深。愧非补天匹，延颈振哀音。辛苦徒自力，慷慨谁为心？滔滔东逝波，劳劳成古今。（此渊明咏荆轲作也。）

【秋夜感怀】

登楼迷北望，沙草没寒汀。月涌长江白，云连大海青。征鸿非故国，横笛起新亭。无限悲歌意，茫茫帝子灵。

邝露露字湛若，南海县学生。城陷，为兵所害。

湛若诗原本《楚骚》，五言尤胜。

【洞庭酒楼】

落日洞庭霞，霞边卖酒家。晚虹桥外市，秋水月中槎。江白鱼吹浪，滩黄雁踏沙。相将楚渔父，招手入芦花。（五言佳处，全在气韵，不求工于语言对偶之间。得此意可与读湛若诗。）

【洞庭】

人归洞庭水，心远百蛮天。虹饮吴山雨，蝉嘶楚岫烟。挂帆明月树，沽酒白云船。来雁纷南向，衡阳何处边？

【西湖上春】

行逢新岁月，骄马踏城桥。旭日催蕙带，春人艳柳条。香车流水击，仙袂逐风飘。小凤衔花去，空伤云汉遥。

【虞山谒舜祠】

荒服垂衣日，三苗格命年。鸟耘千亩籍，龙御九疑烟。蒲阪征云外，苍梧落照边。何人抚瑶瑟，离恨隔湘川。

【采石】

牛渚青天月，长悬供奉祠。如何今夕酒，不共昔人持？高咏谁能似？扁舟从所之。溯洄殊未已，言折楚江蓠。

【浮湘礼三闾墓田寻贾生故宅】

浮湘孤月下灵渠，牢落残魂伴索居。庚子日斜闻野鸟，端阳沙渥见江鱼。天高未敢重相问，年少何劳更上书？此去樊城望京国，定从王粲赋归欤？

【莫愁湖赠刘瞻甫】

憔悴行吟落照时，莫愁湖上与君期。《五噫》一赋梅花国，三黜重逢柳士师。吴苑旧游淹越鸟，楚裳今雨裊江蓠。姑苏烟月长相待，萎绝芙蓉白露滋。

刘城城字伯宗，贵池人。

【群盗】

群盗尚如此，江城未何依。健儿身手劣，析父爪牙非。鼯鼠能中饱，飞鸿恒苦饥。从来比管乐，讵肯泣牛衣。

沈寿民寿民字眉生，宣城县学生。举贤良方正，门人私谥贞文。

【访姜如农城北】

石公严谴后，又见荷戈新。旷代留遗直，残山待老臣。龙归天上驭，环赐梦中身。生死昭亭畔，乡园别自春。（嘉靖中，石御史金以谏止醢词，谪戍宣州）

邢昉昉字孟贞，高淳县学生。

【九江城南楼晚眺】

泱泱九江口，日入烟涛深。登楼俯危槛，近见庐山岑。昔人此宴赏，嘉月陶幽襟。长使千载下，缅想南楼心。孤城何萧条，杀气余秋阴。交衢无人行，荒榛遂如林。抚事遽成往，含凄方在今。履运适如此，忧端苦沉沉。

【溪行屡经与亡友胡印度别处】

溅溅溪水侧，是子门前路。涓流乱石间，褰裳乃可渡。忆昔造子庐，款款平生故。尊醪亦时有，日晏未遑去，相送屋东偏，幽林每徐步。欹岸注微波，残阳在高树。情因老易悲，欲别恒返顾。兹来溪草绿，偶到临分处。予犹耿夙欢，子已长不寤。流泣但徘徊，空惭子桑扈。

【故宫燕】

君不见故宫燕，春雨秋风几回换。宫中风雨长蓬蒿，飞入宫墙绕虚殿。穿帘度阁羽差池，尽日呢喃人未知。柳下乍衔千点絮，花间仍拂万年枝。玉阶寂寞罽毼冷，画栋回翔春燕影，岁岁营巢竟不成，春来秋去谁曾省？可怜此度秋风早，整顿毛衣犹

自好。徘徊欲别未央宫，万户千门忽如扫。钟{ ね}何年去洛阳，仙人辞汉泪成行。最苦西飞双燕子，重来不见旧宫墙。

施武武字鲁孙，长洲人。

【相见坡】

上坡面在山，下坡山在面。相见令人愁，何如不相见！

【乌鸦关】

朝上乌鸦关，暮下乌鸦关。老乌啼哑哑，行人还未还？（写尽境地险恶。）

叶襄襄字圣野，长洲县学生。

【感旧】

洛蜀纷争日，君王宵旰时。内朝私斗急，河北捷书迟。近辅连群盗，临郊誓六师。伤心殷浩辈，一蹶竟难支。（思陵时朝局及天下大势，已尽四十字中，如读少陵《洛下》、《天中》诸作。）

【喜康小范孝廉至，兼吊杨机部阁学】

万里清江浪拍天，故人消息动经年。重来麋鹿长洲苑，归去荒芜彭泽田。虎帐角残辞部曲，龙沙旗折偃戈船。卢谿沦落刘琨死，回首章门一惘然！

陆圻

圻字丽京，钱塘贡生。

【与歌者陈郎】

落日横江老白蘋，同乡停问一相亲。未嫌李尉翻新曲，且喜何戡是旧人。玉管漫吹秋月白，红牙曾对绮筵新。坐中恐有伤心客，莫按《伊凉水调》频。

沈钦圻钦圻字得舆，长洲县学生。周准填讳。

先大父诗，中岁爱刘随州，晚境爱陆放翁。五言如“山横去鸟外，人立晚霞边”、“学《易》应观我，言《诗》或起予”，七言如“冷岸孤舟摇月白，荒树一犬吠灯

红”，皆陆太仆起顽所称赏者。兹录感时伤事六章，异于流连光景之作，有关风教，不在语言之工也。孙男德潜敬识。

【书事】

天地兵戈满，江湖逋窜频。布衣难许国，泪眼不逢春。玉阙悲龙驭，雄关丧虎臣。唐家灵武业，望断素衣人。（此思陵殉社稷后有望于南都拥立也。“江边老人泪暗泣，眼昏不见风尘清”，忧时感事，古今一辙。）

【咏史】

卧薪尝胆日，纵饮擘笈时。但识凭江险，而忘厝火危。一堂争洛蜀，四镇角熊羆。此日王夷甫，清言或未宜。

君臣鱼水合，半壁且游嬉。乐奏李天下，歌传郭顺时。还须求故剑，慎勿剪连枝。野老瞻乌意，茫然空尔思。（此留都事势也，不止于“从臣皆半醉，天子自无愁”矣。“须求故剑”、“勿剪连枝”，当时草野自存公论。）

【乱后哭友】

故友如黄叶，伤心渐觉稀。途穷天地窄，世乱死生微。腹痛车频过，琴亡人已非。嗟余称后死，恸哭返荆扉。

【哭刘剩庵先生】

（名永锡）

万里离家客，孤身易箠时。变名唯恐识，后死尚嫌迟。麦饭邻僧荐，蓬庐野父悲。《招魂》弟子事，愧乏楚人辞。

顾梦游

梦游字与治，江宁学生。

【访邹满字溪上】

言寻居士家，薄暮清溪道。荒原鸟独飞，寒木云相抱。入室闻疏钟，开门见秋潦。落叶坐来多，清风时一扫。

【同蔡大美、徐曰赞、沈治先秦淮夕泛】

落日淡生烟，波明影碧天。人来花槛里，酒出板桥边。杨柳风千树，笙歌月一船。十年重对此，回首各凄然。

【社集天界循公房】

来已半春徂，佳游欣有徒。鸟窥迟日下，花近午风苏。世事到山尽，高言对佛无。杖钱曾不系，随意乞香厨。

钱秉鐙秉鐙字幼光，桐城人。

幼光自抒情性，无意工诗，五言似陶公，亦在神理，不在字句。与高忠宪、归侍诏所谓同工异曲者也。

【效渊明饮酒诗】

寄生大块中，何者为我故？譬如逆旅物，暂有安足据？在世虽百年，毕竟舍之去。临去岂不恋？恋亦不得住。所以达观人，淡然随所遇。委顺生死间，不厌亦不慕。日饮一杯酒，可以全此趣。

【田园杂诗】

夙昔慕躬耕，所乐山泽居。忧患驱我远，常恐此志虚。十载一言归，旧宅已焚如。嗟我昆与弟，茅茨倚废墟。徘徊靡所栖，还结田中庐。结庐虽不广，床席容有余。床上何所有？一二古人书。荧荧坡上麦，青青畦间蔬。日入开我卷，日出把我锄。

仲春遇时雨，既雨旋亦晴。百草吐生意，众鸟喧新声。纷纷群动出，各各有其营。孰是形骸具，而怀安居情。老农悯我拙，解轭为我耕。教以驾驭法，使我牛肯行。置酒谢老农，愿言俟秋成。

一春勤稼穡，草木荒东园。今晨始芟刈，逝将除其根。良苗常恐短，恶草常恐繁。腰斧伐荆棘，用以卫篱藩。荆棘伤我手，淋漓手中痕。手伤不足道，篱弱何以存？家人挈酒至，满斟在瓦盆。劝我饮一醉，颓然卧前轩。前轩无人来，春风开我门。

鸡鸣识夜旦，鸟鸣识天时。东皋人语语，我起毋乃迟。揽衣出门早，且复驱其儿。黄犊初教成，我锄子则犁。犁锄岂不苦？衣食道在兹。道旁一老父，辶蹇前致辞：言儿筋力薄，稼穡非所宜。诗书世所轻，犹是祖父遗。如何舍素业，自甘辛苦为？多谢老父言，此意君未知。呼儿且饭牛，吾去烧东菑。（若一说明，索然无味。）

春天不久晴，衣垢及时浣。身上何所著，敝襦及骭短。家人念我寒，一杯为斟满。酒满不可多，农事不可缓。奋身田野间，襟带忽以散。乃知四体勤，无衣亦自暖。君看狐貉温，转使腰肢懒。

人生会有尽，行止非自由。止亦不可趣，行亦不可留。如何柴桑叟，汲汲为此忧！终年痛饮酒，冀以忘其愁。吾身听物化，化及事则休。当其未化时，焉能弃所谋？有子亦须教，有田亦望收。天心与人事，何息不周流。我不离世间，而愿与天游。焉能外亲戚，视之同聚沍？乃知黄老书，不如孔与周。（末章将伦常日用，存顺没宁，和盘托出，可以想其品概矣。）

【金陵即事】

秋山无树故峻嶒，几度支筇未忍登。荒路行愁逢牧马，旧交老渐变高僧。钟楼自吼南朝寺，佛塔还燃半夜灯。莫向雨花台北望，寒云暗淡是钟陵。

顾绛

绛字宁人，后更名炎武，昆山人。终于山西。

宁人肆力于学，自天文、地理、古今治乱之迹，以及金石铭碣、音韵、字画无不穷极根柢。韵语其余事也。然词必己出，事必精当。风霜之气，松柏之质，两者兼有。就诗品论，亦不肯作第二流人。

【述古】

微言既以绝，一变为纵横。下以游侠权，上以刑名衡。六国固蚩蚩，汉兴亦攘攘。不有董夫子，大道何由明？孝武尊《六经》，其功冠百王。节义生人材，流风被东京。世儒昧治本，一概而相量。於乎三代还，此人安可忘！

《六经》之所传，训诂为之祖。仲尼贵多闻，汉人犹近古。礼器与声容，习之疑可睹。大哉郑康成，控馥靡不举。六艺既该通，百家亦兼取。至今《三礼》存，其学非小补。后代尚清谈，土苴斥邹鲁。哆口论性道，扞龠同蒙瞽。（清言何足论，宋人扫斥笺疏，亦偏见也。篇中议论，岂云小补？）

五国并时亡，世道当一变。扫地而更新，三王功可见。鼓琴歌有虞，钓者知其善。区区山泽间，道足开南面。天步未回旋，九州待龙战。空有济世心，生不逢尧禅。何必会风云，弟子皆英彦。俗史不知人，寥落《儒林传》。（自注：文中子书五国并时而亡，盖伤先王之道尽坠，故君子大其言，极其败，于是乎扫地而求更新也。后贤以《隋史》无王通传，疑为乌有先生。果尔，古人之可疑者多矣。此诗可为正论

。)

【谒夷齐庙】

言登孤竹山，忼焉思古圣。荒祠寄山椒，过者生恭敬。百里亦足君，未肯滑吾性。逊国全天伦，远行避虐政。甘饿首阳岑，不忍臣二姓。可为百世师，风操一何劲！悲哉尼父穷，每历邦君聘。楚狂歌凤衰，荷蕢识击磬。自非为斯人，栖栖无乃佞。我亦客诸侯，犹须善辞命。终怀耿介心，不践脂韦径。庶几保平生，可以垂神听。（唐人登首阳山，只淡淡写景。此作者自抒怀抱，应以议论为长。）

【过矩亭拜李先生墓下】

人生无贤愚，大节本所共。蹉跎一失身，岂不负弦诵。卓哉李先生，九流称博综。心鄙马季长，不作《西第颂》。屏居向郊，食淡常屡空。清修比范丹，聪记如应奉。力学不求闻，终焉老家^十。同时程中丞，一疏亦惊众。玉玺安足陈，亟进名臣用。（自注：中丞名绍，德州左卫人。巡抚河南，时漳河旁得玉玺，上疏秦玺不足珍，国家以贤为宝。荐党籍诸臣十余人，不纳，遂谢病归。）党论正纷拏，中朝并罢讼，世推山东豪，三李尤放纵。祠庵与哭典，后先相伯仲。初逾士类闲，竟折邦家栋。悲哉五十年，风尘尚溷洞。我来拜遗阡，增此儒林重。虽无警咳接，犹有风流送。自非随武贤，九原谁与从？（自注：《汉司隶校尉鲁峻碑》“休神家^十”。）

【龙门】

亘地黄河出，开天此一门。千秋凭大禹，万里下昆仑。入庙煮蒿接，临流想像存。无人书壁问，倚马日将昏。

【蒿山】

位宅中央正，高疑上界邻。石开曾出启，岳降再生申。老柏摇新翠，幽花茁晚春。岂知巢许窟，多有济时人。

【酬王处士九日见怀之作】

是日惊秋老，相望各一涯。离怀销浊酒，愁眼见黄花。天地存肝胆，江山阅鬓华。多蒙千里讯，逐客已无家。

【与江南诸子别】

绝塞飘零苦著书，来行李问何如？云生岱北天多雨，水决淮壩地上鱼。浊酒不忘千

戟上，荒鸡犹唱二更馀。诸公莫效王尼叹，随处空身足草庐。（《管辂别传》：鸡一二更鸣者为荒鸡。《晋书·王尼传》：尼早丧妇，有一子。无居宅，唯畜露车，有牛一头，每行辄使御之，暮则共宿车上。尝叹曰：沧海横流，处处不安也。）

【酬傅处士】

清切频吹越石笳，穷愁犹驾阮生车。时当汉腊遗臣祭，义激韩仇旧相家。陵阙生哀回夕照，河山垂泪发春花。相将便是天涯侣，不用虚乘犯斗槎。

【刘谏议祠】

（蕢）

皂囊青史漫传名，白日黄泉气未平。自古国亡缘宦者，可怜身没尚书生。荒阡草长妖孤出，旧驿风寒倦马行。一自德陵升驭后，山河祠庙总沦倾。

【赠郝将军太极】

（滇人，天启中守沾益。余于叙功疏识其姓名。今为医，客于吴之上津桥。言及旧事，感而有赠。）

曾提一旅制黔中，水藿诸酋指顾空。入楚廉颇犹未老，过秦扁鹊更能工。风高剑气蛉川外，水沸茶声鹤涧东。桥畔相逢不相识，漫将方技试英雄。

【赋得秋柳】

昔日金枝间白花，只今摇落向天涯。条空不系长征马，叶少难藏觅宿鸦。垂老桓公重出塞，罢官陶令乍归家。先皇玉座灵和殿，泪洒西风向日斜。（小小题俱有关系，此杜陵咏物体。）

【华山】

四序乘金气，三峰压大河。巨星雄赑屃，白帝俨巍峨。地劣窥天井，云深拜斗阿。夕岚开翠巘，初月上青柯。欲摘星辰堕，还虞虎豹诃。正冠朝殿阖，持杖叱羲和。势扼双嶂壮，功从驷伐多。未归桃塞马，终负鲁阳戈。山鬼知秦帝，蛮王属赵佗。出关收楚魏，浮水下江沱。老尚思三辅，愁仍续《九歌》。唯应王景略，岁晚一来过。

【禹陵】

大禹巡南守，相传此地崩。礼同虞帝陟，神契鼎湖升。窆石形模古，墟宫世代仍。探奇疑是穴，考典或言陵。玉帛千年会，山河一气凭。御香来敕使，主守付髡僧。树暗岩云积，苔深壑雨蒸。鹤留呼冢柏，蝙蝠下祠灯。余烈犹于越，分封并杞鄮。国谄明德胙，人有霸图称。往者三光坠，江干一障乘。投戈降北固，授子守西兴。冲主常虚己，谋臣动自矜。普天皆爵禄，无地使贤能。合战山回雾，穷追海践冰。蠡城迷白草，镜沼烂红菱。樵采冈林遍，弓刀坞壁增。遗文留仆碣，仄径长荒藤。望古频搔首，嗟今更抚膺。会稽山色好，凄侧独攀登。

【高渐离击筑】

神州移水德，故鼎去山东。断霓夫人剑，残烟郭隗宫。身留烈士后，迹混市儿中。改服心犹苦，知音耳自通。沉沦余技艺，慷慨本英雄。壮节悲迟暮，羁魂迫故穷。一吟辽海怨，再奏蓟丘风。不复荆卿和，哀哉六国空！

韩洽字君望，长洲人，隐居阳山。

【题李龙眠诸夷职贡图】

（元丰二年画）

有唐贞观万国宁，殊方异域皆来庭。立本为图拟王会，诡形怪状流丹青。龙眠居士生有宋，未必诸蕃真入贡。得无旧本重临摹，左食贯胸聊玩弄。元丰天子承平日，君臣竞讲强兵术。不知中国正凋残，驰想海邦兼日出。贡獒西旅四夷宾，作训犹烦保傅臣。为问伯时图作贡，何如郑侠绘《流民》？（如此立意，方异风云月露。愚采明末诸贤诗，当《谷音》一集可也。）

【黄孝子端木万里寻亲】

父子分殊域，趋庭道路难。一身冲虎豹，万死涉风湍。乍识容颜是，翻悲涕泪干。故园今共反，犹作梦中看。

【雪下红】

篱落遍积素，愈知颜色丹。故非嘉卉列，卿作野花看。天道存微物，韶华惜岁阑。芳心良独苦，谁谓不知寒？

【铁马】

急响中宵发，凌空铁骑行。不知风信至，顿使旅魂惊。当世正多事，吾侪方苦兵。

那堪檐宇下，又作战场声。（下半忽然推开，感慨时事，咏物诗中别有天地。）

【关山月】

晓角数声哀，边风卷地来。十年征戍客，不上望乡台。（翻进一层，倍觉沉痛。）

【闻雁】

朔风吹雁渡江干，月白霜清响尚寒。孤客几回愁里听，故乡何处报平安？

朱鹤龄鹤龄字长孺，吴江县学生。

【感遇】

薇蕨苟可采，何必在首阳？清流苟可泛，何必在沧浪？至人处委蛇，守己非一方。直木宁见伐，芳兰要遂伤？纵志游霄汉，俯仰随翱翔。

陈忱

忱字遐心，乌程人。

【阅罗隐诗】

余杭山水役精魂，末世才人眼界昏。憔悴感恩依尚父，可怜尚父事朱温。（非贬昭谏，借此发出正论也。武肃不讨朱温，实为当时恨事，知李亚子真英雄矣。）

李沂沂字子化，兴化县学生。

【赠魏叔子】

魏生嵌{山欹}目如电，董子祠傍忽相见。豫章国土天下闻，生不逢时且贫贱。东西奔走非无故，侧身海内求英彦。即今屠钓岂无人，常恐摧颓筋力变。握手数语露肺肝，别我西归寻《考槃》。子之往兮各努力，岁暮雨雪江风寒。

【挽从伯瞻鹿公】

丧乱君臣在，偏安社稷芜。封章悬日月，旅櫟历江湖。报国余孤剑，匡时屈壮图。故园春树绿，愁听野禽呼。

王翊翊字介人，嘉兴布衣。

介人七言如“周道秋风行黍稷，汉宫春雨长蒲萄，”“西蜀谕通司马檄，中山谤满乐羊书”、“夜月旌旗五马渡，秋风草木八公山”，极工铸语，无竟陵习气。

【村居】

独树寒烟外，孤村流水间。偶随花草去，远逐渔樵还。川暝罢垂钓，日斜长掩关。何年事高隐，归卧鹿门山。

【客中九日】

细雨成阴近夕阳，湖边飞阁照寒塘。黄花应笑关山客，每岁登高在异乡。（沈子山云：“不失唐音”。）

沈自然自然字君服，吴江人。

【江南乐】

初景烂银浦，溘溘浮鸂鶒。依情两摇荡，持比春江色。江深莲子齐，水暖鸳鸯栖。不须更相问，家住横塘西。横塘连夹浦，曲曲明如许。谁打白蘋开？前溪夜来雨。雨霁上南楼，天高水影浮。出门郎不见，仍荡采莲舟。（音节神似《西州曲》。）

屠爌爌字暗伯，嘉兴县学生。

【赠别袁重其】

高飞鸿雁满关河，此日寒江起夕波。庾信哀时常作客，梁园去国独行歌。霜凄茂苑清砧急，月照荒台落叶多。为问吴中旧知己，空山丛桂近如何？

卷十二

龚贤字半千，上元人。

【扁舟】

扁舟当晓发，沙岸杳然空。人语蛮烟外，鸡鸣海色中。短衣曾去国，白首尚飘蓬。不读《荆轲传》，羞为一剑雄。

顾苓

苓字云美，吴县人。吴江贡生。

【石公山】

茫茫三万顷，日夜浴青葱。骨立风云外，孤撑涛浪中。若令当路出，应作一关雄。朱^{<面力>}真多事，荆榛满故宫。（应叹贤者不用而小人误国也。下半拓开，得唐人格律。）

杜浚浚字于皇，黄冈人。

茶村长篇颇近颓唐，又《闻灯船鼓吹歌》以此得名。其实颓唐之尤者也。兹录其整顿有骨格者。

【游夹山漾】

出坞谢群贤，放舸理长啸。烟岫映澄波，始知所历妙。林壑罗秋姿，紫翠冒寒照。蘋汀欲为雪，枫岸忽如烧。目逐绝境往，意惬佳处要。层峰何婵娟？湾环亦窈窕。泛漾疑江湖，回帆复萝茑。面面见道场，一一起凭吊。寻幽不觉迟，归晚顾而笑。石门免见诃，登楼感同调。

【嵇康】

嵇康人中龙，义不可当世。视彼盗国臣，伎俩如儿戏。吐辞薄汤武，千载有生气。临命索琴弹，聊示不屑意。

【登金山塔】

极目非无岸，沧波接大荒。人烟沙鸟白，春色岭云黄。出世登初地，思家傍战场。

咄哉天咫尺，消息转茫茫。（苍苍莽莽，自是大家举止。）

【焦山】

触处迷人代，兹山尚姓焦。上头仍栋宇，到眼忽云霄。树色南徐近，江声北岸遥。衣冠留洞壑，不必访松寮。

出郭来差远，凭高望独深。江分神禹迹，海见鲁连心。密竹藏金像，回流灌石林。拟寻幽绝处，却诵《白头吟》。

方文

字尔止，桐城人。

【摄山绝顶】

下方惟见石，不信有柴荆。仄径盘空上，危峰到顶平。夕阳千岭秀，春水一江明。愁绝浮云外，苍茫旧帝京。

岑徵徵字金纪，南海人。

【湘潭晚春寄耒阳胡使君】

花落鹃啼日欲曛，白蘋洲畔怅离群。东风绿遍章台柳，夜雨寒生梦泽云。避地少陵犹寄食，依人王粲漫从军。春深塞雁皆还北，书札何因报使君？

纪映钟

映钟字伯紫，上元人。

【学圃赠邓生】

我为东湖樵，子学南山圃。相逢大道傍，雪涕问劳苦。我逢冬青树，再拜不敢斧。子有东陵瓜，屡渍深秋雨。生事尚饥寒，吟诗坐蒿堵。

申涵光

涵光字鳧盟，广平人。

【路氏妹江南使来】

骨肉何由见？音书隔岁通。雨深杨子驿，霜白赵王宫。旅食怜空橐，乡心逐断篷。十年恋慈母，泪尽北来鸿。

【怀太原傅青主】

曾约溪村访钓竿，数年设榻待君欢。乱离苦忆良朋少，衰病应愁远道难。晋国山川容白发，中原天地此黄冠。幸将卷帙传高迹，日向晴窗展画看。

蒋易

易字前民，江都人。

【清凉山顶留别杜于皇】

招提上夕阳，别酒置崇冈。秋老孤帆色，人轻百战场。江云平楚岸，风叶减吴霜。来日空回首，思君独渺茫。

戴冠冠字峨仲，更名易，字南枝，山阴人。

【钓台怀古】

赤伏符兴罢战争，钓竿三尺足平生。远携仙女桐江隐，深悔羊裘大泽行。一夜星辰凌帝座，九重贵贱见交情。请看七里泷中水，未到钱塘彻底清。（南枝《钓台诗》多至千余章，皆潦倒浅率，此择其尤雅者，首尾浑成，精神满腹，可以传世。）

费密密字此度，四川成都人。乱后流寓扬州。

【朝天峡】

一过朝天峡，巴山断入秦。大江流汉水，孤艇接残春。暮色愁过客，风光惑榜人。明年在何处？杯酒慰艰辛。（三四语十字成句，王新城尚书所谓十字堪千古也。）

【 戈中】

戈阁通秦道，青天不易行。尽过奇绝处，不负有平生。白马岩中出，黄牛壁上耕。野花埋犴处，幸蜀只空名。

朱茂暉

茂暉字子若，秀水人。祖荫授中书舍人。

【哭谭礼部元孩】

去日乘桴易，归愁度岭艰。河山成死别，儿女望生还。剑气沉三岛，文星陨百蛮。旅魂招未得，何处望乡关？

朱茂曙茂曙字子衡，秀水县学生。

【秦淮河春游即事】

桥下溪流燕尾分，湾头新水惯湔裙。六朝芳草年年绿，双调鸣笳户户闻。春雨杏花虞学士，酒旗山郭杜司勋。儿童也爱清明好，纸剪风鸢各一群。

王光承

光承字玠右，上海诸生。

【送人之广南】

并马衔杯日未曛，羊城山水正愁君。秋声已入庭前树，客路遥寻岭外云。溟海上连辰极动，星河南去越天分。年来莫问流人状，知有清猿不可闻。

俞汝言

汝言字石吉，秀水诸生。

【进艇】

晴川曲曲抱沙堤，岸柳依依远近齐。山色欲开疏雨外，夕阳忽在乱峰西。舟前波浪溯流驶，望里烟岚鲁树低。作客乘春行处好，故乡曾否息征鞿？

张纲孙纲孙字祖望，钱塘人。古诗得杜一体，时武陵诸子以祖望为最。

【涿州城】

晓霜不在地，微白生牛背。遥望涿鹿城，隆然沙碛内。控纒世走其下，壁立皆土块

。此地古范阳，甲兵天下最。侧耳闻啼饥，伤心自我辈。野狼遇人嗥，苍鹰攫雉碎。生涯底如此？浩叹兹行迈。

【自竹村】

路盘白竹村，崎岖探穷谷。居人八九家，林杪构破屋。下惟四柱立，亭亭不附木。仰视如鸟巢，夕暝梯云宿。已防虎豹害，复惧麋鹿触。我行多彷徨，歧路不敢哭。日晚慎前行，何处堪投足？

【晏城】

小小古晏城，西对华不（音花 罅）注。昔之晋郤克，逐马匝此处。我行实已倦，解解鞍歇薄暮。鸱枭啸其群，老乌守枯树。不见古人迹，断碑委樵路。手摸苔藓痕，字句读未误。平仲之采地，缅然起思慕。奈何千载后，芜没如野戍？相望有远山，恐是齐朝附。

【苦旱行】

田中无水骑马过，苗叶半黄虫咬破。五月不雨至六月，农夫仰天泪交堕。去年腊尽频下雪，父老俱言水应大。如何三伏无片云，米价腾贵人饥饿。大河之壖风扬沙，桔槔无用袖手坐。林木焦杀鸟开口，鲂鱼枯干沟底卧。人人气喘面皮黑，十个热病死九个。安得昊天降灵雨？童儿欢笑父老贺。高田低田薄有收，比里稍可完国课。不然官吏猛如虎，终朝鞭扑畴能那！

吴骥骥字日千，华亭布衣。

【喜汪振生归自云南】

万里归来日，蓬蒿满华门。登堂一长恸，兄弟几人存？豺虎关山险，烽烟日月昏。无穷故交意，相与尽清尊。

【汉昭烈】

名儒卢郑久周旋，正值黄星受命年。龙种已移《三统历》，蚕丛还辟半隅天。金瓯付托耕莘佐，玉几弥留《顾命》篇。一代英雄生死际，铜台遗令最堪怜。（足令老瞒愧死。）

【感时书事，寄计子山、陆孝曾】

十月寒风急，浮云暗大荒。客行愁道路，时事虑萧墙。蓟北非吾土，秦中亦异乡。空忧天欲坠，未见日重光。庙略惭灵武，军声谢朔方。元臣夸定策，列帅许勤王。好爵娱姻娅，官评视筐篚。帘编青鸟骨，玉斫辟邪香。冠盖晨先集，笙歌夜未央。冰蚕裁宝帐，堕马斗新装。营窟谋初遂，凭城气转扬。荆牛烹可待，国狗噬何狂？铁券封苏峻，丹书赐董昌。中朝容桀驁，群丑益鸱张。百里无烟火，千村绝稻粱。军行咸拥妇，鬼哭暗闻殇。朽索饥难馭，开笼饱欲飏。先须忧辇毂，莫道划沮漳。每作蛇虫斗，深虞鹬蚌亡。内睽戎伏莽，外侮剥侵床。剧盗锋初远，函关势尚强。雾迷黄帝阵，彗集紫微房。造次分旄节，安危作栋梁。诸公咸倚重，吾意独彷徨。厚宠虽三锡，雄图愧一匡。藩篱殊未固，肘腋况难防。邯鄲惟降楚，温强且叛唐。养蛇将螫手，管库遂探囊。下土栖蓬室，无因叫帝阊。诗题蕉叶遍，风到葛衣凉。浊酒醺难醉，悲歌激不妨。私心图国是，未敢告明堂。同社多英俊，居贫更慨慷。华阴终拂拭，霄汉自飞翔。壮志清河洛，交情重太行。风涛为砥柱，冰雪见松篁。纵使三灵改，无移百炼刚。累朝皆养士，努力念前皇。（此亦留都实录也。暗主无愁，群奸障蔽，强藩跋扈，生民涂炭，作者痛哭言之，激于《板》、《荡》之章矣。）

【塞下曲】

四牡駉駉出玉门，诏持缯帛赐乌孙。为言侍子今无恙，初在京师读《鲁论》。

【少年行】

红玉鞍骄碧玉骢，乐游原上柳丝风。诏求季布今何处？只在三千奴仆中。

【茂陵】

茂陵枯柏自嶙峋，露重珠襦马上寒。独与铜人相对哭，三更残月下金盘。

【书李舒章诗后】

胡笳曲就声多怨，破镜诗成意自惭。庾信文章真健笔，可怜江北望江南。（惜其清才，哀其遭遇，言下无限徘徊。）

周簔

簔字青士，嘉兴布衣，隐于市。

【哭然公】

然公释门老，独卧孤峰云。古貌世莫见，高风予夙闻。松杉手自种，虎豹时为群。叹息永徂谢，山堂空夕曛。

【怀旧为亡友王翊作】

南浦惊心忆往年，送君独上子猷船。乌衣旧巷看犹在，马首长途信可怜。烟树瘴深过岭日，寒潮风急渡江天。宁知陆贾遗归橐，空为王孙给墓田。

陈恭尹

恭尹字元孝，广州润德人。

【蜀中】

子规啼罢客天涯，蜀道如天古所嗟。诸葛威灵存八阵，汉朝终始在三巴。通牛峡路连云一戍，如马瞿唐走浪花。拟酌昔贤鱼水池，海棠开遍野人家。（高祖以蜀王，后主以蜀亡，明眼人可与论古。）

【邺中】

山河百战鼎终分，叹息漳南日暮云。乱世奸雄空复尔，一家辞赋最怜君。铜台未散吹笙伎，石马先传出水文。七十二坟愁草遍，更无人表汉将军。（表扬才华，褫夺奸魄，最为定论。）

【隋宫】

穀洛通淮日夜流，渚荷宫树不曾秋。十年士女河边骨，一笑君王镜里头。月下虹生水殿，天中丝管在迷楼。繁华往事邗沟外，风起杨花无那愁。

【发舟寄湛用啗钟裴仙湛天石】

扶胥古渡水淒淒，雨后移舟望转迷。数口寄居秋草外，一身为客楚云西。家无兄弟依朋友，地夹河山畏鼓鼙。知己片言应不负，乱离儿女藉提携。

【虎丘题壁】

虎迹苍茫霸业沉，古时山色尚阴阴。半楼月影千家笛，万里天涯一夜砧。南国干戈征士泪，西风刀剪美人心。市中亦有吹篪客，乞食吴门秋又深。

【秋日西郊宴集】

(时屈子归首塞上)

黍苗无际雁高飞，对酒心知此日稀。珠海寺边游子合，玉门关外故人归。半生岁月看流水，百战山河见落晖。欲洒新亭数行泪，南朝风景已全非。

【明妃怨】

生死归殊俗，君王命妾来。莫令青冢草，生近李陵台。（韵语中明是非，定赏罚，居然史笔。）

徐夜夜字东痴，山东新城人。

【九日得顾宁人书】

故国千年恨，他乡九日心。山陵余涕泪，风雨罢登临。异县传书远，经时怨别深。陶潜篱下意，谁复续高吟？

余怀怀字澹心，福建莆田人。

【金陵杂感】

六朝佳丽晚烟浮，擘阮弹箏上酒楼。小扇画鸾乘雾去，轻帆带雨入江流。山中梦冷依弘景，湖畔歌残倚莫愁。吴殿金钗梁院鼓，杨花燕子共悠悠。

【由画溪经三箬入合溪】

画舫随风入画溪，秋高天阔五峰低。绿萝僧院孤烟外，红树人家小阁西。箬水长清鱼可数，篁山将尽鸟空啼。桃源仿佛无寻处，枫叶纷纷路欲迷。（晚唐风格。）

潘问奇问奇字雪帆，钱塘人。

【自磁州趋邯郸途中即事】

中宵闻霁发，日出走黄沙。风力能飞石，河冰不陷车。郊寒腾俊鹖，树老立饥鸦。旁午停征辔，炊烟得几家？（比“山虚风落石”尤险，每下一字，俱有锋棱。）

【金棺峡】

涛声何所似？石罅走雷霆。地拔双崖起，天余一线青。真形猱攫古，毒雾蝮蛇腥。我欲穷深险，谁能觅五丁？

【肃宁】

（县有故瑯魏忠贤地宅）

肃宁池馆旧连阡，过客追思鹿马年。齐国竖刁呼尚父，汉朝名士拜中涓。北司计就书难上，元祐碑成事可怜。独喜左杨崇庙食，春来一曲奏神弦。

周同谷

同谷字鹤臞，昆山人。

【流萤祠】

偶因微雨点苍苔，还被轻风扇复开。应为前身是芳草，多情频上院墙来。

梵琦

梵琦字楚石，象山人，居海盐天宁寺。明初征至京，建法会，赐座第一。以下僧诗。

【晓过西湖】

船上见月如可呼，爱之且复留斯须。青山倒影水连郭，白藕作花香满湖。仙林寺远钟已动，灵隐塔高灯欲无。西风吹人不得寐，坐听鱼蟹翻菰蒲。（释子诗取蔬笋气者，寥寥数章，已尽其概。）

【漠北怀古】

旷野多遗骨，前朝数用兵。烽连都护府，栅绕可敦城。象胆随时转，驼蹄入夜明。却因班定远，牵动故乡情。

北入穷荒野，人如旷古时，天山新有唱，耶律晚能诗。共说羊堪种，谁知茧作丝？漫漫风雪里，南望是京师。

【居庸关】

天畔浮云云表峰，北游奇险见居庸。力排剑戟三千士，门掩山河百二重。渠答自今收战马，兜铃无复置边烽。上都避暑频来往，飞鸟犹能识袞龙。

宗泐

宗泐字季潭，临海人。洪武初举高行沙门，居首。遣往西域求遗经，授左善世。

【夏夜与钱子贞集西斋赋诗叙别】

明月不可招，流光入堂中。白云不可约，挂我屋上松。兹会固难得，后会宁易逢？明朝在东郭，隔水但闻钟。

【听泉轩为藏无尽作】

若人有耳惟听泉，泉声入耳长涓涓。穿林出涧度天乐，终古不断冰丝弦。此声不来耳不往，中自寂然遗外响。青灯照壁夜沉沉，独倚轩窗月东上。

守仁

守仁字一初，富阳人，住持灵隐。洪武中征授右善世。

【弘上人所蓄秋山图】

万峰霜晴翠如洗，峰底行云度流水。西北高楼爽气边。江南落木秋声里。蒹葭潮长鱼在梁，白鸥飞尽天茫茫。松根丈人读书处，时有疏钟来上方。仙槎影没银汉远，木末芙蓉为谁剪？何处凉风送客船，归来似是东曹掾。东曹颇笑未识机，挂帆直待鲈鱼肥。山川摇落已如此，未信草露沾人衣。

道衍

道衍字斯道，长洲人。洪武中征入侍燕府，后以靖难功特授少师。

【京口览古】

樵櫓年来战血干，烟花犹自半凋残。五州山近朝云乱，万岁楼空夜月寒。江水无潮通铁瓮，野田有路到金坛。萧梁事业今何在？北固青青客倦看。

大同

大同字妙止，会稽人，延庆寺僧。修《永乐大典》。

【读谢翱传】

南奔北走家何在？七里滩前许剑来。崖海夜寒惟月上，冬青树老又花开。侧身天地聊晞发，怅望江山独把杯。一掬当年知己泪，秋风洒尽下西台。

明秀

明秀字雪江，海盐人，祝发天宁寺。

时有雪江僧《送王伯安谪龙场驿丞》，有“蛮烟瘦马经荒驿，瘴雨寒鸡梦早朝”句。上句写投荒景象，下则忠爱之心亦俱传出矣。是为风雅正声。

【送陈墨山还吴淞兼柬胡秋田】

五茸城外月，不见十年余。顾我曾游地，因君得寄书。津亭燃夜火，江市卖鲈鱼。若见秋田父，还劳问起居。

宗伦宗伦字性彝，芝溪人。

【旅怀】

东吴隔千里，归计尚茫然。忽见梅花发，他乡又一年。

通润通润字一雨，吴僧。

【种松老人】

饭后罢锄春，寒山信短筇。偶随孤犊去，适与老人逢。见面不知姓，自言能种松。横冈千万树，大半已成龙。（格高，本之唐人《访陆鸿渐不遇诗》。）

道源道源字石林，太仓人，居吴北禅寺。

【早梅】

万树寒无色，南枝独有花。香闻流水处，影落野人家。

读彻读彻字苍雪，滇南人，住吴中中峰。

【别吴中诸子】

相晤了无意，临歧还黯然。回看吴苑树，独上秣陵船。春老还山路，江昏欲雨天。白鸥略似我，聚散绿波前

【送朗癯入匡山】

偶向匡庐去，安禅第几重？九江黄叶寺，五老白云峰。落日眠苍兕，飞泉下玉龙。到时应为我，致意虎溪松。（苍雪五言有“风吹残雪树，人语夕阳山”句；七言有“十日花开湖上路，半春家在雪中山”句。王阮亭尚书赏之，采入诗话中。）

今种今种字一灵，番禺人。

【鲁连台】

一笑无秦帝，飘然向海东。谁能排大难，不屑计奇功。古戍三秋雁，高台万木风。从来天下士，只在布衣中。（骨力排奭，神完气足。起语超，落语劲，中间十字成句。放开眼界，一览众山小矣。）

【晋太尉刘琨墓】

《扶风歌》未罢，国势日仓皇。辛苦卢从事，相依在晋阳。风吹沙碛草，月满塞楼霜。遗墓东安县，萧萧遍白杨。

【摄山秋夕】

秋林无静树，叶落鸟频惊。一夜疑风雨，不知山月生。松门开积翠，潭水入空明。渐觉天鸡晓，披衣念远征。

【自白下至携李，与诸子约游山阴】

最恨秦淮柳，长条复短条。秋风吹落叶，一夜别南朝。范蠡河边客，相将荡画桡。言寻大禹穴，直渡浙江潮。（一气赴题，有神无迹，在唐人中亦不多见。）

【粤江秋夜】

明月生珠渚，苍茫万里愁。笙歌喧极浦，风露满孤舟。落雁栖难定，寒潮静不流。年来秋望苦，不上五层楼。

【繇云母峰上大小石楼】

独上朱明顶，高寻仙子踪。玉楼夹日月，秋瀑飞芙蓉。白发几时变，青鸾安可从。何人吹铁笛？忽过麻姑峰。

郭贞顺

贞顺，潮阳周伯玉妻。明初，师下岭南，指挥俞良辅征诸寨之未服者。贞顺从伯玉居溪头寨，作诗上之。良辅览诗大喜，一寨得全。以下名婉诗。

【上俞将军】

将军开国之武臣，早附凤翼攀龙麟。烟云惨淡遍九野，半夜捧出扶桑轮。前年引兵下南粤，眼底群雄尽流血。马蹄带得淮河冰，洒向江南作晴雪。潮阳僻在南海滨，十载不断干戈尘。仁风溥披万里外，天子亦念遐方民。将军高名迈千古，五千健儿猛如虎。轻裘缓辔踏地来，不减襄阳晋羊祜。此时特奉明主恩，金印斗大龟龙纹。大开藩卫制方面，期以忠义酬明君。宣威布德民大悦，把菜一笠谁敢夺？黄犊春耕万陇云，牦龙夜卧千江月。去岁壶阳戍守时，下车爱民如爱儿。壶山苍苍壶水碧，父老至今歌咏之。欲为将军纪勋绩，天家自有如椽笔。但嘱壶民歌太平，磨崖勒尽韩山石。

陆娟娟，陆德蕴女，马龙妻。

【代父送人之新安】

津亭杨柳碧毵毵，人立东风酒半酣。万点落花舟一叶，载将春色过江南。

沈琼莲琼莲字莹中，乌程人。弘治初选入掖庭，官女学士。

【送弟溥试春官】

少小离家侍禁闱，人间天上两依稀。朝迎凤辇趋青琐，夕捧鸾书入紫微。银烛烧残空有梦，玉钗敲断未成归。年年望汝登金籍，同补山龙上袞衣。

屈安人

安人，华阴人。副都御史直之女，参议韩邦靖妻。

【送夫入覲】

君往燕山去，弃妾雒水傍。雒水向东流，妾魂随飞扬。丈夫轻别离，所志在四方。努力事明主，肯为儿女伤！君有双老亲，垂白坐高堂。晨昏妾定省，喜惧君自量。珍重复珍重，丁宁须记将。既为远别去，饮余手中觞。莫辞手中觞，为君整行装。阳关歌欲断，柳条丝更长。（闺阁诗尽洗金粉，独标高格，既取风雅，亦用垂教，别于时俗金粉之习。）

黄安人安人，遂宁人。黄简肃珂之女，修撰杨慎继室。

【寄外】

雁飞曾不度衡阳，锦字何由寄永昌？三春花柳妾薄命，六诏风烟君断肠。日归日归愁岁暮，其雨其雨怨朝阳。相闻空有刀环约，何日金鸡下夜郎？（重阳韵，首句或改“衡湘”。）

方维仪

维仪，桐城人。大理卿大镇之女，适姚孙槃，夫夭，请大归守志。

【死别离】

昔闻生别离，不言死别离，无论生与死，我身独当之。北风吹枯桑，日夜为我悲。上视沧浪天，下无黄口儿。人生不如死。父母泣相持。黄鸟各东西，秋草亦参差，予生何所为？死亦何所辞！白日有如此，我心徒自知。

【出塞】

辞家万里戍，关路隔风烟。赋重无余饷，边荒不种田。小兵知有死，贪吏尚求钱。倚赖君王福，何时唱凯还？

【旅秋闻寇】

蟋蟀吟秋户，凉风起暮山。衰年逢世乱，故国几时还？盗贼侵南甸，军书下北关。生民涂炭尽，积血染刀环。（如读杜老伤时之作，闺阁中乃有此人！）

黄幼藻幼藻字汉蓀，莆田人。苏州府通判议之女。

【题明妃出塞图】

天外边风扑面沙，举头何处是中华？早知身被丹青误，但嫁巫山百姓家。（亦作黄

潜仲昭诗。)

商景兰景兰，会稽人。吏部尚书周祚女，祁公彪佳配。

【悼亡】

公自垂千古，吾犹恋一生。君臣原大节，儿女亦人情。折槛生前事，遗碑死后名。存亡虽异路，贞白本相成。

曹寿奴寿奴小字山姑，崇祯间吴兴女子。

【夫君北行，以菩提数珠留赠】

百八菩提子，红丝贯小纓。无眠后夜月，留记远钟声。（关合无迹。）

楔逊朝鲜。逊，回鹘人。世居楔鞑河，因以为氏。官端本堂正字。以下外国诗。

【山雨】

一夜山中雨，林端风怒号，不知溪水长，只觉钓船高。（纯乎天籁。）

申从官成均直讲。

【伤春】

茶瓯饮罢睡初轻，隔屋闻吹紫玉笙。燕子不来春又去，满庭红雨落无声。

崔淀淀字彦沉，海州人。进士。

【春日】

杨柳依依江水生，杏花如雪落无声。青霞卷尽画楼出，中有玉人吹玉笙。

成侃爵里未详。成侃至郑之升，见《朝鲜采风录》，官爵世次俱阙。

【罗唝曲】

为报郎君道，今年归未迟。江头春草绿，是妾断肠时。

林悌

【闺怨】

十五越溪女，含羞语不发。归来掩重门，泣向梨花月。（如读崔国辅小诗。）

姜克诚

【湖堂早起】

江月晓欲沉，宿云寒未去，但闻柔橹声，不见舟行处。（唐无名氏有“烟昏不见人，隐隐数声橹”句，传写晓景，俱非画笔能到。）

李仁老

【题杏花鸂鶒图】

欲雨未雨春阴垂，杏花一枝复两枝。问谁领得春消息，惟有鸂鶒之与鶒之。

郑之升

【留别】

怅望溪亭夕照明，绿杨如画罨春城。无人为唱《阳关曲》，惟有青山送我行。（情致缠绵，此唐人作更翻得别。）

许景樊

景樊字兰雪，七岁作《广寒宫上梁文》，长适进士金成立。成立殉国难，许以节见。

【塞上】

侵云石磴马蹄穿，陟尽重冈若上天。秋晚鱼龙眠巨壑，雨晴虹落飞泉。将军鼓角行边急。公主琵琶说怨偏。日暮为君歌《出塞》，剑花腾跃匣中莲。

【望高台】

层台一柱压嵯峨，西北浮云接塞多。铁峡霸图龙已去，穆陵秋色雁初过。山回大陆

吞三郡，水割平原纳九河。万里登临日将暮，醉凭青嶂独悲歌。（风格意度俱好，钱牧斋因其近七子体，故亦贬之。）

李氏赵瑗妾。

【登楼】

红阑六曲压银河，瑞雾霏霏湿翠罗。明月不知沧海暮，九疑山下白云多。

占城贡使

【江楼留别】

青嶂俯楼楼俯波，远人送客此经过。西风扬子江边柳，落叶不如离思多。

洞庭老人

【歌】

八十沧浪一老翁，芦花江上水连空。世间多少乘除事，良夜月明收钓筒。

无名氏

【题西山清凉寺壁】

山僧汲空潭，惊起二龙子。百里云蒙蒙，三日雨不止。